

ASO LUA, 30 JANUARI 2024

Na toe amatalia Taualumaga a le Fono Aoao Faitulafono i le itula e 2:02 i le afiafi.

Na toe faaauau felafolafoaiga i le Tulafono Tau Faaofi o le Faatatauina o Tupe Faaopoopo (Nu.1) 2023/2024.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

E i ai le manatu ua saoialo le tautega a le paia o le Palemene i lenei vaega o le aso, ua maua foi se faasiliga malosi e faaauau ai le tatou galuega, malo le onosai.

E faataatiaeese tatou Taualumaga mo le malologa ua maea le Saunoaga Talifuaiteau a le Afioga i le Minisita mo le Soifua Maloloina. O le mea lea, o lea ua oo atu le tatou faasologa i lau Afioga i le Minisita mo Leoleo ma le Ola Toefuataiga ma le Ofisa o le Komisi o Faiga Palota. Ou te tapa ma le faaaloalo lau Afioga mo lau saunoaga.

Afioga Hon FAUALO HARRY JEFFREY SCHUSTER (Minisita mo Leoleo & Ola Toefuatauina ma le Komisi o Faiga Palota): Faafetai lau Afioga i le Fofoga Fetalai mo le avanoa, ia e faatulou atu i le afio o lau Afioga. E faatulou atu foi i le Afioga i le Tamaitai Palemia ma le mamalu o le Kapaneta, Minisita Lagolago, sui usufono o lenei itu o le Maota.

E faatulou atu foi i le Taitai ma le Sui Taitai o le Itu Agai ae tainane ia sui usufono o le la itu o le Maota.

E faatulou atu foi i le Afioga i le Aao Tusitusi ma le aufaigaluega, ia faapea foi Ofisa Sili o Matagaluega ma Faalapotopotoga Tumaoti a le Malo. Malo le galulue, malo le onosai.

Lau Afioga i le Fofoga Fetalai, e le i tele tele ni fesili mo Matagaluega o lo o ou vaavaaia, Leoleo ma Falepuipui, o le Tineimu ia faapea foi le Ofisa o Faiga Palota. Lau Afioga o fesili na fesiligia ai, o le toatele lava na fesili i le tulaga i fualaaau faasaina aemaise a le tulaga lea o le aisa. O e sa fesiligia le tulaga lea, o le sui usufono o le Vaimauga 1, Salega 1, Aana 2, Aleipata Itupa i Luga, Safata 1, Satupaitea, sa faapea foi ona afea e le Taitai o le Itu Agai ia ma Faleata 1.

Lau Afioga e tatou te tutu faatasi i totonu o le Maota lenei e tatou te atugalu uma lava i le tulaga lea i le fualaaau faasaina aemaise lava le aisa ona e ogaga tulaga e aafia ai le tagata e taumafa i le aisa. Ma e tatou te le mananao foi e... tatou te tutu faatasi tatou te le mananao e avea faa-faamai lenei faafitauli i

totonu o Samoa. Faafetai, e talia ma le faafetai fautuaga ma atugaluga mai i sui usufono uma sa saunoa i le mataupu lenei. O lo o nofo mataala foi le Matagaluega i le tulaga lea i le aisa.

Ae i ai nai vaega foi lea e fia... o se tala foi lea i le galuega a le Matagaluega o lo o faia i le tulaga i le aisa. I faamaumauga a le Matagaluega i tausaga ua tuanai atu 2022, e valu ia osofaiga na osofai ai ni fale ma ni laoa o ni tagata sa masalomia i le solitulafono lea. Ma i osofaiga uma ia e valu e 11.32 kalama na maua mai le tausaga lea, e fitu laau marijuana, 23 lala marijuana ae 11 ia fatu marijuana na maua mai ai. O le aofaiga atoa a lea mo osofaiga ia.

I le tausaga e 2023 e 13 osofaiga, e 72.10 kalama le aisa na maua mai ai, e 1,452 laau marijuana, 115 lala marijuana, e 1,484 ia fatu o le marijuana. O le amataga o le tausaga lenei e tasi le osofaiga lea na alu ma na maua mai ai le 1, le 0.04 kalama o le aisa, e 28 lala marijuana, e 140 fatu marijuana.

O se faamalosiloto i le galuega a leoleo, i osofaiga uma lava ia na iloa le sao ma le lelei o suesuega a leoleo ona ae le i faia se osofaiga, e te manaomia se faatagaga mai se alii po o se tamaitai Faamasino e faataga ai leoleo e o e osofai se fale o se tagata. E tatau la ona e faamalieina le Faamasino o lo o i ai ni mauanoa e lagolago ai le talitonuga o le fale o le tagata lea o la e i ai le aisa ma o se tulaga lelei la lea. I osofaiga uma a leoleo lea na alu i fale ia, leai ma se fale na asa na maua ai e leoleo a le o le aisa o le marijuana.

I faamaumauga lea e i ai, e ui i le atugaluga foi lea i sosolo faa-faamai. O le faamaumauga o le aisa e le o faaalia se alu i luga ae tatou te popole a, ia lelei le galuega a leoleo i le tulaga lea. E mafua le tala lea, a fua le kalama o le 0.04 o le kalama, si tamai mea lava pei o lou atigilima le tele o le aisa lena. O le tau o le aisa lena i lipoti a leoleo ua i ai nei sa masani ona \$100 ae ua \$200. O lea foi la e faavae ai le manatu o leoleo e le o faateteleina ia le aisa. O le mea lea e i ai ua amata ona maua le mea lea e maua mai ai. O le latou a talitonuga o le sau mai fafo ma o le laitiiti la o le aisa lea ua maua lea ua alu ai i luga le tau a o le aofaiga lava e tasi.

O le 11.32 kalama ia pe na o le kuata o le sipuniti e maua ai. O le 72.10 kalama ia pe o le afa o le sipuniti e maua ai. E faamauinla e ui o le aisa e le o alu agai i luga le fuainumera, a o le mea lea e maitauina o lea e tele lava o le marijuana. O lea la e tele a le marijuana lea e toto i totonu o le atunu ma e lagolagoina tele le finagalo na faaalia e le Afioga i le Taitai o le Itu Agai faapea foi sui usufono na faaali mai le manatu lea. O le pulega mamalu a alii ma faipule, tasi ia tagata tatou te faamoemoe i ai i le tulaga lea e le gata i le marijuana a o le aisa foi. Ona a malosi le puleaga ma faasa ma tapu e alii ma faipule ma faatulai ni tagata mai o latou alaalafaga pe a solitulafono, o le fesoasoani tele foi lea i le Matagaluega o Leoleo. Ae faamauinla i osofaiga ia a leoleo o lo o mataitu e leoleo le tulaga o le aisa ma o lo o lelei foi le faagaoioiga o latou galuega. E iloa ai foi i i le tulaga i le Vaega Faapitoa lava lea, le vaega a le CIP lea e faapitoa i mea tau fualaa faasaina le latou galuega, o lo o lelei le faatinoina o a latou tiute.

O le isi tulaga lau Afioga sa afea i saunoaga a sui usufono mamalu, sa i ai le popolega foi lea i le taimi la sa leaga ai le Nafanua II pei foi lea e le i i ai se vaa. O le tulaga e le i faailoaina e Leoleo e le i faailoa atu foi i faasalalauga a

le Matagaluega, na leaga loa le Nafanua II na totogi e le Malo o Ausetalia le sa o se tasi o Faipisinisi o se sa lea e faaaoga e fagota, ituiga vaafagota foi lea e mafai ona tolu vaiaso o alu i le sami. O le taimi atoa lava la sa totogi e le Malo o Ausetalia ma Leoleo Ausetalia ia le sa lena e faaaoga e puipui ai le tatou ogasami. Ae sa fesoasoani mai foi Niu Sila, Ausetalia o Kanata, Malo o Falani ma Amerika. Sa i ai foi taimi na omai ai latou vaa i totonu o le tatou ogasami ma fesoasoani mai i le galuega. E le i i ai la se taimi na faapea foi lea, na leai ma se vaa na i ai e tilotilo i le gataifale i le faaaogaina o le sami e aumai ai fualaau faasaina. O le tala fiafia lea ua maua mai le tatou Nafanua, e i ai ma le isi vaa lea o le Tilafaiga na aumai le Malo Sapani. Faafetai ia Ausetalia ma le Malo Sapani mo lenei fesoasoani tele.

Sa i ai foi se fesili a le sui usufono o Aleipata Itupa i Luga, e popole foi lea i le gataifale o le atu Aleipata e masalomia po o la e lau mai ai i fafo le aisa. Sa mataitu e le Matagaluega ma e i ai taimi na alu ai le vaa lea sa faaaoga e Leoleo ma fealuai i le gataifale lea. Peitai e latou te le i mauaina mai se vaa e sau mai fafo na faaui mai ai ni fualaau faasaina i le itulagi lea.

Lau Afioga i le Fofoga Fetalai, o se tasi o fesili na fesiligia e le sui usufono mo Faleata 1, mo taavale ia e tele moli ma leotele tele a latou sipika. Ia, e taumafai a Leoleo i le tulaga lea, e aveese ia mea ia pe a maua ae o tagata foi ia, e maua i le mea lea e iloa loa o la e i ai Leoleo i le vaega lea ona le faapaoina lea o le leitio pe ki ia moli. Ae o ese atu loa mai le mea o i ai Leoleo ia ona fai foi lea. Ae o lo o fai le galuega a le Matagaluega, a maua lava taavale ia ma aveese sipika ia ma moli lau Afioga.

Sa fautuaina foi e le sui usufono o Faleata 1 le tulaga lea i poloka a Leoleo lea e fai e poloka ai ma le auala. Ia, e faatagisia foi le onosai o le mamalu o le atunu, e sao e poloka lava le auala ae maitauina i poloka ia a Leoleo, a fesili mai se isi... Atonu a ou fai atu le tala lea, e tatou te tete'i. O le solitulafono pito sili ona maualuga i totonu o Samoa, e le o le faaoolima po o le tele o isi solitulafono lea e sau i le leitio ma le TV, o le avetaavale le laisenea ma le taavale le laiseneina. I le vaitaimi o le malologa lea na tea atu nei, e lua pasi na maua e le o laiseneina, o lona uiga la e faaaoga le pasi ae le o ausia le tulaga foi lea po o saogalemu le pasi.

O le mea lea, e talia le fautuaga foi a le sui usufono mamalu i le faatinoina o le tiute ia fai i se tulaga foi lea e le faalavelave tele ai i le mamalu o le atunu. Ia ae faatagisia foi le onosai o le mamalu o le atunu ona e taua foi le tulaga lea e siaki ia taavale ma pasi ma avetaavale ia i ai ni laisene o taavale ia ma ia laisenea foi avetaavale.

O se tasi o fesili na fesiligia o le sui usufono mai Anoamaa 1 i le talosaga e toe faaoo atu ia Sauano ma Saletele mai le itumalo... ia toe faafoi atu i le Itumalo Palota o Anoamaa 1. Lau Afioga i le sui usufono mamalu o lo o faataatia nei... ua uma le lipoti a le tatou Komisi Suesue, uma le lipoti a le Maota. Ua fai foi le lipoti a le Matagaluega o lea o le a taatia le mataupu lea i luma o le Kabeneta mo se iloiloga i se tatou Tulafono e aumai i le Maota. E tatou te tilotilo uma i ai i le Tulafono mo le Tulafono e faatonutonu ai a tatou Faiga Palota. Masalo o se taimi ona faaoo mai lea i le Maota le Tulafono lea.

Tofa Hon Olo Fiti Afoa Vaai: Lau Afioga i le Fofoga Fatalai...

FOFOGA FETALAI: Malie lau Afioga i le Minisita o Leoleo, se i tuu atu le avanoa i lau Afioga i le Minisita o Galuega Tetele.

Tofa Hon Olo Fiti Afoa Vaai: E puupuu lava ia si mea lea e fia faamalamalama, o lea foi ua saunoa manino le Afioga i le Minisita o Leoleo i le tulaga o soligatulafono pito sili ona maualuga. Ia ae... o le tulaga lea o le leai o ni laisene ma le le laiseneina o taavale a le tatou atunu. I le taimi lenei i lalo o le Tulafono a le LTA e le o i ai se tulaga foi lea e faamalosia mai ai e le LTA ia le atunu e o atu e laisene taavale ia ma le agai atu e faafou laisene. Na pau lava la le tulaga lea e i ai, ia o lo o tuu lava ia le galuega foi lea i Malu o le Malo o latou e latou te faia le monitoring ia ma silasila totoa pe i ai ni taavale ua le pasia ma ni tagata ua leai ni laisene.

E sao le saunoaga a le Afioga i le alii Minisita, o pasi ia na lavevea nei vaeatu le... ia e leai a ma se pasi na pasiaina e le LTA. E i ai a le manatu foi lea a le tatou Pulega o le LTA a faapea ua le pasia se pasi o lona uiga o la e mafaufau o la e tu lelei i le fale le pasi. Ae peitai sa feoai a pasi na i le mea lea ma tulai mai ai faalavelave.

O mea foi la ia o moli ma... e sao lelei lava, o moli lea e faasa nei ia e agai atu lava e pasi taavale e leai ni moli lanumoana, lanumeamata ma mea faapena ma laau. Ae uma mai loa ia ona omai foi lea fai lava le latou...

O le mea la lea lau Afioga i le Fofoga Fatalai e tatalo atu lava i le Afioga i le Minisita o Leoleo e tuu atu lava le enforce ina o le tatou Tulafono i lau Afioga ma lau Matagaluega. E maua loa foi nisi o faia lava le mea lea o le fai o moli lanumoana i latou headlights. E oo foi lava i taxi ma pasi ua emeemo mai latou sign ua le lanumoli ae ua lanu papae pe lanumeamata. O le mea la lea e maua atu loa lena se i loa ma le laisene ae faamalolo loa. Ma le faaaloalo faafetai.

FOFOGA FETALAI: Malo faafetai. Ia se i tulai mai lau Afioga i le Minisita o Leoleo ma Falepuipui.

Afioga Hon FAUALO HARRY JEFFREY SCHUSTER: Faafetai i lau Afioga le Fofoga Fatalai. Faafetai atu foi i le uso a Minisita. E saolele lava le saunoaga. Ma o lea foi ua tagai Leoleo i le Tulafono e i ai si faaletonu lea o lo o i le Tulafono ona na o le pau le mea la e fai na o le maua lava o oe ticket, maua oe ticket ae e le o i ai se mea foi lea e sau se faasalaga foi lea a molia atu oe i le faamasinoga ae e faia muamua se solitulafono i le leai o se laisene ae toe fai ia ua uma loa le salatupe ae e alu sao loa i le falepuipui. Pei o se mataupu na pau i le taimi o le tusiga o le Tulafono. Ae, o lea o lo o tagai le Matagaluega i le tulaga lea lau Afioga.

Lau Afioga i le Fofoga Fatalai, ne i te i sese au faamaumauga ae na o le pau lena o vaega na laga i le Matagaluega...

Afioga Leaana Ronnie Posini: Lau Afioga i le Fofoga Fatalai.

FOFOGA FETALAI: Ia onosai mai se i ou vaai pe o i ai sou... E leai. E faamalulu atu i le sui usufono lea e tu mai e le o i ai sou suafa i e na faaalua o latou finagalo, vagana la le sui usufono mo Satupaitea.. Tulai mai...

Afioga Leaana Ronnie Posini: Lau Afioga...O la e maua atu o la e saunoa mai...

FOFOGA FETALAI: Ia se i tulai mai le sui usufono o Safata 1. O le a le mea lea e te taua?

Afioga Leaana Ronnie Posini: Leai, o la e saunoa mai le Afioga i le Minisita o la e tau mai foi lenei itumalo sa taua ai tulaga ia o lau lauga e faatatau foi i mea ia o tulaga o fualaau faasaina ma tulaga foi tau leoleo.

FOFOGA FETALAI: Ia se i saunoa lau Afioga...

Afioga Leaana Ronnie Posini: Ia faafetai tele lava. Faafetai o lea ua matua manino le saunoaga a lau Afioga. Pei o le mea lea sa ou fesiligia ai foi le galuega faaleoleo ma tulaga na, o le tulaga lea mo suesuega a le Matagaluega o Leoleo aua lea... o lou talitonuga a fai suesuega a le Matagaluega o Leoleo ona agai lea i le Faamsinoga. Ae peitai ua ou faalogo i nisi foi saunoaga a le Maota e tatau ona... o le matapu tau Kapaneta ni suesuega a leoleo ia na fai. Ou te fia fesili la i le afioga i le Minisita po o fea tonu lava o le mea lea... Po o le mea e lipoti suesuega a le Ofisa o Leoleo i le Kapaneta e fai ai se faaiuga a le Kapaneta ona faatoa agai lea i le Faamsinoga. Ma le agaga faaaloalo.

FOFOGA FETALAI: Ia se i tulai mai lau Afioga i le Minisita. Pe talafeagai le fesili a le sui usufono mai Safata.

Afioga Hon FAUALO HARRY JEFFREY SCHUSTER: Faafetai tele lava i lau Afioga le Fofoga Fetalai. Faafetai foi mo le sui usufono mamalu o Safata numera muamua mo le fesili. O lau faitauga a au ia i le Tulafono o lo o manino. Ae a i ai lava se tulaga foi lea e i ai se mea e fia faatalanoaina e le Kapaneta i Matagaluega uma a le Malo e manino le tulaga lena e leai se Matagaluega e le mafai na le oo i ai le talanoaga a le Kapaneta. Ae leai se mea e atugalu ai. Ae o le Tulafono a ia i le faatinoina o suesuega ma le faiga o moliaga e ave i le Faamsinoga o le mea lena e patino i le Matagaluega o Leoleo. O lo o manino a le Tulafono o le malosiaga na e taoto i le Komesina o Leoleo ma leoleo uma ua uma ona faatautoina - sworn officers e le o le au sivili... O le fesoasoani atu lena i le fesili pe a faapea ua...

FOFOGA FETALAI: Faafetai lea ua manino lea vaega. Faafetai i lau Afioga le Minisita.

Se i tulai mai lau Afioga i le Taitai o le Itu Agai, leaga o lea e i ai lou suafa i le lis...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, sa saunoa le Minisita i le tulaga o le sao o le pulega mamalu a alii ma faipule. E maitauina ua ou faalogo e le lava ia leoleo. Ae ou te faamalo i galuega o leoleo. E i ai le vaega lea na amata ai ona ave a tatou leoleo i peacekeeping a le Malo Aufaatasi mai le 2000. Ma o se tulaga taua tele lea mo le aoaoina o tatou leoleo i galuega faa-peacekeeping e le gata foi i lea o le avanoa e mafai ai ona o atu isi a tatou leoleo e galulue i Malo Aufaatasi e i ai leoleo ua maua a latou galuega tumau. Ae i ai taimi ou te tau maitauina ai e pei ua tau augata le Komesina o Leoleo foi lele i tulaga ia. O lea foi e vaai pumoomoo latou i totonu o le atunuu. O le mea la lea matou te matua fautuaina lava le faataua o avanoa ia e o ai tatou leoleo i galuega faa-peacekeeping a Malo Aufaatasi. O se tuualalo mo le agai i luma o training mo a tatou leoleo.

FOFOGA FETALAI: Faafetai. Malo faafetai.

Tofa Hon Lauofo Fonotoe Nuafesili Pierre Lauofo: Faafetai i lau Afioga i le Fofoga Fetalai mo le faasaoina o le taimi...

FOFOGA FETALAI: Ia se i tulai mai lau Afioga i le Sui Taitai o le Itu Agai...

Tofa Hon Lauofo Fonotoe Nuafesili Pierre Lauofo: Mo fualaau faasaina ia sa taua i lau lauga o le fualaau faasaina lea o le aisa. Momoli atu ai le faafetai i le saunoaga a le afioga i le Minisita ae faamauina foi le faamalo i le Komesina ma le Matagaluega o Leoelo aua e le faigofie le galuega. Mo sailiga faapea po o ni osofaiga e o ai e saili ni nofoaga e faatino ai vaega ia. Ia a o lea la ou te faalogologo atu i le saunoaga a le afioga i le Minisita ia atonu o le sao lena e le o maitauina se faatupulaia o le aisa pe a fua i aisa po o fualaau faasaina ua maua e leoleo. Ae pei o le vaaiga lautele faaletagata e pei e fai sina lautele o le faafitauli lea e feagai ma le tatou atunuu. Aua o lea foi lava e lipotia mai ua faaaaoga foi nai tamaiti e o e faatau atu le fualaau faasaina lea. Aua e pei e foliga mai o le mea sili ona... mafuaaga sili ona fai e tagata le mea lea... E le gata e maua ai mo faalogona po o latou... faalogona i le tulaga o le faaaaogaina ae pei o le tupe lava lea e maitau atu e fiafia e o e fai ona e tupe lelei, e tele le tupe e maua ai. Ia atonu e tasi lena tulaga e silasila i ai le tatou Matagaluega o Leoelo aua e faigofie lava ona masalomia se tagata foi lea e vaai atu ua tele faafuasei sana seleni ae le masani ai.

E pei o tulaga ia lau Afioga ae faafetai mo le faamaninoga o vaega ia....

FOFOGA FETALAI: Malo faafetai. Ia se i tulai mail au Afioga. Malie lava lau Afioga i le Minisita mo le faasaoina o lou taimi leaga o lea foi sa saunoa le Afioga i le sui usufono mamalu mai Satupaitea... Tulai mai le sui usufono mamalu.

Afioga Hon Lautafi Fio Selafi Purcell: Ioe, faafetai...

FOFOGA FETALAI: Lau afioga i le sui usufono mamalu...

Afioga Hon Lautafi Fio Selafi Purcell: E momoli le faafetai i le Afioga i le Minisita o Leoleo mo taumafaiga a le Matagaluega i le faaitiitia o le tulaga lea ua oo i ai le faafitauli. Ia e pei foi ona saunoa le matou Sui Taitai, atonu o mea na lea e maua mai, these are the statistics. Pe fua i ai le alu i luga ma le alu i lalo. A o lea ua tatou maitau i le taimi lenei, ua le asa lava se osofaiga a Leoleo. Ua le toe asa... e pei o aso la e tele a o marijuana e pei o le tulaga na. Ia te au ia, i le faatusatusaina o le lua lea, e fai lava si ogaoga o le tulaga lea o le aisa. Ma o le tulaga foi o le aisa e tau malamalama laitiiti foi i ai. E le faapea e tasi le quality o aisa uma. E i ai aisa e eseese quality... top quality faasolosolo faapena. O lou talitonuga e toalaiti a tagata Samoa e latou te gafatia le tau o le aisa le top quality ice lea e sau mai fafo. Ou te nofo ai pea ma lou manatu e pei ona faaalia foi e se tasi o sui usufono. I lou lava talitonuga o lea ua fai i totolu o Samoa le aisa. Atonu o aisa e le matua pure ma e le matua taugata a o aisa e gafatia e tagata o tatou. Po o le a lava le quality a o la ua mafai na latou faaaogaina le aisa. O le mea la lea...leaga na i ai foi lau lauga muamua i le mataupu lava lenei i lou talitonuga o lea e fai i totolu nei aua e maua i inei mea e fai ai. E maua i faletalavai ma fale faapena. E fiafia tele la latou lea e faia le mea lenei tusa lava pe i ai tatou maile, tulou, tusa lava pe i ai tatou taifau. Aua foi e le maua ai, e maua lava o o mea ia e aumai taitasiasi mai e le faasa i Samoa. Mea ia e aumai fau ai i inei ma mea ia e maua i faleoloa ma faletalavai. Ae sau le saunoaga a le Ofisa o Leoleo e uiga i le mataupu i le taimi na fai mai o le latou talitonuga e le o faia i inei... Ia na o se tuualalo lava, leaga lea ua tatou vaai i ai ua alu alu lava i luga le aafiaga o tupulaga. Ou te le popole tele i le faatusatusaina lea o le lua i laau faasaina ole marijuana lau Afioga i le Fofoga Fetalai aua e tele lava le malosiaga o alii ma faipule. Aua o totolu o eleele o alii ma faipule lea e toto ai e iloagofie lava ma mauagofie. Ae o le aisa e fai lava sina faigata ona maua. E le faia foi e i latou ia i tua o nuu aua foi e latou te le afford ina le tau o le aisa. Pau a le mea i a latou o le marijuana. A o le network lea e faaaogaina le aisa lau Afioga i le Minisita e tuu atu lava se tuualalo atonu lava o i ina lea o lo o i ai tagata o lo o latou gaosia le aisa i inei i Samoa. O lou lava talitonuga lena. Ae na ona tuu atu faapena i lau Afioga ma le mamalu o le tatou Matagaluega se i silasila i ai. You must go in there with an open mind i le mataupu nei. Aua ne i faapea e le o maua i inei ona tuu ai lea. No, anything is possible i tagata nei e faia le mataupu nei. They are professionals and they are highly qualified and highly... foi lea i mea tau tekonomosi... latou te iloa ai mea uma nei o aisa. They are a complicated group of people. Ae na o le tuu atu faapena i lau Afioga.

O le mataupu lea i taavale pei ona tatou talanoa ai foi ia lea o le a tatou toe talanoa ai foi. I lou talitonuga o la e i ai le Tulafono e imbound ai le taavale pe a maua ua faalua ona solitulafono. O le mea lea ou te lagona o le mea lea e tupu, ma e atonu o le talitonuga foi lea a malu o le malo e ta loa le lima ona manava lea, ae o le taimi lea faatoa feoai ai latou nei e faia solitulafono. Ia o lou talitonuga, e i ai lava le power o le leoleo, a fetaui lava ma le taavale lea ua sau ae la e ua alu atu ua manava la e sau ma emoemo mai moli eseese nei, e i ai a

le power a le leoleo, toe liliu ai sau taofi le taavale ma ave le... po o le a le mea e tatau na fai i tagata nei. Aua a tatou tuu i le taimi e faigaluega ai le malu o le malo faatoa maua,,, e iloa foi e tagata ia le taimi e fai ai latou mea valea nei... O la e lava e fai i uta i Aleisa... e tau le mafai na ou pupula i le po foi lea pe a sau se taavale ma moli nei lapopoia ia e fai mai ma isi lava tulaga o moli lea ua i ai nei. Ma lou faaaloalo faafetai.

FOFOGA FETALAI: Lea ua maua le finagalo o le sui usufono. Mo le... ia se i tulai mai le sui usufono mo Faleata 4. Mo le faasaoina o le taimi o lau Afioga i le Minisita.

Tofa Ale Vena Ale: Faafetai i lau Afioga i le Fofoga Fatalai. E pei ona silafia foi, o au le isi sui usufono na ou tuuina atu foi i le Afioga i le Minisita le tulaga lea... fautuaga lea i pulega a alii ma faipule. Silasila i ai i mea ia i Puipaa lea na maua mai o i lou... Na o atu foi lea o Leoleo matou feiloai ma le matou nuu ae fai mai Leoleo e leai se Tulafono. Ou fai atu, o a na mea e leai se tulafono? E leai ua faasa e le matou nuu le tagata lea na maua ai mea ia i i. O outou e fai... E lelei le o o outou aua na matou o matou feiloai. O e fai i tagata ia e o ese ma o i le mea la e i o. E le talia e le nuu lenei ni tagata ai aisa ma omai e faatau ni mea... Ua aafia ai alo ma fanau o le matou nuu. Pei o le mea na... e alolofa foi le Matagaluega o Leoleo e fesoasoani mai i alii ma faipule ae pei e o atu Leoleo matou feiloai ae fai mai leaga o le tulafono o le fanua o le tagata. Ou fai atu, e a la le fanua o le tagata? E le talia e le nuu lenei. Ua feteenai i i tulaga o mea ia o tulafono. E le talia... O lea o le a le talia e le nuu le tagata ai aisa. Ae o atu Leoleo fai mai leaga o le fanua o le tagata he has the right e nofo ai i lona fanua. What right? E tatau na...

O le mea lea ou te fautuaina ai i le pulega lea mamalu a alii ma faipule ina ia galulue faatasi ma leoleo a tatou le faia se auala e tackle ai le mea lea its getting worse. O le mea lea o drugs. Ia ma o lea foi ou te augani atu i lau Afioga po o le a le sao o le mea o le test o tagata i mea ia o drugs aemaise o faipule ma le aufaigaluega a le Malo po o i ina na e sau ai pe leai. E pei o le itu lena lau Afioga. Ma le faaaloalo lava.

FOFOGA FETALAI: Malo faafetai saunoa. Ia lau Afioga i le Minisita. Ia se i faauma maia lau saunoaga.

Afioga Hon FAUALO HARRY JEFFREY SCHUSTER: Faafetai i lau Afioga i le Fofoga Fatalai. Ia e faamaonia, e sao le tulaga sa saunoa ai le sui usufono o Faleata 1 o ia o se tasi o sui usufono sa saunoa i le tulaga lea. E sao lelei lau Afioga, pei ona laga e le Taitai o le Itu Agai le taua o le fesootai o leoleo ma pulega mamalu a alii ma faipule ae tau i ai lava si eseesega laitiiti i se tulafono foi lea i fanua faaleaganuu. E malosi le tulafono i le itu lea i le pulega a alii ma faipule i fanua faaleaganuu. Ae a see mai loa i fanua ia freehold land e tau eseele laitiiti le tulafono e pei o le mea lena e faaeteete ai. E mafai ona ave le tagata foi lea... tagata o le... pei o le nuu a tatou e faigofie i tatou tulafono ona faatea i fanua faaleaganuu ae tau faigata la le mataupu lena pe a

oo atu i tagata ia e alaala i fanua saoloto ia o fanua saoloto e i totonu o alaala faga tumaoti ae o se... e le faapea foi o se tulaga e le mafai ona fai ai e i ai auala e faatalatalanoa ai tulaga faapea. Ae taua le manatu e faigaluega ma alii ma faipule i le taumafai e titina le aisa. Faafetai mo le fautuaga.

Lau afioga ua talia foi le fautuaga i sui na aumai i le tulaga e mataitu o lo o mataitu e leoleo le tulaga lea po o fai i inei le aisa ona o lea sa i ai le taimi sa maua ai foi e leoleo o le faatauga mai. O fualaau a e tulituli e le au fai aisa e fai ai le aisa o le codeine ma le ephedrine e pei o fualaau ia la e maua ai totonu le codeine ma le ephedrine na e tulituli e leoleo pe i ai se isi o faataua ituaiga fualaau na e sili atu. O le ephedrine e le mafai ona e aumaia le ephedrine seiloga e aumai e se tagata e i ai le laisene Pharmacy a o le codeine o la e mafai ona faatau mai foi lea e le au faatauoloa seiavagana ai na o Amerika lea e i ai le tulaga e faasa e Amerika ona faatau le codeine seiloga ua faatau e se tagata e i ai le Faletalavai.

Faafetai foi i lau Afioga i le Taitai o le Itu Agai ua e taua le tulaga lea i leoleo ia sa mafai ona o i auaunaga ia a le UN o lo o taumafai lava e faaaauae ae i ai se suiga ua i ai, ua le o toe faaaogaina mai e le... o suiga mai o faiga faavae a le UN ua le o toe faaaogaina le tulaga lea sa masani ona omai le auvaega mai fafo e fai suesuega i totonu o Samoa ua faapea mai e o i atunu ia ua latou faataga ua ave i ai le tomai faapitoa e fai atu ai suega ia. Ma e i ai foi isi suiga o la ua i ai ua i ai le fuainumera e mafai ona tilotilo i ai, o le fuainumera la i lau faalogo i ai pe 50 tagata e avatu i se atunu ia ua tau fai si maualuga o le fuainumera lea mo i tatou. Ae o lo o taumafai le Komesina e faatalatalanoa le mataupu lea ma le UN i se mea e talafeagai mo i tatou, ae faafetai mo fautuaga. Lau afioga i le Fofoga Fetalai faafetai tele lava mo le avanoa.

FOFOGA FETALAI: Malo faafetai. Malo saunoa i lau afioga i le Minisita. E talitonu foi o lea ua faamalieina finagalo o sui usufono mamalu sa laga nisi i lau Matagaluega o lea ua e tali manino. Malo lava mo le saunoaga o lea foi ua faamalieina finagalo o nisi o sui usufono mamalu o le Maota.

Ia ua oo mai le tatou faasologa i le Minisita mo Tina ma Tamaitai, Atinae o Nuu ma Afioaga ma Agafesootai, lau afioga i le Minisita.

Afioga Hon MULIPOLA ANAROSA ALE MOLIOO (Minisita mo Tina ma Tamaitai, Atinae o Nuu ma Afioaga ma Agafesootai): Faafetai i lau afioga i le Fofoga Fetalai o le Maota. E manatu foi o lea ua tuta i Taga o Salemuliaga le sa o Sa Tunumafono ma le Alataua. O lea foi ua taoto le ata o taulelei e matau atu i sulu o le tino o lo o maualuga le aoina o le masina i lau afioga i le Fofoga Fetalai. Ou te faatalofa atu, aemaise foi o le tapuaiga a le Taitai o le Malo po o le Afioga i le Tamaitai Palemia, o le Sui Palemia e le o mafai ona tatou auaifaatasi ona o malaga faalemalo. Ia o le saofaiga a le Kapeneta, o Minisita Lagolago o le Maota, o le Taitai o le Itu Agai ma lona Sui Taitai, aemaise le Maota o le Palemene ma sui usufono.

Liliu ane i lea itu i le tapuaiga a Ofisa Sili o Pulega o Matagaluega a le Malo, o Faalapotopotoga Tumaoti a le tatou Malo o lo o nafa ma tiute ma faiva ua

totofi i ai latou e latou te tuuina mai ni fautuaga lelei ma le talafeagai aua lava le tapenaga o le lotoifale ma faamoemoega uma a le tatou Malo.

Ou te faatalofa foi i le tapuaiga a Samoa o lo o faapea ona maua mai lenei fesootaiga i luga o peau ma galugalu o le ea o Samoa o lo o tapuai mamao mai i Samoa nei ma so o se tafa o le lalolagi.

E le faagaloina le tapuaiga a si ou itumalo o Palauli 1 i la outou foi tapuaiga tatalo a o alo la outou sui usufono e tusa ai foi o tofiga na outou filifila ai foi lou auauna faatauvaa.

Ia e tulai ma le agaga faaaloalo ona o le Lipoti o le tatou Tala Faaopoopo Autu o le Tupe o lea ua faapena ona tofu saunoa ai foi ma e momoli le agaga faafetai ma faaleoina le agaga o le faafetai i le afioga i le Minisita o Tupe. O i tua atu i le Minisita o Tupe o lo o galulue mai ai le Ofisa Sili o Pulega o le Matagaluega o Tupe ma le Matagaluega. Ua faamalo le galulue ma e talia aloaia le tatou Tala o le Tupe, e talitonu e le faigofie atonu aua sa ou tulai mai ai foi, ia o le taua ia o tomai ma agavaa ua mafai ai ona tuufaatasi. Faafetai i le afioga i le Taitaifono o le tatou Komiti o Tupe e tusa ai foi o le tapenaga o le tatou Lipoti.

Ua fa nei o masina talu ona ou tulai mai i le Matagaluega lenei. O le Matagaluega lenei e taua o le Matagaluega o Tina ma Tamaitai, Atinae o Afioaga ma Agafesootai, o lo o lafi i totolu o le Matagaluega lenei ia tupulaga talavou, o lo o i ai i totolu o le Matagaluega lenei e o lo o i ai manaoga tumau o le soifua. O lo o i totolu foi o le Matagaluega lenei luitau ma social issues ma vaega uma o luitau o le soifuaga. O lona uiga e lautele le vaai ma tiute ma matafaioi a le tatou Matagaluega o Tina ma Tamaitai, Atinae o Afioaga ma Agafesootai. O lea ua faaopoopo mai ma le tatou atinae o le miliona tala. O lea e maitau atu o lea foi ua sausaunoa afioga i sui usufono o le Maota i le taua o pulega a alii ma faipule, o lea e taoto i totolu o le tatou Matagaluega lenei.

Ae ou te fia faatepa le tatou Maota o le Palemene ma toe faamanatu le sini autu o le tatou taiala o le lumanaia manuia o Samoa, ma e talitonu foi o le sini autu lea o le tatou atinae o le miliona tala. E fai mai ia faaagavaaina alaalfaga faamausali le lotoifale ma faamaite le faatupulaia o le tamaoaiga. Mausali. O le taua ia o veape ia e i ai i totolu, faaagavaaina, faaagavaaina ia i ai ni agavaa e le o maua i tua i nuu ma alaalfaga ia e tatau ona i ai faamaite nei.

Ia faamausali le lotoifale ma faamaite le faatupulaia o le tamaoaiga. E talitonu le Maota o le Palemene ma lau afioga i le Fofoga Fetelai, o le anofale lea o le tatou atinae o itumalo. O lea e maitau atu e lua a ni vaega tetele i lau ia maitau sa sausaunoa ai le Maota o le Palemene ma afioga i sui usufono. Muamua e agai i le tatou atinae o le miliona tala lona lua o Sui o Nuu, Sui Tamaitai ma Sui o le Malo. E faaleoina le agaga faafetai i lau afioga i le Fofoga Fetelai, ona o le avanoa faauro na maua ai se paganoa e tuumuli atu ai le tatou Palemene i le Ofisa o le Fono ma faatino se Semina. O le laolao lea sa tatala ai ni fingalo sa tuu atu ai le avanoa i afioga i sui usufono po o afioga i Taitaifono o tatou Fono Faavae se i tatala le avei se i o tatou faasoa. Avatu aumai a o lo o silamaimoa ma silafaafofoga le Komiti galulue o e o lo o latou lufilufiina ma faataatia alafua ma taiala aua le faatinoga o le tatou Poloketi. E tele ni vaeaga taua o le tatou Poloketi na tatou faasoa i luitau, o luitau muamua lava ia e ao ona ou faasoa atu. E so o se mea fou lava e i ai ona luitau e le 100% foi lona atoatoa ae o le

tatou savalivali i luma tatou te iloa ai luitau, ma tatou aooga mai ai. A o le faamoemoega o lenei atinae e faamoemoe i afioga i sui usufono, e faamoemoe i Taitaifono o Fono Faavae o le faamoemoega lena. O lona uiga e taua ia o le tulai mai o le sui usufono e na te taitaiina. Aua a fesili le Fono Faavae e tali le sui usufono. E faapefea ona tali le sui usufono? Ona ua ia malamalama i taiala ma faiga faavae o le tatou atinae. O lona uiga e le na o le tofi Taitaifono. O oe o le faifeau a sulu mai lou itumalo po o lau Fono Faavae i ni vaega e manaomia ai le fesoasoani a le sui usufono, ia faaaoga lou pulou faa-faifeau. O oe foi o le faiaoga. Aisea? O le atinae lenei o le tele ia o tagata o tatou itumalo e le malamalama, ae o le taua ia o le tiute ma le matafaioi lea a le sui usufono ou te faaoooloomaau atu ai, o le taua ia o le malamalama i taiala.

Aua o i ina a malamalama le tatou itumalo, a malamalama le Fono Faavae, a malamalama loomatutua ma toeaiina la e nonofo mai aemaise o faifeau, e talitonu o le omai lena e opogi le faamoemoe. E le o tuufaatalaloa le tatou atinae e sefulu lava vaega ua maioio atu. Atonu foi o le taimi lenei o lo o faagasolo le galuega a le Komiti galulue. Aisea? O lea ua faasolo ina maea le tatou miliona muamua ua maea le tatou \$200,000 o lea lava sa faatotoga ai le tatou fale fauina le Ofisa, faafaigaluega tagata e toatolu ma isi vaega o le Fono Faavae. Ua tatou me'i mai i le \$51 miliona muamua. Mo le silafia, atonu pe toe \$4 miliona i le \$3 miliona lea e totoe, ae o le taua ae tatou te le i savalivali atu i le isi \$51 miliona lona lua, e taua lava lou silasila ifo lava oe le Taitaifono o le Fono Faavae po o lau afioga i le sui usufono o le itumalo. Ia e silasila ifo i taiala ma vaega o lo o faavae ai le faatinoga o lenei foi atinae, ne i te i ua tatou tele i... ma tatou tilotilo i faafitauli o le atinae lenei, ae tele foi ia o ona vaega lelei aua o se mea foi e le i tupu muamua.

O le taua o le atinae lenei ma ona itu lelei, aua tatou te tilotilo, o le tele lava o tapenaga ma faamoemoega a le Malo sa sau ai i taimi talu ai, ia e pei lava e ogatotonu lava le tatou taulaga o Apia. Ia ae pei o le taua po o le message taua o lea e momoli atu i le atinae lenei, ia faamatuu atu i tua, talatala atu i tua, vaai tiute ma matafaioi a Matagaluega taitasi e talatala i tua. Aisea? Tuu le faatuatuaga i tua i nuu ma alaalafaga ma iloa ai o a tomai la e i ai i totonus o tatou itumalo, ia faaaoga o tatou itumalo ia, faaaoga le tomai lena o lo o i ai i totonus o tatou itumalo e faagalueaiina ai le tatou atinae.

Ia o isi vaega o lea ua maua ai isi pisinisi. A maitau i le faataatiaga o le tatou miliona muamua i le \$51 miliona, e \$17 miliona ua faamatuu atu i tulaga tau faatoaga ma faiga faiva. E le faapea la e avatu ave i o i le afioga i le Minisita o Faatoaga, e leai. Atonu o lea lava sa outou silasila i ai i le tele o tatou atinae ma itumalo sa faatau tatou mea tau faatoaga. Ia, o lo o alu i totonus o tatou pisinisi o le tatou Private Sector. O lona uiga o la e lava e toe taamilo mai le tupe. O la e foi e empower ai foi le tele o le tatou Private Sector i le vaega lenei.

E \$10.2 miliona o lo o alu i tulaga tau aoaoga. Lau Afioga i le Minisita o Aoga, i lau vaaiga i le Paketi e \$17 i le \$18 miliona le tupe e faaagaaga i aoga. O lea ua i ai ma le top up lea, o lea ua avatu e \$10.2 miliona o lea ua fesoasoani e le gata i le totogiina o pili a alo ma fanau i totonus o le Iunivesite Aoao o Samoa, o le USP, ia ma isi vaega uma. Aisea? O faamuamua na tuuina mai e a tatou Itumalo ma o le taua lea ma le matagofie o le atinae lenei. E le o toe o atu le

Malo fai atu i lea itumalo, vaai le mea lea e ave i ai le \$1 miliona. Leai, o lo o tuu atu lava le faitalia, le tofa ma le faautaga, soalaupulega a le itumalo ma lea itumalo, o a faafitauli ogaoga, o a luitau o le soifuaga o lo o feagai ma lea itumalo, o i ina e ave i ai le faataua.

\$10.2 miliona lau Afioga i le Minisita o le Soifua Maloloina, o lea ua toe avatu. Aisea? O le taua lea, o lea lava e tatou te tapisa e faataua aoaoga, tapisa e faataua le soifua maloloina, a lea ua gagana mai tatou Itumalo, lea e atagia i le tatou fuainumera lea le tatou \$51 miliona muamua. Soifua manuia - \$5.1 miliona. O le atinaeina o tatou Turisi, vaega ua tele ina vaoa i le tele o nuu ma alaalafaga, o historical sites e faalauiloa ai lea nuu ma lea nuu ma lea nuu. A lea ua toe fafagu mai aua e le i tupu muamua.

Ia, o tulaga tau taaloga. O le taua lea lau Afioga i le Fofoga Fetalai ma le paia o le tatou Maota e tau faaata atu le tatou \$51 miliona muamua. E leai se meafou e atoatoa ma selau pasene lona faatinoga. E momoli atu ai foi malu i puega i le tatou Maota o le Palemene atonu o le tele lava o outou tou te valaau mai, ia lau Afioga i le Minisita se ua tuai tele na faamatuu mai. Ae manatua foi e le tuu faatalaloa ia le faatinoga. E uma ona faatino le galuega lenei toe ave e toe fai mai saililiga a le tatou Suetusi. O lona uiga a sese tatou i le amataga, e faailoga fesili le toe tuuina mai o le isi \$51 miliona.

O le tatou talatalanoaga la lea sa fai ma le tatou Semina ma finagalo ma manatu ia sa folasia mai i le Maota lea ma ou faalogologo lelei atu, o le taua ia. E taua e tapena ai lo matou sa aua le isi \$51 miliona lea, toe a o se aga tatou laa atu i ai.

O le vaiaso lea ma le vaiaso lenei o lo o faagasolo ai faatalatalanoaga. Ia manatua foi e i ai faamuamua a tatou Itumalo e le o mafai ona aiga i totonu o le tatou manual o lo o i.... le tatou taiala o lo o iai i le taimi lenei. O le auga la o le faatalatalanoaga lea ma tatou Itumalo ma tatou Fono Faavae, ia e faasoa. Aisea? E aumai le tofa, aoao mai finagalo ma manatu tuufaatasi e le matou Komiti galulue ona omai laia tau faaaiga agai... ma faatino galuega ina ia mafai ona gafataulimaina ma ia tali manaoga o lo o aumai ai ia manaoga o tatou Itumalo eseese.

Afioga Aliimalemanu Moti Momoemausu Alofa Tuuau (Sui Usufono Tamaitai – Alataua Sisifo): Lau Afioga i le Fofoga Fetalai pe maua se avanoa...

FOFOGA FETALAI: Saunoa lau Afioga i le sui usufono mamalu.

Afioga Aliimalemanu Moti Momoemausu Alofa Tuuau: Ia sao lelei lau Afioga...

FOFOGA FETALAI: O tatou lava ia tatou te o i... e a lau Afioga i le Minisita pe sa maua se saunoaga a le sui usufono mamalu?

Afioga Aliimalemanu Moti Momoemausu Alofa Tuuau: Lau Afioga o le fesili o le mea e fiamalamalama, ou te le i lauga ae o le fesili ou te fia

malamalama semeamanu lea e saunoa le Afioga i le Minisita. Aua ou te talitonu e mafai ona fesili e faamalamalama pe afai e saunoa le Afioga i le Minisita. Leai o lau fesili...

FOFOGA FETALAI: Se i... Alaala mai lalo se i... Lau Afioga i le Minisita.

Susuga Hon MULIPOLA ANAROSA ALE MOLIOO: Lau Afioga i le Fofoga Fatalai, e leai e le i i ai se fesili a le Afioga i le sui usufono agai i le matou Matagaluega.

FOFOGA FETALAI: Ia o le agaga lena lau Afioga i le sui usufono mamalu, o tatou lava e tatou te o i tatou Tulafono. E le mafai foi ona soona tuu atua se avanoa e toe lagalaga ai foi e se isi ma faaumiumi ai le tatou taimi. Ia a o lea ua...

Afioga Aliimalemanu Moti Momoemusu Alofa Tuuau: E sao lelei lau Afioga e leai so matou avanoa aua o matou e i le Komiti o Tupu. Ia ae pei o lea o lau fesili i le saunoaga lea e saunoa ai nei le Afioga i le Minisita ona o lana saunoaga lea sa fai ai le tatou aoga i le vайасо na te'a nei, a o lea ua toe fai mai foi, ae pe le agai sao loa i ni mataupu na laga e sui usufono o le Maota lenei. E pei o le mea lena ua ala ai ona ou tulai ma le faaaloalo.

FOFOGA FETALAI: Oi, ia e ese foi le tulimanu lea e ui mai ai le sui usufono lea. Ia lau Afioga i le Minisita ia...

Susuga Hon MULIPOLA ANAROSA ALE MOLIOO: Faafetai i le Afioga i le sui usufono. E leai e taua a le faamanino atu aua e moni lava o le Semina a o lea lava sa agiga i le amataga le tele foi o fesili agai i le tatou miliona. E oo foi i tua i o pe a malolo lau Afioga i le Fofoga Fatalai, se ta te le malolo e le mafai ona ta... ona o le... e soso mai pea tatou sui usufono e talosaga mai. Ae pei o le taua, o le faamalamalama atu o vaega uma ia, ae a leai ia o le a ou se'e ese ona e taua vaega ia pei ona saunoa ai foi nisi o sui usufono.

FOFOGA FETALAI: Ioe.

Susuga Hon MULIPOLA ANAROSA ALE MOLIOO: Ae ou te le i see ese ma le vaega lea, sa ou faailoa i le tulaga lava lea i le Matagaluega o Tina ma Tamaitai. E le toe po malae i le sailigamalo a le tatou Miss Global, ona o tamaitai sailimalo. O lea e faaleoina ai le agaga o le faafetai. Ona aisea? O nisi o tamaitai sa faalauiolina Samoa i le Lalolagi atoa....

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fatalai...

FOFOGA FETALAI: Malie lau Afioga i le Minisita e le o... o le a le mea ua faauilavea ai lau Afioga i le Taitai o le Itu Agai?

Susuga Hon Tuilaepa Fatialofa Auelua Sailele Malielegaoi: O le mataupu lea o le mataupu taua tele i le tai miliona lea. Ae ui lava sa fia saunoa nisi ae ua e taofia ona faapea sa fai le tatou feiloaiga, ae taua tele le mataupu lenei. O le ala lena na ala ai ona le oo i ai ni manatu ona ua e tapu maia matou, ae tele a mea sa fia agai i ai ona e taua tele. Pei lava ona e silafia e na o le tasi a le sui usufono o le Maota lenei na fiafia i le mea lea o lo o i ai a o isi sui usufono uma lava o le latou tatalo lea e faavavevave mai le latou seleni ua uma ona ioeina.

E pei la o le mea lena e taua i le faafogafoga mai a itumalo, ua ala ai ona le oo i ai se leo ona ua e tapu maia matou ona faapea o lea ua uma ona maua le avanoa a o la e fia faalogologo itumalo.

FOFOGA FETALAI: Ia, o lea ua maua lou finagalo. Ae, ia o mea foi... ia o tatou sa faapena lava ona maua le avanoa ma le Komiti galulue o i ina e i ai le atoatoa o mea uma. O lea sa i ai le agaga o le Nofoa ua matua malamalama lava lenei mea. Ia lau Afioga i le Minisita, se i tulai mai.

Susuga Hon Tuilaepa Fatialofa Auelua Sailele Malielegaoi: Lau Afioga, se i toe fai atu lava le isi au tala mulimuli lea faamolemole.

FOFOGA FETALAI: Leai, o le a se isi mea?

Susuga Hon Tuilaepa Fatialofa Auelua Sailele Malielegaoi: Pau lava le itu taua, ia faafogafoga mai Itumalo na laga uma lava e tatou sa i ai le agaga lea o le fautuaina o le Komiti ina ia taumafai e faavavevave ma silasila i a latou fuafuaga fai. E faavavevave ona tatala mai seleni a Itumalo, o le itu taua lena.

FOFOGA FETALAI: Ia lea ua maua, lea ua maua. Ia lau Afioga i le Minisita a e finagalo i ai ia aumaia lena mataupu ina ia faamanino atili.

Susuga Hon MULIPOLA ANAROSA ALE MOLIOO: Faafetai i lau Afioga i le Fofoga Fatalai.

FOFOGA FETALAI: Ua uma ona e saunoa i ai ae faamanino atili maia.

Susuga Hon MULIPOLA ANAROSA ALE MOLIOO: Ia, ne i te i ua galo i le tatou Maota o le Palemene na tuai ona oo mai le tatou Faigamalo, tolu masina faatoa table le tatou Tala o le Tupe i le aso 14 o Setema. Ne i te i ua galo ae toe faamanatu atu. Ae aua tou te popole, e maea le tatou Semina ia e faatino i le taimi lenei i Savaii foi mai le tatou Working Group po o le tatou Komiti galulue tuufaatasi le lipoti, vaisaso fou fono le tatou Komiti. O lea e aumai le update e 16 tatou Itumalo ua maea ona tuuina mai tatou lipoti o le miliona. O lona uiga o i ina o le a fai i ai le faasoa foi ma le faatinoga o le faaiuga a le tatou Komiti a o lea ua uma ona ma talanoa ma le Afioga i le Minisita o Tupe o lea foi ua i ai lona finagalo e faamatuu loa le tatou \$160,000.00. Ua uma ona aumai foi le ioega i luga i le tatou Kapaneta, e pei o vaega ia ae aua tou te popole.

E le gata i lea, a lelei lava outou i le tatou \$160,000 lena ia ua toe faamatuu atu ma le isi tatou \$420,000 i le Taitaifono e mulimilitai i taiala ma faiga faavae aemaise ai foi o le tatou aufaigaluega galulue. O lo o avanoa le tatou Matagaluega o Tina ma Tamaitai, a manaomia se fesoasoani fesootai mai aua e taua le vaega lea.

Afioga Aiono Tile Gafa (Aana 1): Lau Afioga i le Fofoga Fetalai pe maua se avanoa faamolemole.

FOFOGA FETALAI: Malie lau Afioga i le Minisita, tasi lenei sui usufono matua o le Maota. Ia se i tulai mai lau Afioga i le sui usufono mamalu mo Aana Alofi 2.

Afioga Aiono Tile Gafa: Faafetai lava i lau Afioga i le Fofoga Fetalai. E leai foi se manatu e sii le se tala i lenei vaega o le tatou galuega i le saunoaga matagofie a lau Afioga i le Minisita. O lea ua manaia lava le gasologa o lau saunoaga peitai o lea ua ou faalogologo atu i le tulaga o faiga faavae ma taiala. Manaia le tatou Semina, saunoa malamalama ma manino lau Afioga aemaise foi finagalo sa faaalia o tatou sui usufono.

I lau faalogologo i ai ma lau maitau, o le ala foi lea sa augata ai se manatu, tusa toeitiiti lava sui usufono uma o le Palestine, manino foi lau saunoaga o le tasi lea faafitauli tele lea o lo o i ai i le tatou Poloketi. E leai ma se Itumalo e le o atoatoa ona savalia ma atoatoa le faataunuuina o faiga faavae ma tulaga faapena o le tatou Poloketi. Ia ona ou mafaufau lava lea i lou lava sui usufono ma si o matou itumalo o lo o taumafai pea ma faatalitali e tusa ma a tatou upu ma tala. O lona uiga, o lea lava e solitulafono uma lava Itumalo, ae aisea lava ua tusitusilima ai i lo matou Itumalo. Ioe, o lea lava na ou... o upu foi e masani ai, o le agasala lava o le agasala. Ioe, o le a lava le ituaiga sese o lena lava, pe laitiiti le solitulafono ma le soli Faavae ma a nisi mea, o le mea lava e tasi. O le ala lena i le taumafai atu, o lea o le a tatou agai atu i lenei tausaga ma nisi o faamoemoega tetele o le atunu. Ioe, e pei lava ona ou talanoa atu o le galuega e faifaatasi. Afai foi o le a sa outou matau mai lau Afioga i le Minisita ma le Komiti i lenei Itumalo, o le agaga lena, leaga o matou foi o isi Itumalo faiatauina o le atunu ma le Palestine lenei. Afai foi tou te silasila i se tasi itu, ia e le o mafai ona matou tuua i lalo le lagolago aua le tatou Faigamalo o lea lava e taumafai atu, Ioe. Ae pei lava ona fai atu sa matou upu ma sa matou tala i lau Afioga i le Tamaitai Minisita po o le Taitaifono o le Komiti e le mafai ona matou solaese ma tulaga o le tausiga o tatou itumalo aua nuu ma afioaga. E taumafai lava e tauave ina ia tausi le mamalu o le vafeagai lena o le tatou vanonofo.

FOFOGA FETALAI: Faafetai o lea ua maua le finagalo o le sui usufono mamalu, faafetai.

Afioga Aiono Tile Gafa: Ioe, ae tatalo atu faapena, ia taatia atu. Faafetai i lau Afioga i le Fofoga Fetalai.

FOFOGA FETALAI: Faafetai, ia mo le faasaoina o lau Afioga i le Minisita, se i tulai mai Vaimauga 1.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e momoli le agaga faafetai i lau Afioga i le Minisita o Tina ma Tamaitai. Se ua ligoligo a lou siufoga i lenei taeao e fia faalologologo lava le Vaimauga i le tagitagi o lou siufoga. E momoli le agaga faafetai, o lea foi ua maua e lenei itumalo ua filifilia se tasi e faauluulu i ai lau Matagaluega. E momoli le agaga faafetai i le faatumuina foi o lena avanoa, o ou mama na, aemaise foi le tamaitai po o ai foi o le a agai mai totonu o le Matagaluega. Ia agalelei le Atua i tofiga aua a umi ona leai se Ofisa Sili o Pulega o se Matagaluega, ia e faapena.

Ae o le sui usufono lenei o Vaimauga na muamua lauga ai i le aso lena i le taeao na fai ai le tatou fono e le i faia le Semina. Na uma loa ona lauga le Vaimauga faatoa o atu loa faatoa fai le Semina. Sa avatu ai le tuualalo ina ia faanatinati ona faamatuu mai tatou seleni. O le Tala o le Tupu Autu lea na i ai, o lea na aumai uma ai lava, o lea ua toe... masalo pe toe fa pe toe lima masina uma lenei financial year, a o lea lava e le i maitau ua faamatuu mai.

O le popolega foi lea na avatu ai le talosaga i lenei Maota lau Afioga i le Tamaitai Minisita pe le mafai ona faama... i le tulaga lea i le staff foi lea e toatolu i lalo o le Matagaluega, ona o le popolega lena, e le natia lava, o le aufaigaluega lea e galulue lava i le tupe lea e fuafua atu e avatu e le tatou Malo, ae le gata foi i lea o alauni o nai sui usufono ia na fai atu, pe le mafai ona aumai totonu o le paketi a lau Matagaluega ina ia aua ne i i ai se tulaga foi lea e natia ai pe noatia ai ni tulaga, o latou foi o lo o fai foi latou nonogatupe ma tulaga faapena. Ae a tuai la ona alu atu le seleni lea e \$160,000 lea ua i ai, ia ua lape ai lena auaunaga.

Lua o vaega sa avatu ai foi le talosaga ina ia mafai ona... aua ne i toe hire ina e itumalo okika se i tulou ona e totogi foi e eseese uma lava tau o e agavaa e sue ai tusi. Ia pei e tau faapena le lagona, ae faaaoga le okika a le tatou Malo po o le Treasury foi e faapena le tulaga lea foi sa avatu ai. A o le agaga lava ia o lenei itumalo, e leai o lea sa manaia lava le galueaiina lea sa maua ai le tatou miliona i le tausaga lea ua tuanai. E le o galo i lenei itumalo lau saunoaga faatoa omai totonu le tatou faigamalo, e sao lelei. O lea faatoa aumai i totonu na o le \$200,000 e le i atoa se miliona i le aumaiga muamua lena. E pei o lea foi e faatalitali lava i lena. Ae pei o le agaga lena na avatu ai se agaga, ina ia mafai ona vave mai i tua le \$160,000 e pay ai le toatolu lea, ma maua ai nai alauni o le Fono Faavae.

Ia pei o le agaga lena lau Afioga i le Fofoga Fetalai e tuuina atu ai i lau Afioga i le Tamaitai Minisita.

FOFOGA FETALAI: Ia o lea ua maua le finagalo o le sui usufono mamalu, o lea foi faatoa maea ona tulei mai le Minisita ma faamalamalama mai le tulaga lea. Lau Afioga i le Minisita, se i toe faamalamalama mai pe afai e le i malamalama le sui usufono.

Afioga Masinalupe Makesi Masinalupe (Lefaga ma Faleaseela): Lau Afioga i le Fofoga Fatalai...

FOFOGA FETALAI: Malie lau Afioga i le Minisita se i...

Afioga Masinalupe Makesi Masinalupe: Mo le faasaoina o le saunoaga a le...

FOFOGA FETALAI: O le Komiti Tupe po o le...

Afioga Masinalupe Makesi Masinalupe: E leai, o le lagolago i le tulaga lea...

FOFOGA FETALAI: O sau fautuaga faa-Komiti Tupe aua o lea e le o i ai lou suafa i totonu o le mea lea.

Afioga Masinalupe Makesi Masinalupe: O le fautuaga faafetai.

FOFOGA FETALAI: Ia se i saunoa.

Afioga Masinalupe Makesi Masinalupe: Faafetai mo le avanoa i lau Afioga i le Fofoga Fatalai. Ua laga se leo ona o le Semina lea o le taua ia, lea sa faaalia ai lagona, lea foi sa faaali ai foi le finagalo o lau Afioga i le Fofoga Fatalai. Ae pei e foliga o le mataupu lava lea sa ou laga, e \$160,000 e faamatuu, o lea la ua maua atu, e momoli ai le faafetai tele lava. O lea ua faafogoa mai foi si o matou itumalo, o lea o le a avatu le \$160,000 e amata ai galuega. Ma le faaaloalo lava. Faafetai.

FOFOGA FETALAI: Malo faafetai. Ia aua o lea lava ua manino le saunoaga a le Minisita, ua sauni foi le Minisita o Tupe e tuuina atu. Ia o le a la le isi mea i tala atu?

Lau Afioga i le Minisita mo Tina ma Tamaitai ia se i...

Afioga Hon MULIPOLA ANAROSA ALE MOLIOO: E talitonu o lena ua faamanino atu tali o a outou fesili. \$160,000 maea i le vaiaso nei le tatou galuega o lo o galulue ai le tatou Komiti galulue e faamaea le Lipoti, vaiaso fou faatino le feiloaiga ona faamatuu atu loa lea. Vaai tatou itumalo nei, aua o le taimi nei e 16 tatou itumalo o lea ua maea ona tuuina mai le Lipoti, ae vaai le isi vaega lena e faatopetope mai. E fai foi o le tou talosaga mai e faatopetope atu matou, ae fai foi sina tuai o le gaoioi mai o afioga i Taitaifono ma tatou Fono Faavae.

Ia, o le afioga i le sui usufono mo Aana 2, o lea lava sa tatou feiloai.

FOFOGA FETALAI: Malie lau Afioga i le Minisita o lea e tulai mai le Igoamatua ia Ale, o Faleata 4. E i ai se isi mea o le miliona?

Afioga Hon MULIPOLA ANAROSA ALE MOLIOO: A lea ou te le i oo atu i lau Sui o le Nuu ma le Sui Tamaitai...

Tofa Ale Vena Ale: Leai o le miliona lea ou te fai atu ai lau Afioga.

Afioga Hon MULIPOLA ANAROSA ALE MOLIOO: Ia saunoa mai.

Tofa Ale Vena Ale: Leai o lau fesili; o lea e aumai muamua le \$160,000. O le a le mea e le ala ai ona aumai ai faatasi le \$160,000 ma le \$425,000 o lea ua i totonu a matou Report? Why? O le a le mea e ala ai ona... Leai e direct question a. Ia manuia lau Afioga.

FOFOGA FETALAI: Se i tulai mai lau Afioga i le Minisita. E ese foi le vavevave o le... ia tulai mai lau Afioga i le Minisita.

Afioga Hon MULIPOLA ANAROSA ALE MOLIOO: Ia na o fesili e taitasi upu ae o le malolosi ia o.... Ae taua, e taua lava le tou fautua mai, ae o lea lava e saunoa foi le Afioga i le sui usufono a Vaimauga 1, Sulamanaia i le tulaga lava lea o le toe faafao mai o le totogiina o tatou tagata faigaluega i le Matagaluega. E toe faamanatu i le tatou Maota o le Palemene ma Afioga i sui usufono, o le faamaite lenei e taumafai e siitia ai tomai ma agavaa o tatou nuu ma alaalaafaga. Ne i te i la ua e vave manao lau Afioga e toe tuu mai le tiute ma le matafaioi lena a o lea e i ai tomai. Ne i te i ua faateia oe i le miliona muamua ma le \$200,000 a o la e ua tapena mai ma sauni mai tamafanau o le itumalo. O le vaaiga lautele lena o le tatou atinae lenei, ia aua ne i atinae le tomai na o i i le taulaga, atiae le tomai ia tutusa le tomai e maua i totonu o le taulaga ma nuu i tua. Aisea? Sa ou malaga i lau malaga lea i Korea, sa ma feiloi ai ma se tasi foi o Minisita o Tupe. Sa ma talatalanoa ai ma faasoa mai ma ou fesili i ai, o a vaaiga e mafai ai ona fua se atunu manuia? O le faasoa mai a lea Minisita o Tupe, e fua le lelei ma le manuia o lea atunu ma lea atunu ina ua tutusa le tamaoaiga e maua i totonu o le taulaga ma le tamaoaiga e maua e le loomatua ma le talavou la e i nuu i tua. O i ina lea e i ai le faamaite lea.

Lau Afioga i le Fofoga Fetalai, atonu o le atoaga lena o le feau lea e tau molimoli atu ne i te i ua tatou te ite i gofie ma tatou faapea, leai, e tatau ona toe foi le atinae lenei agai le Malo. Ae pei o le vaaiga lautele ma le vaaiga mamao lena ia tapue tiute ma taleni ma agavaa a tatou tagata o lo o i tua i nuu ma alaalaafaga. Aisea? Aua a i ai le tomai, maua nisi pisinisi, faatomaiina faaagavaaina, tele lo latou sao e toe fesoasoani mai ai i le atiaeina aemaise o le paketi a le Afioga i le Minisita o Tupe.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai...

FOFOGA FETALAI: E i ai se isi mea? Ou te ofo i le le faamalieina o lou finagalo.

Afioga Sulamanaia Fetaiai Tauiliili Tuivasa: Ioe. Ona o lea ua saunoa mai le Afioga i le Tamaitai Minisita po o le Afioga i le augafaapae foi o le Maota pei e aumai lenei sui usufono ona o le tulaga lea sa ou talosaga i ai pe mafai ona aumai lalo o le Matagaluega ona o le tuai. A o lea la ua saunoa manino le Afioga i le Tamaitai Minisita, na ala ona ou talosaga ina ia aumai i totonu, o le tuai o le process e umi ai ona faatali. Ae o le agaga foi sa naunau ai e aumai totogi ia, leaga e le atoa ai le miliona. Aua e alu atoa lava le \$160,000 lea i totogi o le aufaigaluega ma le totogi o okika ua sioki ai la le miliona lea na folafola. A o lea la ua manino na ou musumusu atu i le Minisita o Tupe pe vave mai, a o la e lulu le ulu. O lona uiga... E pei o le agaga. A o lenei taeao, ia ua ligoligo lava le siufofoga. O le mea lea e lelei ai le sa avea ma Minisita o Tupe, o la e afio i fafo ma aumai le fuafuaga ina ia faapena ona lagolagosua ai i le paketi a le tatou atunu.

Ia o le agaga lena i lau Afioga i le Fofoga Fetalai e momoli ai le agaga faafetai i le Afioga i le...

FOFOGA FETALAI: Malo faafetai. Se i tulai mai lau Afioga i le Minisita mo Faatoaga.

Susuga Hon Laauli Leuatea Polataivao Fosi: Lau Afioga i le Fofoga Fetalai, o si mea laitiiti lava lea leaga ua le tasi ua le lua sui usufono ua saunoa i ai, o le mea lea o le \$200,000 lea sa faaagaaga i le amataga e atoa i ai le miliona a le itumalo atoa. Tau lava ina ou faamanatu sui usufono, o le \$200,000 e le o alu i se isi mea, e alu i le totogiina o tagata o le itumalo. E alu i le totogiina o tamafanau a le itumalo o la e i totonu o le itumalo. O tupe uma lava la o le \$200,000 e alu i le itumalo e le o alu i se isi mea. O lona uiga, o le miliona atoa, o la e i totonu o le atiaeina o le itumalo. Ne i te i ua maitau mai ma faaoloataua le faafofoga a Samoa, e le o atoa le miliona e atiae ai le itumalo. Sui usufono mamalu, o le \$200,000 o la e alu i totonu o le itumalo.

O le faamalamalamaga lena leaga ua fetosoaina solo, ua oo lava i upega o faamatalaga lea e tau ai le mea lea, e le o atoa, e le o atoa. Ae ua ou fesoasoani atu i le Minisita leaga e tele le au faasalavei tala.

FOFOGA FETALAI: Ia, ua manatu foi le Nofoa o lea ua faamalieina le tulaga lea i saunoaga foi a le Minisita aemaise foi sui usufono mamalu ina ia faapena ona tatou mulimulitai pea i saunoaga ua opea i le Maota.

O le mea lea, se i tulai mai lau Afioga i le Minisita e faaaauau mai lau saunoaga.

Afioga Hon MULIPOLA ANAROSA ALE MOLIOO: Ia, e talitonu ua uma ia tala i le tatou miliona. O lea o lo o maua avanoa a tatou itumalo e faatalatalanoa ai. Ae pei lava ona faailo foi i le amataga, o lo o avanoa le tatou Komiti galulue, o lo o avanoa le tatou Matagaluega o Tina ma Tamaitai e mafai ona fesootai mai ai ina ia mafai ona faatino i le malamalamaaga le faatinoga o le tatou poloketi, aemaise foi tiute ma matafaioi.

Se i ou see atu i Sui o Nuu ma Sui Tamaitai. O le isi vaega lea na tele ina saunoa ai foi Afioga i sui usufono o le Maota. O le update na aumai e le

Matagaluega ia te au, o le aofaiga o Sui o Nuu ma Sui Tamaitai ma Sui o le Malo, o lo o taatia nei e ova atu i le 500. E i ai alafua. A faapea o se nuu mavae e i ai lona faalupega, e mafai foi lea ona i ai lona Sui o le Nuu ma le Sui Tamaitai. Ia o lea ua maitau atu, ua i ai nuu ua mananao lava, a faapea e 6 pitonuu, ia ua faatino foi e tatau ona 6 Sui o le Nuu ma Sui Tamaitai. O lea ua omai le tatou faigamalo o lea lava ua ave le faamuamua i le tatou miliona. O lea ua i ai le tatou Fono Faavae, ae maitau atu, e le o muta lava le talosaga pea i Sui o Nuu ma Sui Tamaitai. Ia, ou te faaeteete ona ua i ai le Tulafono, ae taua pea le faatepa o le tatou Maota o le Palemene aemaise foi Afioga i sui usufono, a faapea o lea lava ua manao lava lea nuu e fai lona Sui o le Nuu ma le Sui Tamaitai, o lona uiga e faatuputeleina pea. A o lea foi ua outou silasila ma maitau mai, o lea ua i ai le tapenaga a le tatou Malo, o a uma auaunaga, auaunaga o le aoina o le lapisi, auaunaga o le faamamaina o le falemai, e auala atu i le faitotoa lea o le Fono Faavae.

E pei o vaega ia e taua lou faamanatu atu. E faamanatu atu ona a fefete le tatou Fono Faavae, fefete le tatou Sui o le Nuu ma le Sui Tamaitai, ia, talofa e i le Afioga i le Minisita o Tupe. O lona uiga, e taua tiute ma matafaioi a nuu ma Sui Tamaitai. E pei ona ou taua i le taimi o le tatou Semina, e i ai itumalo e le o laogolagoina e Sui o Nuu ma Sui Tamaitai Fono Faavae. O le tiute ma le matafaioi a le tatou Matagaluega o lo o faatino i le taimi lenei, se i faatulaga lava po o a tiute ma matafaioi a Sui o Nuu ma Sui Tamaitai. A o a foi tiute ma matafaioi a Fono Faavae ina ia aua ne i fesopoi. Ma o i ina foi e fua i ai le performance a le Sui o Nuu ma Sui Tamaitai, ona e taua le latou galuega. Ae pei o se feau lea e taumolimoli atu, ia o lea lava e maitau atu e i ai lava talosaga e manaomia Sui o Nuu ma Sui Tamaitai, e manaomia. O le a fefete? Ae o lea ua ave le tatou faamuamua i le tatou Fono Faavae. O lona uiga e taua le faamanatu atu. O lou ia maitau atu, o lo o taatia lava vaega o lo o patino ai tiute ma matafaioi a Sui o Nuu ma Sui Tamaitai. Ae pei o se feau lea e taumolimoli atu Afioga i sui usufono ma le paia o le tatou Maota, se i toe silasila ifo lava. Aua e pei o lau maitau atu, o lo o mananao uma lava tatou, aua e i ai foi nuu le mavae, o lea foi ua mananao e fai o latou Sui o Nuu ma Sui Tamaitai. A o le fesili, ia o aafiaga foi o le tatou paketi. Ae o le fesili o faatino ia tiute ma matafaioi e tatau ona faatino? E pei o le vaega lena e tau ona faailo atu aua o vaega uma ia o lo o taoto i lalo o le Matagaluega o Tina ma Tamaitai.

E i ai fesili sa tuuina mai i Sui o Nuu ma Sui Tamaitai Ale o lea lava sa e fesiligia. Ou te talosagaina lau afioga i le sui usufono e manaia lou oo atu i le tatou Matagaluega se i o tatou talanoa, ona e tele fetusiaiga agai i lau mataupu i le Sui o Nuu o Toamua ma Puipaa ia ou te talosagaina o le taua. Ia e le taua le avatu manino o se tali i le taimi lenei ae taua le ta faafesagai, tatou faasoa ma le Matagaluega ina ia avatu manino ai foi se fautuaga a le tatou Matagaluega...

FOFOGA FETALAI: Ia malie lau afioga i le Minisita e a e le i faamalieina lou finagalo?

Tofa Ale Vena Ale: Lau afioga i le Fofoga Fetalai, leai e manaia lava le faafogafoga mai pea o le matou itumalo. Faafetai i lau afioga i le Tamaitai

Minisita. O a taiala a lau Matagaluega i mataupu ia? E faigofie lava le mataupu pe a faapea e te tausisi i au taiala. O Toamua ma Puipaa e tasi le faiganuu, e tasi le Pulenuu e tasi le Sui Tamaitai. O lea ua manao mai nei o i le pitonuu la e i o i Puipaa... o le faalavelave o le tatou mataupu leaga o lena e aafia lau Matagaluega, e ese le advice la e aumai e lau Matagaluega. O le mea lena ou te fai atu ai e faasao mai le mea, a faapea e tasi ia tasi ae le faapea la e omai o aua o le mea na lea ou te popole ai, ia o le a le mea lea ua e saunoa i ai ia o lea o le a fefete le mea. Ioe. Ia na tele ai lea o isi tupe e alu ma fetotoai ai ma feesesesea'i ai ae tasi lava le faiganuu. Ae leaga o lau Matagaluega na e avatu i ai le talosaga ae fai i ai leai na e sao ia o e faasaini mai le sui usufono fai i ai ioe, o le sui usufono lenei e le faigofie. Faafetai lau afioga.

FOFOGA FETALAI: Ia o lea ua maua lou fingalo o lou lava finagalo ia tumau a faavae o le afioaga, ia o le...

Tofa Ale Vena Ale: Lau afioga i le Fofoga Fatalai mo le au i luma o le manuia o si o'u nuu ma si ou itumalo e tasi a le Sui Tamaitai e tasi le Pulenuu e tasi foi le pulega a nuu. Na taumafai nei foi e faalua nuu e le mafai e no can, ia manuia le tatou fono.

FOFOGA FETALAI: Ia ou te iloa foi lau afioga i le Minisita o lea ua tali mea foi sa finagalo i ai. Ia se i tulai mai lau afioga i le Minisita.

Susuga Hon MULIPOLA ANAROSA ALE MOLIOO: Faafetai i lau afioga i le Fofoga Fatalai o lea lava ua...

Afioga Auuapaau Mulipola Aloitafua Mulipola (Aiga i le Tai): Lau afioga i le Fofoga Fatalai pe maua se avanoa...

FOFOGA FETALAI: I le? O lea tau, ia se i tulai mai po o le mataupu a lea a Ale po o se isi mataupu.

Afioga Auuapaau Mulipola Aloitafua Mulipola: E leai leaga lea sa ou lauga e uiga i le Sui Tamaitai, Sui o le Nuu leaga lea ua ou vaai atu o le a faaiui le saunoaga matagofie a le Minisita...

FOFOGA FETALAI: Ia se i saunoa mai lau afioga i le Sui Fofoga Fatalai.

Afioga Auuapaau Mulipola Aloitafua Mulipola: O lau tuualalo o lea ou te maitau atu e pei o lea e tatalo lau afioga i le Minisita i le sui usufono o Faleata 4 e fia maua se lua... e faapena lau tuualalo lea na ou fai atu ona o lou motu i tai i Manono ma uta i si ou motu i nei o Upolu. E pei ona ou fai atu masalo po o ua sili laitiiti lava e o lo o alaala i le motu lenei o Upolu o lou itumalo aemaise ia Manono. O lau la tatalo pe mafai ona toe consider ane e toe faaopoopo le Sui Tamaitai ma le Sui o le Malo ona o la e manino a ma malamalamama le faalagiga o le Sui o le Nuu o nuu mavae ia ma le Sui Tamaitai o nuu mavae. A o le Sui la

o le Malo o lea e tau avatu ai sau talosaga mo uta i lou motu lea e i uta i nei Upolu. Afai la e maua se avanoa o le afioga i le sui usufono mo Faleata ia tuu atu la i ai ma au se i o ta fesootai ou te talanoa i le aofai o tagata o le itumalo. Ou te faataua la le aofaiga o tagata o le itumalo a o faiga faavae e taoto atu lava i lau afioga i le Minista. Ma le faaaloalo faafetai i lau afioga i le Fofoga Fetalai.

FOFOGA FETALAI: Ia faafetai. Se i tulai mai lau afioga i le Minisita o Tina ma Tamaitai.

Susuga Hon MULIPOLA ANAROSA ALE MOLIOO: Faafetai i lau afioga i le Fofoga Fetalai. O lau tuualalo i tatou afioga i sui usufono, o lea foi sa sausaunoa i a tatou Sui o Nuu ma Sui Tamaitai ia ou te avanoa i le vaiaso lea. Savalivali atu tatou talatalanoa ma fale le tatou mataupu, soalaupule ia ma taatia foi lou manaoga i le tulaga e tatau ona i ai, ona e fai foi sina ogaoga o nisi foi o vaega ma mataupu lava ia tau faalotoifale e taua le malamalama ai o le Matagaluega ma avatu ai foi lana fautuaga.

Lau afioga i le Fofoga Fetalai, ona pau ia o nisi o vaega sa avatu i ai le...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai pe maua se avanoa...

Susuga Hon MULIPOLA ANAROSA ALE MOLIOO: O lea foi ua tulai mai le afioga i le sui usufono o Falelatai, o le talosaga foi lena lau afioga i le sui usufono o lo o o'u avanoa i le vaiaso lea, ia tatou saofafai i lalo ma le tatou Matagaluega ona o lea foi oute faamaumaunuina lau talosaga sa tuuina mai e agai lava i a tatou Sui o Nuu ma Sui Tamaitai e pei o le taua lena e maioio ai vaega uma. Ma le faaaloalo.

FOFOGA FETALAI: Ia o lea ua saunoa manino le afioga i le Minisita ua fia feiloai mai lava i lau afioga i le sui usufono mamalu...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai, faafetai tele lava i le afioga i le Minisita. O le ala lena o lou tulai atu leaga o la e faafogafoga mai si ou itumalo po o fea ua ave i ai le talosaga na avatu. Ae o lea o le a saili atu se avanoa i lea vaiaso ta te feiloai ai.

FOFOGA FETALAI: Ia faafetai. Ia malo faafetai o lea ua matau atu o lea ua maea saunoa ia sui usufono, o lea foi ua uma na saunoa le afioga i le Minisita. Ua faafetai tele lava i lau afioga i le Minisita o lea ua maea ona e saunoa. Ia le Vaa o Fonoti e i ai le mea lea ou te tau vaai atu o lea e te tau... o le mea lea e le afaina leaga lea ou te vaai atu e le o momu mai lau moli. Ia se i faamaea mai le saunoaga a lau afioga i le Minisita.

Susuga Hon MULIPOLA ANAROSA ALE MOLIOO: Lau afioga i le Fofoga Fetalai, ae ou te le i nofo i lalo e toe avatu a se faamatalaga agai i a tatou tamaitai ona e faataua e le tatou Matagaluega lenei ia sailigamalo a tatou

tamaitai. Sa avea foi ma Ambassador i le agai atu i atunu i fafo e pei o lea foi sa auai Haylanni Kurupu, ia matou faafetai i lau sailigamalo na taua e 70 atunu sa auai, ia o lea lava sa ausia le 1st Runner Up ia o se vaega e faalauiloa ai le tatou atunu.

E tele vaegatupe o lo o i totolu o le tatou Ofisa o Turisi mo le tau faalauiloaina o Samoa ae o le galuega taua lea a se tasi foi o tatou tama fanau o le tamaitai foi o se fiafiaga tele lea i le matou Matagaluega o Tina ma Tamaitai ona o le sailigamalo a tatou alo ma fanau tamaitai. E momoli foi moomooga alofa ma tapenaga mo le tatou Miss Samoa ia Moemoana Schwenkie o lo o faatino lona faamoemoe i le faaiuga o lenei vaiaso. Ia tapena ma le fiafia ia faatasi atu le Atua e tusa ai foi o tapenaga.

Se i ou foi lava i lou itumalo lau afioga i le Fofoga Fetalai, ou te faafetaia le latou tapuaiga aemaise ai foi le tapuaiga a le Aiga Sa Mekisateko o lo o faapena ona faanonomanu aua le manuia o le tatou atunu. O ou aiga o lo o tapuai mai i atunu i fafo aemaise i Samoa nei faafetai mo la outou tapuaiga. La'u Matagaluega ia faafetai i le tatou, ia Mataia aemaise foi le tatou Pulega ma le Matagaluega o Tina ma Tamaitai faapea ai foi le tatou Faauluuluga o le tatou faamaumauga le SBS po o le Statistic, e taua le galuega foi o lo o galulue ai, aua tatou faamaumauga aua faamoemoega ma vaaiga taulai a le tatou Malo.

Ia manuteleina lau afioga i le Fofoga Fetalai, le paia o le tatou Maota soifua ma ia manuia.

FOFOGA FETALAI: Ua faamalo saunoa i lau afioga i le Minisita o Tina ma Tamaitai ia faapea foi Agafesootai, malo a le saunoa o le measili ona taua o lea ua faafogafoga foi sui usufono mamalu o le Maota sa laga nisi o mataupu aua lau Matagaluega. O lea ua e tali manino ia o lea foi ua tatala mai le avanoa e susu atu ai sui usufono mamalu e feiloai ma lau afioga ma le Matagaluega ona o nisi o itu taua ma talosaga. Ia malo faafetai.

Ia ua tatou oo mai i le Minisita o Pisini ma Alamanuia ia a o lau matau atu i le matou faamaumauga e le i i ai lava se sui usufono na laga pe fesiligia lau afioga, ae tuu atu pea le avanoa i lau afioga.

Afioga Hon LEOTA LAKI LAMOSITELE (Minisita mo Pisini, Alamanuia ma Leipa): Faamalo faafetai i lau afioga i le Fofoga Fetalai, e faatalofa atu foi i le paia o le Maota i lenei aoauli i le afio o le afioga i le Tamaitai Palemia faapea le Kabeneta, o sui mamalu o Minisita Lagolago ia faapena foi i lena itu i le mamalu o sui usufono o le Palemene ua mafai ona tatou auai i lenei aoauli.

E faapea foi ona faatalofa atu i le paia o Samoa o lo faalogologo mai i lenei itula o le aso i ona tulaga faalupe, ae le gata i lea, e faapea foi ona ou fia faatalofa atu foi i le paia o si ou itumalo i le paia i Aloalii, Tapaua e Fa ma Faleupolu e Fa o le itumalo. E faapea foi le aufaigaluega totofi a le Atua o lo o tapuai mai aua se manuia foi o lenei usugafono.

Lau Afioga i le Fofoga Fetalai, e leai ni mataupu na laga e sui usufono mamalu e faapito i le Matagaluega o Pisini, Alamanuia ma Leipa, ae sa afea e sui usufono mamalu ni vaega e aafia ai le Matagaluega i a latou saunoaga i lona

aotelega. O le manatu lea e faapea ai e avatu pea sina faamalamalamaga i nisi foi o vaega o le matou Matagaluega e ono i ai ni sootaga agai i nisi o mataupu sa laga mai e sui usufono mamalu o le Maota, ina ia mafai ai foi ona fesoasoani atu e faamalamalama atu itu o lo o alo atu i ai le matou Matagaluega i le faatinoga o ana galuega.

Lau afioga i le Fofoga Fetalai, ou te faailoa atu o lo o sologa lelei pea le matou galuega faifaatasi ma le Matagaluega talu ona toe fetuunai matafaioi a le Kapaneta, lea ua tofia ai au nei e avea ma Minisita o le Matagaluega o Pisini, Alamanua ma Leipa ma o lo o faagasolo pea tiute ma matafaioi e tusa o nisi o vaega o lo o faagasolo ai pea faatinoga o le Matagaluega mo le silafia. O le mea lea o lo o Lipoti mai foi i le Pulega taunuuga o galuega e tapena ai le tulituliloaina o nisi o vaega o le galuega e fia faaleleia.

O lo o ua faagasolo nei le toe iloiloga o Tulafono mo le Faafaigaluegaina o Tupe mai fafo ia faapea foi ma le Faafaigaluegaina o Tupe mai Fafo 2015. Talu ona faatino lenei Tulafono, e le i iloga lava ona i ai ni faipisinisi ua o latou faaaogaina ona o manaoga o le Tulafono e faigata ona ausia mea e moomia e agavaa ai i latou o lo o talosaga. O lenei iloiloga o le a mafai ona fetuunai ai manaoga o le Tulafono ma mafai ai ona agavaa i latou o lo o talosaga mo lenei faamoemoe. O le naunautaiga ia faatupulaia faamanuiaga e maua mai i lenei Tulafono e fesoasoani ai i le tamaoaiga o le atunu. O se avanoa foi lea e faalautele ai avanoa mo tupe maua a le tatou Malo o lo o faagasolo foi tapenaga mo le faamamaluina o le Tulafono o Teuteuga o le Tulafono o le Sootaga Valelei o Leipa ma Galuega 2023. O lea ua fuafua le faamamaluina o lenei Tulafono ia Fepuari 2024. O vaega taua o lea tapenaga e aofia ai faiga faavae e limataitaia ai le iloiloga o le faatulagaga o totogi maulalo e tai lua tausaga ma fai. O lo o faatautaia lenei galuega e le Matagaluega ma le Faalapotopotoga o Leipa a le Lalolagi faapea le Fono Aoao Faatafatolu o Leipa a Samoa. E fuafua ia maea lenei faamoemoe i le faaiuga o Juni 2024. E le gata i lea o lo o faaauau pea soalaupulega o faasea a tagata faigaluega o tuutuuga ma aiaiga, o a latou matafaioi e aofia ai ma faamanuiaga ua faatulagaina e tatau ona mauaina.

O se faataitaiga lauiloa i le tatou atunu o faasea o lo o agai i totogi o ovataimi ma le le totogia o NPF. O lo o faagasolo foi galuega i le mataituina o le saogalemu ma le soifua maloloina i falefaigaluega, aemaise ai taumafaiga e faalauiloa ma faia aooaaga o le aufaigaluega ia malamalama lelei i vaega uma e puipuia lelei ai i latou i le faatinoga o a latou galuega.

I le vaega o fefaatauaiga o lo o faaauau le galuega e mataitu le tau o oloa o lo o galulue ai le Matagaluega ma le Komisi o Faiga Faatauvaga, faapea le asia o pamu penisini ia mautinoa o lo o usitaia le faaaogaina o le tau faatulagaga o le tau o penisini ma suau i masina taitasi. E le gata i lea o tulaga o fua mamafa ma fua eseese o oloa ia mautinoa o lo o sao le fuaina o oloa e faaaogaina ai iunite faa-meterika.

Ua maea le suesuega o le tulaga o lo o i ai avanoa mo galuega i Samoa sa faia i le 2022 sa vaavaalua ai le Matagaluega ma le Ofisa o Fuainumera Faamauina. Ua faailoa mai i lea suesuega tulaga moomia e faaleleia ai le tomai ma agavaa faatino lelei o latou o lo o faia le galuega.

O nisi vaega taua o lo o faagasolo i le taimi nei a le Matagaluega o le faamautuina lea o fuafuaga mo le vaega maoti o fefaatauaiga, pisinisi ma oloa gaosi. Ia ma le fuafuaga autasi a le Matagaluega mo ana paaga mo le fa tausaga e muamua nei. Ua lama faaiu le tapenaga o lea lipoti ma o lo o fuafua e amata le faatinoga o lenei fuafuaga i le amataga o le tausaga faaletupe 2024/2025.

E pei ona silafia o lea ua faasee atu le vaega o galuega faavaitaimi i le Matagaluega o Tupe o lo o faagasolo galuega tapena mo le faamaeaina o lea suiga ona agai loa lea i ai. Faamalo atu le galulue i le aufaigaluega, e i ai le talitonuga e aoga uma lava suiga mo le agai i luma aemaise o fesoasoani tau tupe e manaomia mo polokalame e faaleleia ai lea auaunaga taua mo le tatou atunuu.

Lau Afioga i le Fofoga Fetalai, i le maea ai ona pasia e le Kabeneta ma faamaonia e le Afioga i Le Ao o le Malo le poloaiga o le tau o oloa i lalo o le Tulafono o Faiga Faatauvaga sa faagasolo ai loa lea galuega a le Matagaluega. Ou te faailoa atu ua maea ona tufaina atu poloaiga o tau o oloa 2023 i pisinisi uma i Samoa nei i le tausaga ua tuanai. Ua maea foi ona faailoa atu i pisinisi uma aiaiga talafeagai mo le poloaiga o tau o oloa. O lea foi o lo o faaauau lava ma ua faagasolo galuega a le Matagaluega ma le Komisi o Faiga Faatauvaga i le mataituina o le poloaiga o tau o oloa ma isi auaunaga. O lena ua taatia aulape o le Tulafono pe a le usitaia lenei poloaiga ma o se fautuaga lea i le mamalu o le aufaipisinisi ina ia tatou galulue faatasi i le usitaia o nei poloaiga.

Lau Afioga i le Fofoga Fetalai, ae ou te le i see ese ma le mataupu lea, e ao ona ou faailoa atu nai vaega taua lava e fesoasoani atili ai i le faamaninoina o lenei mataupu. O le taugata o le tau o le soifuaga i lenei vaitau e le po se lilo i sui usufono o le Palemene ae le gata foi i le mamalu o le atunuu e afua mai ona o vaega nei. O le faamai o le Koviti-19 sa aafia ai le lalolagi aofia ai ma Samoa, e tele lona aafiaga i tulaga o fefaatauaiga. E i ai le talitonuga o lea faatoa tatou lagona aafiaga tetele nei ma e faasolo pea mo ni nai tausaga i le lumanai seia toe tulai mai i se tulaga lelei tapenaga ma fuafuaga a atunuu uma o le lalolagi.

O le tele o oloa taumafa o lo o tatou faaaogaina ma faamoemoe i ai o oloa auina mai fafo ma o ia oloa e le pulea e tatou le tau. A sii le tau o oloa e auina mai i fafo e tatau foi ona i ai sina siitaga laitiiti e faatau ai le oloa i Samoa nei ina ia maua ai se tupe faasili a le faipisinisi.

O Samoa o se atunuu e lotolotoi i totonu o le Vasa Pasefika e fai si mamao ma isi atunuu o lo o tatou fefaatauai. O lona uiga e tatau lava ona maualuga le tau o le felauaiga ma e mulimuli ane aafia ai foi le tau o oloa faatau atu i le atunuu. O le taofia po o le faaitiitia o femalagaaiga o vaa lau oloa ona o taua ma fevaevaeaga o isi atunuu tetele e aafia tele ai atunuu laiti o le Pasefika pei o Samoa ma isi atunuu i le tulaga tau felauaiga.

E taua foi feeseseaiga a isi atunuu tetele o le lalolagi e aafia ai foi ma atunuu aemaise lava i le tulaga i le tau o le suauu. Ua lausilafia uma lava le siisii maualuga pea o le tau o le suauu ma o lea tulaga e aafia tele ai foi le tau o le soifuaga. Mo le silafia e le mamalu o le Palemene, o le taugata o le tau o le soifuaga e le na o Samoa o lo o aafia ai i ia tulaga. Ua outou silasila ma maimoa i Televise ma Upegatafailagi ma matauina ai o lo o aafia le lalolagi atoa i lenei faafitauli e aofia ai foi ma tatou paaga o lo o fesoasoani mai.

E manatu o lena ua manino nisi vaega e pei ona saunoa i ai sui usufono mamalu, i le tulai mai o lenei Faigamalo o lo o sosolo lava i faiga talafeagai ma fuafuaga tatau aua se manuia o si o tatou atunuu. O le taugata o le soifuaga e le o se mea fou. Na amata mai lava i le taimi faatoa faatino ai tulaga aloaia o fefaatauaiga. I lou talitonuga o lo o i ai nisi o polokalame a le Malo o lo o fesoasoani tele i le taugata o le tau o le soifuaga.

E tai pei, muamua o le polokalame o le miliona tala lea ua amata ona fesoasoani tele mo aiga o le atunuu e atinae ai faatoaga ma alamanuia ina ia faateleina ai taumafai i lo tatou lotoifale ma foia ai le mativa.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai pe maua se avanoa.

FOFOGA FETALAI: Ia, leaga e le i i ai se sui usufono na talanoa i le Matagaluega lea, ua iai foi le manatu....

Afioga Sulamanaia Fetaiai Tauiliili Tuivasa: O le manatu... o le itulau e 956 i le tatou aso 24 ia lea e taua, parakalafa mulimuli lava lea na lauga ai lenei itumalo. Ua maitauina foi ma le totoa suiga o Minisita lea la sa tau... i le itulau lea e 956 lea e taulimaina...

FOFOGA FETALAI: O le a la le...

Afioga Sulamanaia Fetaiai Tauiliili Tuivasa: O le faafesili o le tulaga lea leaga o lea o le a see ese le Afioga i le Minisita, i le price control. E momoli le agaga faafetai o lea ua ta... faalogologo foi lenei Maota i le tulaga ua toe aumai ai le price control i totonu o lenei Maota. E momoli le agaga faafetai i le Afioga i le Minisita, tulaga foi sa i ai sa fai mo mea faatauvaga i pisinisi e maualalo. A o lea la ua matau ia e momoli a le agaga faafetai i le mataala ma toe aumai le price control ina ia toe mafai ona toe fuafua ai le taugata o le soifuaga lea ua i ai ma le tau o oloa e fesiitai e le aufaipisinisi. A o le tatalo foi ina ia faamalosia ona agai i tua le Matagaluega ina ia faapipii tau ia o oloa ua faatino atu e le tatou Matagaluega i faitotoa o faleoloa aua e pei e pule a le faatauoloa ia.

Ae o le agaga faafetai i lau Afioga i le Fofoga Fetalai o lea ua toe control le price control e fuafua ai le taugata, pei o le mea lea e i ai o lea e pule lava le tagata ia ma le faipisinisi.

O le lona lua o le tuualalo o le tatou reserve list, e matau lava ma le totoa le tele o pisinisi foi lea se i tulou a nai tagata e omai mai fafo, o lo o faatinoina mo mea o faleoloa laiti. Ia e pei o le agaga lena o le tatou reserve list e faatatau lava mo tatou tagata, a o le vaega lea mai fafo e o e fai wholesale. Ae ua matau lava ma le totoa pe a agai atu i tua, ua tele ta te alu atu ia o tagata mai isi atunuu o lo o faatinoina faleoloa ia. Se i toe silasila ane lau Afioga ua tulai mai i le Minisita i le reserve list po o usitaia pea ma le agaga faaaloalo lau Afioga i le Fofoga Fetalai.

FOFOGA FETALAI: Ia e tutusa lelei a mea na e te faamauina ma le mea foi lea ua ou faamauina. Ae faafetai aemaise lava ia le poloaiga o le tau o oloa, ia malo lava faafetai.

Lau Afioga faaaauau mai le saunaoga.

Afioga Hon LEOTA LAKI LAMOSITELE: Faafetai i le sui usufono mo le fautuaga. O le polokalame o le uluai seleselega o le isi lea faamaite ttau a le Malo e i ai lona aafiaga lelei tele mo le faatamaoaiga o le tatou atunuu e ala i le faateleina o taumafa ae le gata i lea o tupe maua. E faamalosia pea le faaaogaina o taumafa o lo o maua i tatou laufanua ma le sami ina ia foia ai le soona faaalu o le tupe, faatauina o taumafa ma oloa mai fafo aemaise lava taimi faigata faapenei. O le faaaauauina pea o le faatinoina o le polokalame mo galuega faavaitaimi o le isi lea fesoasoani tele mo le taugata o le soifuaga. O alo ma fanau o lo o tuuvaatatu mo nei galuega e fesoasoani mai i aiga i alagatupe maua e fesoasoani i lo tatou tamaoaiga. O lea ua faasee atu le polokalame i le Minisita o Tupe ma e lagolagoina malosi pea.

O lo o faaaauau foi le polokalame fesoasoani a le tatou Malo mo pisinisi tumaoti lea na faasafua atu ai foi siaki tupe mo Faalapotopotoga Tumaoti i nai tausaga ua tuanai e aofia ai le Chamber of Commerce, o le SAME (Samoa Association of Manufacturers and Exporters) ma isi. O lo o i ai foi le faamoemoe mo se siitaga mo nei vaegatupe faagasolo i le lumanai ae le gata i lea sa faamatuu atu foi le fesoasoani mo Asosi o Tagata Faigaluega i le atunuu ma e i ai Asosi sa faamanuia ai i nei fesoasoani e aofia ai le PSA, o le Workers Congress, Medical Association ma isi.

O lo o iai foi vaegatupe o lo o faaagaaga fesoasoani mo pisinisi laiti ma o lo o faatino ma faafoeina lea fesoasoani e le Ofisa o lo o nafa ma le tauluina o pisinisi po o le Samoa Business Hub.

O lea foi ua faatulaga e le Malo le siitaga o totogi o tagata faigaluega uma a le Malo. E faapena foi ona tapena ma iloiloina o le totogi maualalo lea o lo o faagasolo i le taimi nei. E i ai le faamoemoe a faamaea ona tapenaina le faiga faavae i totonu o le tausaga faaletupe lenei. A mautu le faiga faavae o le a mafai loa ona iloilo le totogi maualalo i totonu o le tailua tausaga. O lea faiga o le a manuia ai le aufaigaluega i pisinisi ae faapena foi ona latou... ona o i latou o lo o pulea falefaigaluega ina ia lava le taimi e sauni ai mo siitaga i le maea ai o le tailua tausaga.

O moomooga o le Matagaluega ia siitia le faaleleia o agavaa ma tomai o le tatou auvaa o lo o faigaluega ia Samoa ona o le fatu lea e uunaia le tamaoaiga o le tatou atunuu. O le mafuaaga lea o le ave o le faamamafa a le Matagaluega i le faatinoga o polokalame tau aoaoga aemaise i Matata Eseese. E aofia i lenei taumafaiga, aoaoga i le aganuu ma aga faa-kerisiano ia atoa ai tapenaga a le aufaigaluega i le faatinoga maea o latou tiute.

O le matafaioi a le ona le pisinisi o le faia lea o le taui talafeagai i le sa faia le galuega e limataitaia le Tulafono ma taiala fua i lona agavaa, fua i le galuega sa faatino ma fua i le musumusuga a le Agaga Paia. A tausisi uma i itu i lea tuutuuga ou te talitonu ua taunuai le faaupuga a le isi Turisi sa asiasi mai, Seki a Samoa.

Faafetai atu i le mamalu o le tatou Matagaluega MCIL, lau Afioga i le alii Pule ma le aufaigaluega e tusa ai foi ma la outou lagolago.

Faafetai atu i lau Afioga i le Fofoga Fatalai ma le Maota mo le avanoa. Soifua.

Afioga Mauu Siaosi Puepuemai (Vaa o Fonoti): Lau Afioga i le Fofoga o le Fono pe maua se avanoa.

FOFOGA FETALAI: O lea ua matau atu ua... o lea e pei ona faailoa atu e le i i ai se isi na lagalaga. O le taua o le saunoaga faalaauaitele a le Minisita, ia o lea foi ua pei ua aafia ai lava le tele o tou finagalo faaalia aemaise a le tau o le soifua. Seiavagana e ese se mea faapitoa, po o le EPC po o se isi mea lau Afioga i le sui usufono mamalu.

Afioga Lupematasila Galumalemana Tologata Tile Leia: Faafetai lava i lau Afioga i le Fofoga Fatalai leaga o lea sa taua i lau lauga le tau o le soifuaga.

FOFOGA FETALAI: Ia, o lea ua tali le Minisita.

Afioga Lupematasila Galumalemana Tologata Tile Leia: O lea sa ou faatalitali i le saunoaga matagofie a le Afioga i le Minisita poo a ni auala o fai e le tatou Faigamalo e fesoasoani e tau tuu ai i lalo le tau o le soifuaga. O lea la ua maea mai, a o le fautuaga lea sa avatu aveese le tiute, aveese le lafoga o le VAGST mai i taumafa ia e faalagolago i ai le atunu i aso uma. Ia a o lea e le o lavea mai i le lisi umi a lea ua aumai e le Afioga i le Minisita, pei o se faamanatu lena.

Afioga Hon Fiame Naomi Mataafa: Lau Afioga i le Fofoga Fatalai...

FOFOGA FETALAI: Se i tulai mai lau Afioga i le Tamaitai Palemia.

Afioga Hon Fiame Naomi Mataafa: Ia o la e silafia lelei lava e le sui usufono o le Minisita e feagai ma tiute e tali atu i lana mataupu, o lea ou te sauni atu i ai pe a faagasolo.

FOFOGA FETALAI: Malie. Ia, o le tulaga lena lau Afioga i le sui usufono mamalu o lea foi ua tapena mai le Afioga i le Palemia e talifuaite mo le Sui Palemia o lo o toesea. Ia ona aafia atu ai lea o tulaga ia.

Tulai mai le sui usufono o Vaa Fonoti.

Tofa Mauu Siaosi Puepuemai: Faafetai i lau Afioga i le Fofoga o le Fono. Talu ai ona e fai si taua tele o le saunoaga malamalam aemaise foi o le saunoaga matagofie a le Afioga i le Minisita o le MCIL. E silafia foi e lau Afioga i le Fofoga Fatalai o le isi lea Matagaluega e taua tele mo le uunaia o pisinisi. Sa ou le faalavelave lava mai lava i lana folasaga sa mataituina uma ia

tulaga uma ona e i ai le polokalame a nisi foi o atunu o lo o fesoasoani mai pei o Ausetalia ma Amerika faapea foi Niu Sila. O lea ua saunoa le Afioga i le Minisita o nisi ua faigata ma fuagata e apalai i vaega ia ma nonogatupe ia e maua mai i fafo e fesoasoani i le atinaeina o pisinisi ona e fai si tele o mea foi ia... tulaga ia e moomia. Ae o lo o mafai e le faipisinisi ona totogi... ma togitogi le vaegatupe lea. Leaga e moomia e le tatou atunu ia lelei pisinisi ia uunai i luga tulaga faipisinisi aua a lelei le atinaeina o pisinisi ua lelei foi le atunu. O le ala lea o lou tulai atu i lau Afioga le Fofoga Fetalai, ia e talosaga foi le Afioga i le Minisita, o le faataitaiga a faapea nei o se vaegatupe e \$200,000 a o lea e ta te mautinoa o au o le faipisinisi e na o le \$100,000 e mafai ona ou faaaogaina. Pe mafai ona auala atu ai se talosaga ae o le a le oo la i luga i le \$200,000 a o lea la agai i le \$100,000 e mafai ona afford e le faipisinisi ona togitogi e tusa ai ma le polokalame pei ona i ai Ausetalia. O le agaga maualuga lava ina ia unaia pisinisi, ia atinae le atunu ia... O le mea lea i lau Afioga le alii Minisita... e atu ai pe maua se vaega faapena atonu o le a televave ai... talanoa lava... mo tatou lava locals fai pisinisi ona a tatou oatu nei i Banks oka oka e. Ma le agaga faaaloalo.

FOFOGA FETALAI: Ia, o lea ua maua lou finagalo. Talu ai ona o lea ua tatou taunu i le tatou taimi malolo e tatau foi ona fai sina tatou malologa o le aoauli. Ae a toe taliu mai, ia ona lafo atu lea i le Afioga i le Minisita pe fia tali atu po o le a sona finagalo.

Ia, ae malie lau Afioga i le Minisita o lea ua oo i le tatou malologa. O le a faataatiae galuega a le Palemene mo le malologa.

Na faataatiae Taulumaga a le Fono Aoao Faitulafono mo lana malologa i le itula e 3:49 i le afiafi ma toe faaauau i le itula e 4:19 i le afiafi.

FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono.

E faataatiae tatou Taulumaga ua maea le Saunoaga Talifuitau a le Afioga i le Minisita mo Pisini Alamanuia ma Leipa. O le mataupu sa saunoa i ai le sui usufono mo Vaa o Fonoti o le mea sili lea ua aumai faafautuaga. Ae faamalie atu e le talia ni mataupu fou e toe saunoa i ai se sui usufono mamalu mo le lelei faagasolo o le tatou galuega.

O le mea lea, ua oo atu le tatou faasologa i lau Afioga i le Minisita mo Faamasinoga i nisi foi o mataupu sa laga. O lea e maitau atu e le toatele ni sui usufono sa lagalaga le mataupu i le Ofisa o Faamasinoga. Se i tulai mai lau Afioga i le Minisita.

Tofa Hon MATAMUA SEUMANU VASATI SILI PULUFANA (Minisita mo Faamasinoga ma Pulega Tau Faamasinoga): Ou te faafetai atu i lau Afioga i le Fofoga Fetalai mo le avanoa. Ona lea faatoa maua se avanoa, ia o lea ou te faatalofa atu ai ma faafeiloai atu ai i lau Afioga. Malo le faatoatoa i le

taitaiga o le tatou fonotaga. E faatalofa ma faafeiloai atu foi i le paia maualuga o le afifio o sui usufono o lenei Palemene, afio lau Afioga i le Tamaitai Palemia, faapea le saofaiga i afioga i Minisita o le Kapaneta ma outou afioga i Minisita Lagolago.

E faafeiloai atu foi i lau Afioga i le Taitai o le Itu Agai faapea le Sui Taitai faapea sui usufono mamalu o lena itu o le Maota.

E faafeiloai atu foi i Ofisa Sili o Pulega o Matagaluega ma Faalapotopotoga Tumaoti o le tatou Malo faapea sui usufono uma o le atunuua mafai ona tatou usufono faatasi i lenei aso. Lau Susuga i le Failautusi ma le Ofisa o le Fono o lo o vae ma lima i ai lenei Palemene.

Ou te faatalofa atu i le faafogfa tapuai mai a le Afioga i Le Ao Mamalu o le Malo ma lana Masiofo, lau Afioga i le Sui o le Fono a Sui Tofia ma lou faletua, afioga i le Faamasino Sili faapea le Peresetene o le Faamasinoga o Fanua ma Suafa, aemaise le mamalu i alii ma tamaitai Faamasino o le Faamasinoga.

E faatalofa atu foi i le faafogfa tapuai mai o Taitai o Ekalesia faapea le aufaigaluega totofi a le Atua o loo faanonomanu aua se manuia o Samoa. Le faafogfa tapuai mai sa i o tatou atunuua i ona tulaga faalupe i Samoa nei ma so o se tafa o le lalolagi o lo o alaala ma papaaao ai. Malo le soifua. Faafetai mo la outou tapuaiga ua ae manuia ai faiva o le Palemene.

Ou te faatalofa atu foi i le faafogfa tapuai mai a si ou itumalo Faasaleleaga 1 Salelologa ma Tafua. Susu le aufaigaluega i so o se fatafitaaulaga i totonu o si o tatou itumalo. Le paia i Tapaua ma Salelologa, ae tainane le afifio o le Taufaasisina ma alaala Matuatala ma le mamalu o le Toiloto. Ia faafetai mo la outou tatalo ma la outou tapuaiga.

Lau Afioga i le Fofoga Fetralai, e ui ina le o afea lenei Matagaluega i le Tala Faaopoopo o le Tupe e pei ona taatia ai i lumamaota ae le mafai lava le fia tali atu ona o nisi o mataupu sa afea ai lenei Matagaluega. Ma e toalua lava sui usufono sa afea lenei Matagaluega. O le mea muamua o le fesili, o le lona lua o le fautuaga ma se talosaga.

O le Afioga i le sui usufono mamalu o le Aiga i le Tai le Afioga i le Sui Fofoga Fetralai sa ia fesiligia le tulaga o lo o i ai le Vaega 43 ma le Vaega 44 o le Tulafono o Fanua ma Suafa 2020. Po o le a se tulaga o lo o i ai e tusa ai foi ma le faatalanoaga sa nafa ma lenei Matagaluega. E pei ona silafia o le Vaega 43 ma 44 o le Tulafono o Fanua ma Suafa 2020 lea ua toe tatala ai le avanoa e mafai ai ona toe luitau faaiuga o le Faamasinoga o Fanua ma Suafa ua tumau ma mausali. O a uma faaiuga sa faia i tua atu o Mati 2021 sa amata faamamaluina ai le Tulafono o Fanua ma Suafa 2020 lea ua tatala i le Vaega 43 ma le Vaega 44 o le Tulafono e toe luitau ai. O le taimi nei la, e le i faamamaluina le faaaogaina o le Fuaiupu 43 ma le 44. Ua toe silasila le Matagaluega o le Faamasinoga o Fanua ma Suafa pe talafeagai le faaaogaina o le 43 ma le 44 ona o tulaga ogaoga e ono tulai mai pe afai ae faaaauauina aua o le a toe lagalaga ai le tele o faaiuga a le Faamasinoga o Fanua ma Suafa ua tumau ma mausali. O lea foi ua taoto le faaiuga a le Kapaneta mo le toe iloiloina o nei Tulafono ma ua faagasolo galuega a le Ofisa o le Loia Sili ma lenei Matagaluega i le iloiloina ma le faatalanoaina o le mamalu o le atunuua i se tulaga e taoto lelei ai vaega nei o le Tulafono ia aua ne i i ai sona aafiaga i le

mamalu o le atunu pe afai ae faataunuina lona faaaogaina. A o faatalanoaga sa nafa ma le Matagaluega ma nisi o mamalu o le atunu pei ona fesiligia e le sui usufono mamalu, sa mafuli le tele o finagalo i le toe faaleaogaina o vaega nei o le Tulafono ona e matua ogaoga aafiaga e tulai mai i si o tatou atunu pe afai ae faaaogaina. O le taimi la lenei o lo o faasolo pea galuega o le toe iloiloina o nei Tulafono faatasi ai ma faatalanoaga ma le atunu ina ia mautu ma mausali se Tulafono e toe tuuina mai i totonu o le Palemene mo lona lauliliuina. Ou te... Lua, ou te faafetai atu i le sui usufono mamalu mo Sagaga 2 e pei ona ia talosaga mai ni komepiuta mo ni galuega faatino a le Matagaluega. Ia, mea sili o lea e faafofoga atu le Afioga i le Minisita o Tupe ina ia mafai ona faamatuu mai nisi vaegatupe mo le faatupeina o nisi masini komepiuta mo galuega faatino a le Matagaluega. Ae faafetai atu mo lou finagalo faaalia aemaise foi o se silasila i meafaigaluega o lo o faaaogaina e le aufaigaluega aua le tautuaina o si o tatou atunu.

Ia, lau Afioga i le Fofoga Fetalai, na pau ia o mataupu sa laga mai e nisi o sui usufono mamalu e pei ona afea ai le Matagaluega o Faamasinoga. E momoli atu ai le agaga o le faafetai i finagalo sa tuuina mai ma le faasoa mai. Aua le agai i luma o le auaunaga a le Matagaluega mo le tautuaina o si o tatou atunu.

I lenei itula e avea ia lenei avanoa e faafetai atu ai i le Matagaluega o Faamasinoga, Resitara, Ofisa Sili o Pulega, Ofisa Sili Lagolago ma le Matagaluega mo galuega faatino. Ae le gata i lea, faafetai foi i Sui Pule Lagolago o le Ofisa o le Komisi o le Toefuataiga o Tulafono a Samoa. Faamanuia le Atua i a outou galuega fai. Ia, alofagia foi e le Atua lau Afioga i le Fofoga Fetalai ma sui usufono mamalu uma o le Palemene aua le feagai ai ma faiva ma tiute ua valaauna ai tatou e le Atua. Ia manuia le tapuaiga Samoa. Soifua ma ia manuia.

FOFOGA FETALAI: Ia faafetai. Malo lava i lau Afioga i le Minisita mo le saunoaga malamalamo lea foi ua manino le Maota aemaise foi nisi o sui usufono mamalu sa lagalagala nisi o mataupu. Faafetai, o lea ua taatia i malae le faamalamalamaga a lau Afioga i le Minisita ma le Matagaluega mo le agai i le lumanai.

O le mea lea, ia malo faafetai. Ia ua oo mai le tatou faasologa i lau Afioga i le Minisita o Aoga, faapea foi le tatou Iunivesite ma le tatou SQA. Lau Afioga Honorable Seuula Ioane.

Afioga Hon SEUULA IOANE (Minisita mo Aoga ma Aganuu): Afai ou te tautala i gagana a tagata ma agelu ae leai sou alofa, o au lava o le sumepalo tagitagi po o se apamemea taalili. Afai o ia te au le faatuatua e liai ai mauga ma lafo atu i le sami ae leai sou alofa, e le aoga lava lea. Pe ofoina atu foi lou tino e susunuina e sui ai se tasi ae leai sou alofa, ua le aoga lava lea. E onosai le alofa, e fifilemu le alofa, e le faaitaitagofie le alofa, e lautua le alofa i mea uma.

Lau Afioga i le Fofoga o le Fono, ou te tulai atu ma le migao tele ma le faaaloalo e solituina ai lau Afioga i le Fofoga o le Fono aemaise lenei fonotaga mamalu a lau Palemene Lona XVII.

E faapena foi ona ou faatalofa atu i le afio o le Tamaitai Palemia ma lana aufono o le Fono Faavae. Ou te fia faatalofa foi i le afio o le afioga i le Faamasino Sili, le Peresetene o le Faamasinoga, Alii ma Tamaitai o le Faamasinoga. Ou te tulai ma lou faaaloalo tele e fai ai au ma sui o le Matagaluega o Aoga ma Aganuu, e le gata i lea o le tatou Iunivesite Aoao o Samoa, Le Papaigalagala, ae a le faafogfa tapuai mai a Tusipasi ma Faailoga Tauoloa a Samoa, tainane foi le tapuai mai o le Minisita Lagolago, le Tofa ia Agaseata.

O lou tulai o le tulai lava lea o lou itumalo, Alataua i Sisifo. I le paia o le Toafa o Suafa aemaise le Aiga Sa Moeleoi, Tapaaau ma Aiga, Le Nofo a Faalupega, le Afio o le Usoalii ma le latou Tama, susu Seuula, Aiolupotea, le alo o le Lilomaiava ma le Tuifaiga. Tootooli o le Itumalo, la oulu Nofolua, Taatiti ma Tuaiaufai, le Tofa Folasa o le Fofoga o Papa ma Moemausu. Tapuai maia, o se tatou sao i upufai o malo.

Ae le i faia se faamatalaga lau Afioga i le Fofoga Fetalai, se i ou afe ane lava e fai se faafetai a le Matagaluega i le tautua matavela a le atunu i le Matagaluega o Aoga, Taaloga ma Aganuu i le tausaga lea na tea nei. E ui lava ua leva ona tatou valavala ma le Koviti-19 ma faamai, ae le i tuulafoaiina la outou tautua e lagolago ai le itupa o aoga. I le paia i le aufaigaluega totofi a le Atua, ia te outou matua, Komiti o Aoga, so o se tasi na galue aemaise lava Fono Faavae o itumalo taitoatasi sa agalelei e faafaigofie ai galuega a le Komiti o Aoga. E le i tele se afea o le Matagaluega o Aoga i le Tala Faaopoopo o le Tupe i lenei tausaga, peitai ua amanaia finagalo ma manatu sa folasia i le Maota Fono nei e matimati ai se lagona ma se faasoa mo le Matagaluega, ae a foi lenei fonotaga mamalu. E amata mai lava i le matamatagi seia paia le goto o le la, ua aofia Samoa i a outou fautuaga. Faafetai, faafetai mo le amanaia o le Matagaluega o Aoga.

O le manulauti a le Matagaluega o Aoga, ia momoli le aoaoga anoa ia faatamaoaigaina ai alo ma fanau a le atunu ina ia saofaga i ni galuega lelei e tautua ai e ia lava lona aiga, lona nuu, lana Ekalesia, le atunu ma le Malo. O lona uiga, e le ese le manaoga o le matamatagi, ese le manaoga o Faleata. E le ese Faasaleleaga, ese le Alataua i Sisifo. Tatou te aofia uma i le lagona lea e tasi, ia popoto ma faatamaoaigaina alo ma fanau a le tatou atunu aua lo latou lumanaia manuia.

Lau Afioga i le Fofoga Fetalai o le manulauti lena a le Matagaluega, o le vaai lautele lena a le Matagaluega. Peitai lau Afioga, e le o mavae ese lava luitau o lo o feagai ma le Matagaluega i le taimi nei. O le luitau muamua lava, e fai lava si ogaoga, o le utiuti o le faasoa o faiaoga, ua le gata o Upolu, o Savaii, Samoa, Pasefika, Oceania, le lalolagi atoa, o le mataupu numera muamua lea i le itu tau aoaoga.

Lua, o le luitau, o le laitiiti o tamaiti aoga, ua le mafai ai ona faataavale se aoga i totonu o se afioaga po o se nuu. I faiga faavae lava ia faale-Matagaluega, e tatau ona 50 tamaiti agai luga, ona gaoioi lea o le aoga.

Tolu, ua ova atu le aofai o tamaiti e tatau ona aooga i se aoga, tasi lena luitau tele. O le tele o aoga a tatou i le talafatai i Apia, ua ova ma le 700 le numera

faatulagaina ua oo atu lava i le 800, 900 e oo lava i le 1000+, o lui na o lo o feagai nei ma le Matagaluega.

Lau Afioga i le Fofoga Fatalai, e fou le oo mai o le faatekonolosi i totonu o le tatou atunuu. E manaia, e matagofie i le vaai, e faigofie a o le faalavelave, e fou i o tatou tagata. Tasi lena lui.

O le isi luitau, e laitiiti le aofai o tamaiti e fiafia e o e enroll i le FOE e fai ai latou ma faiaoaga. O le tele o luitau o lo o feagai ma le Matagaluega i le taimi nei. Lau Afioga i le Fofoga Fatalai, o na luitau e le o nofonofo ai le Matagaluega, o lo o matua tapena aulili i le Matagaluega i itu eseese e mafai ona tali atu ai, e i o le tele o nei faafitauli o faafitauli e seasea ona ausia sona tali.

O le faafitauli muamua o le utiuti o faiaoga, ua tapena le Matagaluega e aoaoina, e koleni faiaoga lea e i ai i le taimi nei, ina ia mafai e le faiaoga e toatasi ona tauave ni vasega se lua po o le tolu foi. O le auala masani, ma e toeitiiti o le aofaiga numera o pasene lautele o tatou aoga i Samoa, o le auala lena lea e faaaoga. E le gata i lea, ua tapenaina foi faiaoga ina ia i ai ni metotia fou e kiliva ai mataupu ina ia oo ma ausia tulaga e pei ona i ai le latou manulauti.

E i ai faiga faavae e pei ona taatia ai ma afea, e pei foi ona fai atu i le taimi ua sola, ua fai si leva o fai fetuunaiga ma fonotaga a le Matagaluega ma afioaga ia o Vailoa ma Ulutogia, sa iu lava ina valaau le afioaga e omai e feiloai i le Matagaluega, ia ma matou faasoa foi ma le Komiti o Aoga, sa faailoa atu i ai e le Matagaluega ana faiga faavae ae faailoa mai foi e nai toeaiina o latou manaoga. Na iu le matou feiloaiga ma nai toeaiina ia, tulou, fai atu i ai, o e saili uma ifo lava tamaiti o le tou nuu la e aooga i Upolu, la e aooga i Apia po o fea lava nisi mea, o e tauanau e omai e aooga i i e faatele ai le numera, ona alu ai lea o le tatou aoga. Lau Afioga i le Fofoga Fatalai, e ta lava le kerisimasi o le tausaga na tea nei, e le i toe oo mai nai toeaiina. Ou te iloa ai lava na o le pau lena o tamaiti o lo o i ai i totonu o le afioaga. E tuua nei aoga i le 2023, e 30 le lola a Ulutogia. O lona uiga ua le mafai ona ausia i faiga faavae ona faatamoe le aoga lea. Peitai sa i ai foi se isi vaega sa fesoasoani atu ai le Komiti ma le Matagaluega. Ae a pe a mafai ona tuufaatas? Aua a tuufaatas aoga laiti ia e lua e maua le 130 tamaiti. A 130 tamaiti ua maua le toafa o faiaoga. O lona uiga ua mafai ona tailua vasega a le faiaoga e toatasi. E tasi lena auala o lo o faagaoioi pea e le Matagaluega, peitai e le o ia matou se malosi tele e tulei ai le auala lea, seiavagana ua malilie ma utaga le faautautaga ma le tofa mai alii ma afioaga o lo o i ai vaega faapea.

Tofa Manuleleua Paletasala T. Tovale (Faleata 1): Lau Afioga i le Fofoga Fatalai pe maua se avanoa?

FOFOGA FETALAI: Malie lava lau Afioga i le Minisita se i tuu atu le avanoa i le Afioga i le sui usufono mo Faleata 1.

Tofa Manuleleua Paletasala T. Tovale: Leaga o lea sa aafia i lau lauga i le vaiaso lea na tea atu nei le tulaga lea ua saunoa tonu ai lava le afioga i le

Minisita. Leaga o lea foi e maua atu i lana saunoaga lea e saunoa faapea seiloga e ova atu ma le 50 ni tamaiti faatoa mafai lea ona faatu se aoga fou.

Mo le silafia e lau Afioga, e pei lava ona ou talanoa atu, aua e eseese lava siosiomaga o itumalo. E pei lava ona ou talanoa atu foi, o itumalo ia tu taulaga, e pei lava o i lea ua fanuu uma mai ai aiga i tua ma Savaii. O le ala lena o le tutumu o aoga ia. I i lava i lou itumalo, na o le lua lava primary school a le Malo la e i ai, seiavagana ai aoga ia tumaoti. E pei lava ona ou fai atu o aoga na e le gafatia e isi matua pili. Ae ua e saunoa e ova atu i le 50 tamaiti faatoa mafai ona faatu se aoga fou. A o lea ua ou fai atu, o aoga ia e lua, e ova i le tai 30 tai 40 tamaiti i le vasega. Pei o le auala tonu lena lea sa ou talanoa atu ai, e fia maua se isi aoga fou e faatu i lou itumalo, aua o aoga ia e lua e i totonu i i Lepea ma Vaimoso, e omai uma lava i ai tamaiti i uta i Tuanaimato faasolo atu ai i tua i ina. Ia seiavagana ai le aoga lea e i Vaimea, ia o le aoga lena o la e gasolo mai ai tamaiti i uta faasolo atu i Moamoa ma Sinamoga ma isi nuu ia e taulalata ifo.

Ia pei o sau toe faamanatu atu lena lau Afioga leaga o lea ua e saunoa i le vaega lea na ou talanoa atu ai. Ma le faaaloalo i lau Afioga.

Afioga Fuaava Suluimalo Amataga: Lau Afioga i le Fofoga Fetalai...

FOFOGA FETALAI: Ia mo le faasaoina o lau Afioga i le Minisita, se i tulai mai le sui usufono mo Aleipata Itupa i Luga.

Afioga Fuaava Suluimalo Amataga: Ioe. Faafetai. Mo le faasaoina lava o le taimi o le Minisita. E momoli le agaga faafetai tele i le Minisita e tusa ai foi ma le faamaninoga o le tulaga tuga o lo o i ai si o matou itumalo. O lea ua faafogafoga le Maota, o lea ua aumai manino lava le tulaga o lo o i ai aoga tulagalua, aemaise lava si ou nuu o Ulutogia. O le soalaupulega foi lea sa matou faasoai ma le Minisita aemaise foi le Ofisa Sili o Pulega o le Matagaluega. E silafia o au sa ou aoga i le aoga lea i Vailoa ae taua o le falelua, tuufaatasai ma Ulutogia i le taimi lea seia tau mai i le 1980 ona ou agai mai loa lea e aoga i Apia a ua faataape loa ina ua tapunia foi e le Ofisa o Aoga aua e tutulu ia o le faleaoga sa i ai a o matou i ai i primers. E timu loa, o le matou galuega lea o le salu i fafo o le vai. O lea la na ala ai loa ona tapuni, o i na sipiliki ai loa nuu ia e lua, fai lava le faleaoga o le nuu. O le tulaga lea na i ai, ua uma foi ona matou soalaupule ma tamalii foi ma le komiti o le matou nuu i Ulutogia, ona o lo o i ai lava lo latou talitonuga e taumafai pea latou ona o lea foi ua i ai facilities po o faleaoga mo Ulutogia. E pei foi ona tatou faasoai, sa ou taumafai e faaaoga Ulutogia e omai i ai le Year 1 to Year 4, ae faaaoga le faleaoga i Vailoa e sau ai le Year 5 i le Year 8, ona taumafai loa lea, e lua lava vasega, faiaoga e toalua i Ulutogia tai lua vasega, Year 1-Year 2 ma le Year 3-Year 4. A o le toalua la e i Vailoa, ia fai atu e laua le Year 5-Year 6 ma le Year 7-8. Ia pei o nai metotia ia sa... ae pei o lo latou lava talitonuga e taumafai lava ia tumau pea le aoga a Ulutogia. Sa taumafai le tulaga lea na avatu manino i le folasaga, o le toatele foi... e i ai alo ma fanau a Ulutogia, e faiaoga foi, a faiaoga la i Samusu, afai lava e toatolu pe toafa le fanau a... e tele lava ina o ma ave... e o lava matua ma ave a latou fanau. E i ai foi isi e faiaoga i Apia, ia e usu mai lava ma aumai.

Tuua foi ma toe o atu. E pei o tulaga ia e pei ua disadvantage ai nai a matou tulaga lua, ona o lo o gasolo matua i galuega, e o lava ma ave o latou alo ma fanau, ae pei o se tulaga o le a toe taumafai atu foi, aua o lea sa feiloai foi ma lau Afioga, o le tulaga lava lena sa taumafai i ai, o e taumafai e toe aoao mai. Sa i ai foi se taimi sa taumafai e faatalanoa i e foi o lo o faigaluega tau faiaoga o lo o ma ave o latou alo, ae a pe a aumai le faatuatuaga e nonofo pea o latou alo i le aoga a le tatou nuu, ae o latou e taumafai le latou galuega.

E pei o se tulaga lea ae faafetai o lea ua e taua o la e faafofoga mai lou itumalo o lea lava e taumafai i se vaifofo, o tatou e galulue faatasi ma le Afioga i le Minisita, aemaise foi o le Afioga i le Ofisa Sili o Pulega o le tatou Matagaluega. Faafetai mo lea tulaga. Ma le agaga faaaloalo. Faafetai.

FOFOGA FETALAI: Malo faafetai saunoa i le sui usufono mamalu. Ia se i tulai mai lau Afioga i le Minisita.

Afioga Hon SEUULA IOANE: Faafetai i lau Afioga i le Fofoga Fetalai. Faafetai tele lava mo le toe faamanatu mai e le Afioga i le sui usufono mo Aleipata Itupa i Luga. Ma o le agaga faafetai foi ia te au i lou momoliina mai o le matapu lea, ae foliga mai o lo o momoli mai ai lava ma le foia o le faafitauli. Faafetai tele i lau Afioga. E taua tele le tatou fetuunai lea aua o le mea na le mafai ona maua e le Matagaluega, a o lea ua agia mai lou fofoga. Ma o le auala lena sa taumafai foi i ai le Matagaluega, taumafai ona o le manatu foi o le Matagaluega e alofa foi i le tautiga o afioaga ma nuu na tapena ai faleaoga. Ona manatu lea e faapena ona fai. Peitai, o ia mea uma e soalaupule lava ma faatalanoa. Ia atonu o lea o le a tatou agai atu i le amataga o lenei tausaga, ia tatou galulue ai faapena lau Afioga.

Faafetai i le sui usufono mo Faleata 1. O lea e le i oo atu le faasologa ia Faleata a o lea ua vave ona e... ia o le mea la lea o le a ou tali vave atu ai loa. E sao le Afioga i le... e tolu aoga a le Malo i Faleata, o Lepea, o Vaimoso ma le Kolisi o Faleata, ae toeitiiti 6 pe 7 aoga mission schools, individuals, private, o la e i totonu lava o Faleata. O lona uiga, e sao le finagalo o le sui usufono i le toatele o tamaiti. Ma lau Afioga i le Fofoga Fetalai, o le taimi lenei, o lo o i luga o le Laulau a Fono a le Matagaluega o Aoga se isi auala e faatu ai se isi aoga lelei i se vaega, e le gata o Faleata, ae latalata i isi afioaga lea e tele ina o i uta o latou tagata. E le gata i lea, o lo o tilotilo foi le Matagaluega i le toe faaleleia o le aoga lea e i Tafaigata o le St Paul e toe faatele ma toe... aua e 3 aoga na e ono alu i ina o le pre- school, primary and college. O lona uiga a matou tilotilo le Matagalauuega i le aofai o tagata lea e nonofo i le vaimea lea Sasae o Aleisa faasolo mai tai e ova ma le 30 afe le aofai o tagata lea i ina, o lona uiga o le aofai foi o latou tamaiti e aoga o se mea o le 10 afe ma ona tupu o lona uiga e moomia foi la se isi aoga, ae faafetai i le finagalo mai le sui usufono mamalu mai Faleata o le mea lena lea e agai i ai le Matagaluega. O la foi e i ai eleele pau a le mea o le faatulaga ma faataatia se aoga lelei e mafai ona o i ai tamaiti e toatele tele i le itu lea. E i ai foi le naunautaiga a i ai nisi aoga tetele a tatou i tai mai le talafatai o le isi foi aoga lena e ono fesoasoani e foia ai faafitauli o lo o i ai nei, ae faafetai tele lava mo le faamanatu mai. O le tulaga foi lena e pei o

le faafitauli lea e i ai i le toatele o tamaiti ae laitiiti le aoga . O le faiga faavae a ia a le Matagaluega e 700 le aofai o tamaiti e tatau ona aooga se primary school, ae a outou tagai la i aoga ia e i le talafatai ua ova uma ma le tai 700. Peitai e le o mafai foi ona teena e Pule Aoga ona o le manatu e pei ona faailoa mai e Aleipata o le tele o nai o tatou tagata e faigaluega i inei i Apia, e omai ma aumai nai o latou alo ma fanau e aooga i inei ona o le mataupu fai mai latou, aua e fai atu ai o le a le mea e le tuu ai tua ae fai mai le latou excuse, se ua le malu matou fanau i le mea la e i ai nei. O lona uiga o se luitau foi lea i le pulega a alii ma faipule latou ina ia tilotilo totoa ma tagai ane i le saogalemu o alo ma fanau o si o tatou atunuu.

O le tatou faatekonolosi e pei ona fai atu e tasi lea luitau faatoa amata mai nei i le Koviti-19 ona tatou amata ona gaoioi i totonu. Ua le gata ua panuu mai le tele o fesoasoani a atunuu o donners, e oo mai la i totonu o Matagaluega e fou lava i faiaoga. O le tele o isi masini e le i faaaogaina, e toe malelepe e le i... ona o la e tau koleni faiaoga ina ia mafai ona latou iloa faaaoga, iloa ki kape iloa faaaoga ma le manaoga lava o le Tamatai Palemia ia au le aoaoga o mea ia i tamaiti aoga. Aua ne i gata i faiaoga ma le aufaigaluega, seiloga lava e au i tamaiti ona faatoa iloa lea ua okay le tatou faatekonolosi.

O le WiFi. O le Matagaluega o Aoga o le Consumer o le au faaaogaina, a o le Matagaluega o le MCIT o latou la na o le provider. O lona uiga o le Matagaluega o Aoga e faatalitali lava i le MCIT e o atu e fai connectivities ma kogeki ma faaola ona galulue loa lea.

E le i leva atu i le tausaga na tea nei lau Afiofa i le Fofoga Fetralai na agalelei mai ai le UNICEF e aumai se fesoasoani mo aoga, na latou aumai ai lea o tablets, o le mea foi lena sa aumai ai latou manaoga e ave i tua i aoga a ia ave ia ola. O le mea la lea na tupu e avatu o i ai isi aoga e le ola ai le WiFi, e i ai isi aoga e leai ni satellite. Fai mai loa lea o Iapani, fesoasoani mai Iapani o lea la o le a matou faatupe atua le provider e fesoasoani ai e faaola mea na a outou. O le mea lena na mafua ai ona oso i totonu le Vodafone lea pei foi ona afea i nisi o a tatou fonotaga lenei...

O le taimi lenei o loo faaaaua pea ona faagasolo faiaoga e kolegi i tatou Iunivesite Aoao o Samoa , ina ia saga faaoa pea e le gata i silapasi ma mataupu aoaoina ao le metotia foi e tilotilo ai i le fou mai o aoaoga aemaise o suiga o le tau i lenei vaitau.

O lo o i ai se polokalame a le Matagaluega i le taimi lenei ua tilotilo i le laitiiti o tamaiti e fiafia e o e aooga faafafiaoga. I le taimi lenei ua faatalanoaina ma le PSC ma ua ioe le PSC o le a toe foi e fai le Diploma of Education ina ia mafai ona i ai ni taimaiti e fesoasoani e fiafia e o e aooga ina ia toatele nai o tatou tagata e fiafia e galulue i le galuega faafaigaoga.

E le o na ma le laina e lenei Maota mamalu o le tausaga na tea nei, e tele nai faiaoga ua maliliu, i ai nai faiaoga ua fia avea ma faifeau, e i ai foi isi faiaoga ua ofo lo latou ola e o atu i fafo e saili manuia atu i ai, fesuiaiga o galuega pei o le itu lena.

O lea na afea i se isi finagalo e faapea e tatau ona i ai sina fusi totogi mo nei, lea ia lea na tatou faalogologo i ai, o lea ua sauni le vaega lea e tapenaina ia fusi

totogi a le aufaigaluega a le Malo ae le o i i le Matagaluega se malosi e fai mai ai lea mea, ia tatou tatou tatalo ia ina ia faataunu lea miti lelei.

O le faasologa o mataupu mai tua i aoga agai i Matagaluega, a faapea e tupu se mea ogaoga i se aoga, e muamua soalaupule e le Pule Aoga ma ana faiaoga. A faapea ua latou le maua se tali, valaau le Komiti o Aoga sau latou soalaupule. A faapea ua latou le maua lava, valaau le tama asiasi aoga e sau i totonu. A faapea ua le mafaia lava oo mai loa i le Matagaluega. O le mataupu e pei ona saunoa i ai Vaisigano 1, e faamalie atu, e le i oo mai se faamaumauga i totonu o le tatou Matagaluega. O le ala foi lea o le faamalulu atu e le mafai ona faia se tala ona e le o i ai ni faamaoniga o ia mea. A o lea ua fai atu le auala lea general of communication e mafai ai ona fesootai ma oo mai mataupu tuga i totonu o le Matagaluega o Aoga.

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tulai mai le sui usufono mo Safata 1, o se tasi foi lea sui usufono sa sausaunoa i lau Afioga.

Afioga Leaana Ronnie Posini: Faafetai tele i lau Afioga i le Minisita i le folasaga malamalamā ma le manino. Faafetai tele lava. O le mea tonu lava lea sa ou lagalaga ai le tulaga lea o aoaoga aemaise lava aoga lea tulaga lua, aua e taua ia o le internet lea e faapipii i luga o tatou aoga tulaga lua, a o lea ua matuai manino lelei i lau saunoaga e tele isi auala e tatau ona faatino ai le aoaoina o alo ma fanau i aoga tulaga lua lea e te taua. O isi lava mea ua aumai ua leaga e le i faaaogaina. E pei o lau lea tatalo ona o lea ua tatou iloa nei le satellite i luga o le faleaoga o le tele lava o taimi e leaga ai, aua o le mau lea na aumai i le vaega e i ai le tomai lea, a leaga le tau e le ola, a tetele foi mugala e le ola foi. Ia afai o le faiga lea tatou te faamoemoe tasi i ai, o lona uiga e tele lava le taimi e tuai ai le aoaoina o tatou fanau ae faafetai o lea ua manino mai lau saunoaga e tele isi auala e aoaoina ai tatou fanau, ae aua tatou te faamoemoe tasi i le tatou internet ona o le tele o taimi e le lelei ai. Ma le agaga faaaloalo.

FOFOGA FETALAI: Malo faafetai, ia lau Afioga i le Minisita.

Afioga Niuava Eti L. Malolo (Vaisigano 1): Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tuu atu le avanoa i le sui usufono mamalu mo Vaisigano 1.

Afioga Niuava Eti L Malolo: Faafetai i lau Afioga. E leai lava se agaga e faataumatatao foi e tusa o le saunoaga a le Afioga i le Minisita, ae o le tu atu ona e musu foi lenei sui usufono e momoli mai luma o le Palemene ni mea e leai ni faamaoniga. Masalo o la e faafofoga mai le tamaitai pule o le aoga lea o Auala Primary School sa tupu ai. Na ou oo lava i Savaii ina ua logo mai au e le Sui foi o le Blue Wave le taimi lea sa faatino ai le poloketi lea ona sa logo e le

Pule Aoga le sui lea o le Blue Wave, a o le taimi la lea ua agai atu i totonu ia service providers ia o le Vodafone ma le Digicel o i ina loa la lea na tupu ai le faafitauli lea. O le saunoaga a le tamaitai pule aoga o le saunoaga foi lea a le sui o le Blu Wave o lea ua taunu le lipoti i le Afioga i le Minisita o Aoga e fitoitonu i ai le vaega lea, ae o le agaga foi lea ona o le saunoaga foi a le Afioga i le Minisita i ni mea e le faamaonia. Ou te molimau atu ou te le momolia mai luma o le Palemene lenei ia ni mea e leai ni faamaoniga e pei o se tau faamalamalama lea, ae mafai ona ou saunia tapena mai vaega ia ma tuuina atu ma fai foi suesuega. Ua uma foi ona talanoa ma le pule a le MCIT la foi ua tuuina atu ai ia faamaumauga o le fesootaiga ina ia mafai ona faamaonia mea ia ona o le tulaga foi lea o le afaina o le fanau aoga. E pei o se tau fesoasoani atu lea i le mataupu lea lau Afioga i le Fofoga Fatalai.

FOFOGA FATALAI: Malo. Masalo o lea saunoa manino le Afioga i le Minisita masalo o tulaga na e tatau ona i ai, e tatau ona tapena maea leaga o lea ua saunoa manino le Afioga i le Minisita e lei oo atu, ia o lea ua lafo atu i lau Afioga i le sui usufono mamalu e faataunuu ia...

Afioga Sulamanaia Fetaiai Tauiliili Tuivasa: Lau Afioga i le Fofoga Fatalai mo le fia faasaoina o le taimi o le Afioga i le Minisita.

FOFOGA FATALAI: E te le i saunoa i le Minisita o Aoga e leai ni faamaumauga i i.

Afioga Sulamanaia Fetaiai Tauiliili Tuivasa: O lea e i ai le 964 lea e i ai le lauga a Sulamanaia sa talanoa ai i le poloketi lea.

FOFOGA FATALAI: Onosai mai se i fai atu le tala a le Nofoa e lelei a le tatou o mautinoa. Lau Afioga i le Minisita o Aoga sa i ai se manatu o le sui usufono mamalu lau Afioga i le Minista o Aoga pe leai?

Afioga Hon SEUULA IOANE: Lau Afioga i le Fofoga Fatalai, ou te le o iloa po o fea le tulimanu lea e tau fesoasoani mai ai le sui usufono mamalu, ne i te i ua ou fai atu na sau ae sau ai...

FOFOGA FATALAI: Lau Afioga i le sui usufono mamalu se e leai se mea e pau i luga nei o le Nofoa, e manatu tele i le tatou taimi. O le vaai atu i a outou Afioga e leai...

Afioga Sulamanaia Fetaiai Tauiliili Tuivasa: Lau Afioga i le Fofoga Fatalai o lea ou te taulimaina lau lauga sa taua ai le itulau lea e 964 i le aso muamua lea sa ou tautala ai i le internet lea ona o kamupani ia na faamatuu e faia le tulaga lena.

FOFOGA FATALAI: Ia le iloa pe sa e talanoa agai i o i le Minisita o Fesootaiga lea la a oo atu i ai, a o le Minisita lava ia o Aoga e leai o lea ua

faamauina e leai. Se i oo atu la i le Minisita o Fesootaiga ona e fesili lea lau Afioga i le sui usufono mamalu. Tulai mai lau Afioga i le Minisita o Aoga.

Afioga Hon SEUULA IOANE: Malo faafetai. Faafetai lava lau Afioga mo le tauaveina o le tatou fonotaga mamalu. E leai e le manatu faatauvaa foi i le finagalo o le Vaimauga e tele foi sona sao taula i le Matagaluega o Aoga, ae o le a taatia atu ia i le Afioga i le Minisita o Fesootaiga e saunoa i ia itu. Peitai ona o lea lava ou te i ai i i le mea tau fesootaiga, o le isi auala fou lea ua taumafai le Matagaluega o Aoga e foia ai le tuuitiitia tele o faiaoga, o le faaaogaina o le tatou internet e fai ai aoga. E mafai ona fai atu le lesona ia aooga uma ai. E pei lava ona saunoa lenei Maota mamalu i auala ma faiga e faaaoga ai le internet, ae le mafai lava foi ona aveesea ai le agaga lea o le faamamaina o tatou internet.

E pei foi ona saunoa le Afioga i le sui usufono mai Vaisigano e sao lelei lava e pei o le mea lena e augata ai e tau fai se faamatalaga ona sa saili lava e le i oo mai se faamaumauga o ia vaega uma. Ae ana oo mai ua leva ona i ai le tali ua leva ona maua le tali o le atugaluga.

I le faavae mai ina ua uma le Koviti o i ina lea na amata mai ai loa ona taumafai loa e aoaoina ia faiaoga ina ia faamasani e faaaoga le tatou faatekonolosi lea. O le taimi lenei ua tele nai fesoasoani aumai nai tatou paaga mai fafo a o le agaga maualuga ia aoaoina lelei muamua faiaoga, ina ia mafai ona latou kilivaina mataupu e faaaoga ai le poto faaneionapo.

Ona manatu lea lau Afioga i le Fofoga Fatalai ua leai se isi mataupu o totoe. Pau le mea lea e totoe ia te au lau Afioga, ou te fia momoli foi le faafetai i kamupani ma i latou uma sa lagolago i nei mea o feoaiga o tamaiti aoga mai Savaii iinei, o atu Upolu Savaii omai le aiga i faleaoga, omai le aiga i le faleaiga. O ia auaunaga uma e le faigofie ou te matua momoli le agaga faafetai i le LTA ma i latou sa galulue i luga o auala ma fesootaiga ae a le malu o le malo ma tineimu, aemaise foi o le auauanaga vaa kalasini, pulega o uafu so o se latou ma malu o le Malo aemaise o alii ma tamaitai fomai sa latou galulue e siaki mai, siaki tamaiti aoga ina ia maloloina lelei. E le faagaloina ia matua ma fanau, e le faagaloina ia le au tatalo ma le au tapuai o lo o faia pea le faiva o le tapuai. Lau Afioga i le Fofoga o le Fono ia manuteleina lau faatautaiga o le tatou fonotaga i lenei aso ma ia maua se viiga o le Atua faafetai.

FOFOGA FETALAI: Malo faafetai malo saunoa i lau Afioga i le Minisita o Aoga, faapea le tatou Iunivesite aemaise foi o Tusipasi ma Faailoga Taualoa. Malo lava mo le saunoaga atonu foi o lea ua manino nisi o mataupu sa lagalaga e le paia o le Maota. Malo lava faafetai i lau Matagaluega faapea foi lau Afioga. Ia, tatou see mai i le Afioga i le Minisita o Fesootaiga.

Afioga Hon TOELUPE MAOIAUTELE POUMULINUKE ONESEMO (Minisita mo Fesootaiga ma Faamatalaga Tekonolosi): Faafetai lau Afioga i le Fofoga Fatalai e tusa ai foi mo le avanoa o lenei usugafono e tali ai finagalo o Afioga i sui usufono aemaise foi e fai ma Sui o le Malo e tau faapulapula nisi o galuega e pei ona feagai ai ma lenei Matagaluega.

Ae le i laaloa so matou naunautaiga i lenei afiafi, matou te faatalofa ma faatulou i le paia o le Maota Fono o Samoa i le afio o lau Afioga i le Fofoga Fatalai, afio lau Afioga i le Tamaitai Palemia ma le mamalu o le Kapaneta ia ae tainane foi Afioga i Minisita Lagolago. Ia faapena foi le la itu o le Malu i le afio o le Afioga i le Taitai o le Itu Agai, sui usufono o le Maota ia faapena foi le aufaigaluega a le Malo aemaise lau Afioga i le Failautusi o le Fono ma le aufaigaluega a le Fono Aoao.

Faapena foi le tapuaiga a le Ofisa o le Faamasinoga, Faamasino Sili ma le Pereseteine ma Alii ma Tamaitai o le Faamasinoga.

Faatulou foi ma faatalofa i le tapuaiga a Samoa i ona tulaga faalupe i le afio o Lana Afioga i le, O le Ao Mamalu o le Malo ma le Masiofo faapea foi le Afioga i le Sui o le Fono a Sui Tofia ma le Faletua, paia i Tamaaiga o Aiga ma latou Tama, Tapaua ia aemaise ia le Faa-faleupoluga ia Tumua ma Pule, Aiga i le Tai ma le Vaa o Fonoti. E faapena foi le tapuaiga a le motu i Sasae i ona tulaga faalupe i le paia faale-Malo, paia faale-Talalelei aea paia faale-atunu.

E faapena foi se lagona lau Afioga i le tapuaiga a le Aiga Sa Levi o lo o nofo tatalo aua le galuega fai a lau Afioga ma le Palemene.

Ia aemaise foi si ou Itumalo o Falealili Sisifo, ia o le paia lava lea aua Laloagafa ma Laloanofo, tauaga eseese ia tapuai maia sei fai se sao o le sui usufono.

Lau Afioga i le Fofoga Fatalai e momoli le agaga faafetai o lenei matagaluega ia ma lenei Vaega Tumaoti o le tatou Faigamalo i sui usufono, o e na sausaunoa ma faaali foi finagalo e faufautua foi i le galuega faatino i lenei vaega o le Nofoaiga. A tou silasila i le amataga o le nofoaiga e oo mai i lenei fono lau Afioga faatoa pau a lea o se fono ua tele ni saunoaga i lenei matagaluega. E fiafia ai le loto ma le agaga ona a iai ni fautuaga ia e pei e faatupu lagona ma faatupu manatu. A o le naunautaiga o se manuia mo Samoa.

O le mea la lea e momoli atu ai le agaga faafetai i Afioga uma i sui usufono o e uma sa sausaunoa e aumai foi le tuualalo ia ma se faafetai i lenei vaega o le tatou Malo mo Fesootaiga.

Lau Afioga e fia agai sao a i tulaga o fesootaiga i tatou aoga, pei a ona silafia pei ona tauamata atu se faafetai, faapena le naunautaiga. O le tulai mai a le Faigamalo lau Afioga o le isi lea vaega o le fesootaiga o lo o ua fai i tua i tatou aoga o lo o faatupe lava ma sa faatupe lava e tatou Komiti a Aoga. Peitai i le tulai mai o le Faigamalo aemaise le faatofalaiga a le Tamaitai Palemia, leai e tatau ona tatou agai i le Digital Transformation ina ia faaaogaina. Aua o le lumanaiai lenei lau Afioga, i le silasila foi a le Afioga i le Palemia ma le Kapaneta e taua le iai o le fesootaiga tau tekonomosi aua le lumanaiai manuia. E le gata i pisinisi, alamanuia aemaise foi ia le tulaga oa aoaoga lau Afioga.

O le ala lena na iai le tatou Budget muamua, tuu iai le \$2 miliona ina ia faatupe e le Malo le tulaga lea. E le toe tuu atu i tatou Komiti o Aoga e ala i le latou OGG ia poo le Government Grant foi lea ae faatupe e le Malo. O le agaga ina ia o'oo'o le atinae o fesootaiga, amata mai lava i alo ma fanau, pei o le agaga lautele lea. Na ona toe faamanatu i le Palemene ia le tulaga sa taoto ai ia ma le faaaogaina. O lenei la ia e fiafia lava le lagona ma le manatu e matauina ua iai le taua o le galuega faatino, lea ua fefulisai faalaau mamafa le tofa a le Maota

e faufau ai se galuega tauamata a lenei Matagaluega. E pei ona silafia o lea faatoa lua tausaga o faagasolo le tulaga lea, tele lesona, tele tulaga pei ona saunoa le Maota e ao ona faaleleia ai. Faamaumauina uma tulaga pei ona sausaunoa iai le Maota ina ia faatino lea vaega.

Lau Afioga ia e le tau faamanatu i le Maota le taua o le internet, lea sa tatou iai i le taimi o le Koviti-19. Sa oo foi iai se lagona i le taimi a o tali fesili ia pei e faapena le agaga. Ia, a o le silafia foi e Faiaoga pei ona saunoa le Afioga i le Minisita o Aoga, e faapena, e le gata ia tatou alo ma fanau ae faapena foi i Faiaoga aemaise tapenaga a le tatou Iunivesite mai le tatou FOE i alo ma fanau e agai mai e tautua ia tatou aoga. E pei e faapena, e le o se galuega e tasi se matagaluega, lea ua soosootauau uma matagaluega i le tulaga lea. E oo lava i le tatou miliona i le agai atu i tua o tatou galuega ma atinae, o lo o fai foi ia nai training laiti e faufau ai i latou o lo o galulue i ofisa a tatou itumalo, fesoasoani mai lava i tatou internet.

Lau Afioga i le tulaga sa iai le internet pei lava ona saunoaina foi ma oo iai se lagona o le matagaluega i fonotaga ua tuanai. I le taunu mai o lea sa i le SNBH, vaaia i lalo o le CSL tatou connectivity o aoga, tele faafitauli peitai i le silasila a le Malo i lena taimi e autausaga o tau auau mai, tulou le Maota, lenei faafitauli, tausaili faafitauli.

O lea na tasi ai le tofa ina ia faatino a tatou VISAT, lea ua molimauina ia o le tulaga a lena, VISAT a oo ina timu e faapena. Peitai e le mafai ona mautinoa le connectivity pe a leai se tatou Infrastructure e faatino ai, pei e faapena le agaga. A tatou agai i infrastructure lea ua uma ona tuu atu source providers ia e totogi i le seleni, peitai o le agaga lena na iai lea sa faaaoga ai tatou VISAT lea ua connect uma iai le tele o tatou Aoga.

A o le taunuuga lava e tatau a ona fiber uma tatou aoga, pei o le uiga lena lau Afioga, ia leaga o lea e aumai lava finagalo. Ae o le fuafuaga alualumamao lena a le Malo ina ia fiber connect uma tatou aoga peitai e ao ona foia le faafitauli o le unconnected ia tatou aoga. O lea ua iai le tatou 120 aoga.

Afioga Leaana Ronnie Posini: Lau Afioga i le Fofoga Fetalai.

Afioga Hon TOELUPE MAOIAUTELE POUMULINUKE ONESEMO:
Lau Afioga i le Fofoga Fetalai, sa ou manatu e.... poo le a le fesili a le Afioga i le sui usufono.

FOFOGA FETALAI: O lea ou te matau atu e lei saunoa lau Afioga i le sui usufono o lea lava e iai faamaumauga i luga nei. E...o le tatou taimi aemaise o le tala a le Nofoa na tuuina atu ina ia faasaoina le tatou taimi. O la foi e molimau le Minisita e te lei saunoa foi i le tulaga lea.

Afioga Leaana Ronnie Posini: Lau Afioga ou te....tele a taimi lea ou te tulai atu ai lau Afioga lena e te saunoa mai ou te lei taua i se tala a lenei Itumalo. Ia ae sa oo lava iai tala a lenei Itumalo i mea ia o internet.

Afioga Hon TOELUPE MAOIAUTELE POUMULINUKE ONESEMO:
E pei o le uiga lena lau Afioga i le Fofoga Fatalai o lea sa manino lava le tala sa tali atu e tusa o le fesili talu ai nei lava, atonu e le o faamalieina le Afioga i le sui usufono.

FOFOGA FETALAI: Ia, malie lava lau Afioga i le Minisita sei faamanino pea le..

Afioga Hon TOELUPE MAOIAUTELE POUMULINUKE ONESEMO:
Faafetai.

FOFOGA FETALAI: Ia e sao sa e saunoa i le internet, o le internet a le MESC e le o le internet a Telecommunication. E eseese la internet ia na e saunoa iai, ua uma la ona talifuaitau le MESC lea iai le afioga i le Minisita. Ia a o lea ua oo i le telecommunication, e leai e te lei saunoa iai. Ae o lena e manaia lou finagalo, la ua uma ona tali le Minisita. O le mea lea, se malie maia le sui usufono mamalu.

Afioga Leaana Ronnie Posini: Lau Afioga lea sa ou....i le tulaga o le internet a le Ofisa o Aoga ae leaga sa tulai mai le Minisita o Fesootaiga, ia ona ua matou faapea e agai lau tautalaga i le Minisita o Aoga a o lea e faatutu atu i le mea tau internet o ia tonu la lea e iai le matafaioi lea. O le ala lea na alai ona agai loa iai se tala i le Minisita ma le agaga faaaloalo.

FOFOGA FETALAI: Ia malo faafetai, ou te talitonu o lo o malamalamo lou finagalo lau Afioga i le sui usufono mamalu i mea faapena.

Afioga Lupematasila Galumalemana Tologata Togia Tile Leia: Lau Afioga i le Fofoga Fatalai.

FOFOGA FETALAI: Ia ae o lo o saunoa faalauaitele foi lava le Afioga i le Minisita ou te iloa e aafia uma ai lava mea tau internet i le saunoaga a le Afioga i le Minisita. O le talanoa atu lea lau Afioga i le sui usufono mamalu, finagalo malie o lea lava e faagasolo le tatou galuega.

Afioga Leaana Ronnie Posini: Faafetai tele lava.

Afioga Lupematasila Galumalemana Tologata Togia Tile Leia: Lau Afioga i le Fofoga Fatalai.

Afioga Leaana Ronnie Posini: Lau Afioga i le Fofoga Fatalai leai e puupuu lava se manatu e pei o le mea lea na taua ona o lea na maua, o le tele a o satellite ia e i luga o Aoga Tulagalua e le ola. A o le tupe lea e totogi e USD\$12,000 i le masina, o le tau la lena e alai ona ou faiatu o le taugata ae le o ola ia le tele o masini ma le agaga faaaloalo.

FOFOGA FETALAI: O lea ua maua lou finagalo, o se taimi saunoa mai le Afioga i le Minisita.

Ia se i tulai mai lau Afioga i le Minisita.

Afioga TOELUPE MAOIAUTELE POUMULINUKE ONESEMO:
Faafetai, atonu pei o le tulaga lena lau Afioga i le Fofoga Fetalai sa oo iai le ofisa...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai pe maua se avanoa.

Afioga TOELUPE MAOIAUTELE POUMULINUKE ONESEMO:
...aua sa fesiliglia muamua foi e le afioga i le sui usufono, sa ou tali manino iai i le tulaga o le konekarate. I le konekarate uma le lua tausaga ona uma lea, o le ala lea na alai ona pe. Ia o lea ua toe faasalalau ina ia faaaauau i tatou aoga i lenei tausaga, ia masalo o lea ua.... Ae na alai ona uma ina ua uma le Konekarate muamua lea sa amata ai. O le uiga lea lau Afioga, o lea la ua taatia mai ua iai le 120 satelite, lalo o le vaavaaiga a le Malo. O ai lava le Aoga e fia faaaoga ai ia e mafai ona fetuunai iai. E fua i luga pe a faapea e le o oo iai se connectivity pei o le tulaga lena. O lea o le a amata ona faasolo ona faapipii fiber ma amata ona convert into fiber le tatou connectivity ina ia mautinoa e le toe motusia, pei o le uiga lea na alai ona....

Ia ae ona o lea e saunoa faapea ua....pau a lea o le upu faimai, e pe, ia pei e faapena lau Afioga tulou le Maota. Leai, ae sa ola ae ina ua uma le Konekarate ia ona tape lea aemaise le taimi ua tuua aoga lena sa tape ai ma le agaga faaaloalo.

FOFOGA FETALAI: Ia, o lea ua manino lea tulaga malo faafetai.

Afioga Hon TOELUPE MAOIAUTELE POUMULINUKE ONESEMO:
Faafetai.

FOFOGA FETALAI: Se i tulai mai lau Afioga i le sui usufono mamalu mai Vaimauga 1 leaga o lea sa e lauga foi i le mataupu lea.

Afioga Sulamanai Fetaiai Tauiliili Tuivasa: E tulai atu Vaimauga e momoli le agaga faafetai i le Minisita poo lau Afioga foi i le Inisinia. E matau lava....sa fia tulai atu a i le taua i lenei foi Itumalo i le Aoga Primary School ina ua faaola atu foi ia tulaga ma donate foi e se aiga foi o si o matou Itumalo ia Pauga ma si o latou aiga mea o laptops ma computers i aoga uma o si ou itumalo. E pei o le agaga lena sa fia tulai atu ai i le aoga i o matou Primary Schools, e momoli ai le agaga faafetai. Ae o le agaga sa popole iai le sui usufono lea ua saunoa tonu ai lava le Minisita. O le tulaga lea e le o po se lilo e \$2 miliona lea na allocate i le tulaga i le Maota lenei mo le faatinoina o satellite ia lea foi la ua toe saunoa le Minisita ua uma le Konekarate. Pei o le popolega lena sa naunau ai le sui poo le mea ua faamutu le auaunga foi a lea kamupani

sa iai ae lei soo ona faaauau ia le tulaga i tatou internet poo le tulaga i satellite. Aemaise a nai afioaga i Savaii e le oo iai aua o matou i Apia pe a lava e le tau need iga lava se satellite i luga, o lea lava matou te iai i le taulaga. Ae o le popolega o le sui usufono o lea foi e matau o lea ua faauma lea konekarate, lea ua toe tender le isi kamupani fou a o lea e \$2 miliona sa faamatuu i le kamupani muamua mo le faatinoina o lea auaunaga. E pei o le agaga lena sa fia fesili ai ae momoli le agaga faafetai i lau Afioga i le Minisita o Aoga, o lo o lelei le faatinoina e lenei Itumalo o Vaimauga 1 i matou Primary Schools uma lava ona o lo o atoa uma mea o laptops ma computer sa donate lava e nisi o Tamalii ia ma le fesoasoani a le sui usufono i le tuuina i totolu o Faleaoga ma lou agaga faaaloalo lau Afioga i le Fofoga Fetalai.

FOFOGA FETALAI: Malo, ia lau Afioga i le Minisita.

Afioga Hon TOELUPE MAOIAUTELE POUMULINUKE ONESEMO: Faafetai, ia atonu e.....faafetai foi i le sui usufono mo le faamanatu aemaise foi le tulaga pei ona iai lou finagalo aemaise foi le tulaga ua iai le tulaga mauluga ua iai aoga o le itumalo. Leai na ona faamanino laititi lava o le tatou \$2 miliona lea na iai e aofia ai le procurement o satellite, le auina mai, install ia ma provide le data mo le tausaga, 12 masina ia ma le maintenance. Ia pei o le atoaga lena. E pei a ona oo iai i le Palemene foi ua tuanai o le tulaga lea sa faaletonu i tatou aoga o le leai o se maintenance. O lea la ua toe tender le tatou galuega e le gata i le provision o le data ae ua iai loa ma le maintenance ia mautinoa aue nei toe pe lau Afioga i le Fofoga Fetalai mo le agai i le lumanai.

Ia ona oo mai lea i le tulaga pei ona i ai le tulaga faapopoleina o le aafia ai o alo ma fanau i tatou internet po o le tulaga o le access i tulaga le talafeagai, e moni le saunoaga ma e faapena foi se lagona o le Matagaluega aemaise foi i tatou. O le galuega muamua a le Matagaluega o lea ua amata ona install screens i a tatou service providers e filter ai le tulaga lea, le tulaga lautele aemaise a pei a o tatou o maota ma laoa, e le oo atu i ai le galuega a le Matagaluega a o lea lava ua tuu i totolu o a tatou service providers e provide filters ia mo le access lautele o tatou alo ma fanau e puipuia mai ai i lea tulaga. I le tulaga lava ia o tatou aoga na faatino a ia filters i le tatou connectivity lea through i le Visat ia po o le tulaga lea na faatupe e le Malo, ae lea na saunoa manino le afioga i le Minisita o Aoga o le fesoasoani mai nisi o tatou bilateral partners ia na mafua ai na agai sa'o lea sa faaaoga ai service providers. Peitai e le avea lea ma alofaga lau afioga i le Fofoga Fetalai, o le galuega faifaatasi a le Maota lenei, o afioaga i le pulega a alii ma faipule o le Komiti o Aoga e oo lava i faiaoga. E pei faapena se fautuaga e ala atu i le Matagaluega ma le Maota lenei ina ia o tatou silasila pitotasi a o le galuega e faifaatasi.

Na saunoa foi nisi o sui usufono i le aafiaga i a tatou alo ma fanau. Ioe e pei e faapena le... o le tatou galuega faifaatasi ioe o le a foi se taumafaiga a le Malo i le afioga i le Palemia ma le Malo, ae a le galulue faatasi e le gata i le puipuiga a o le tapenaina ina ia toe faafoi i le lelei ni aafiaga ua i ai. Ae o le tatalo lena i le Atua lau afioga ina ia malutia si o tatou atunu i aafiaga o lenei mea o

fesootaiga, ina ia faaaogatatau, ia faaaoga i le lelei mo le tamaoaiga o si o tatou atunu.

Lau Afioga atonu o le aotelega lena o tulaga na sausaunoa i ai afioga i sui usufono mamalu, e pei lava ona ou tau fai atu e fiafia lava le agaga o lenei usugafono ona ua i ai finagalo lagalaga ona o galuega a lenei Matagaluega. E le itiiti le galuega o lo o tau faatino ae atonu o le tatou Main Budget o le a talatala ai foi nisi o vaega a o lenei Budget ia e leai se vaegatupe mo lenei Matagaluega, ae faafetai i sui usufono o e na sausaunoa e aumai foi timaiga ia ua talia ma le agaga faaaloalo. Ia manuia lau afioga i le Fofoga Fetalai aemaise le Tamaitai Palemia, o sui usufono mamalu o lenei Palemene ma le Kapaneta aemaise le tapuaiga a Samoa.

Se i ou oo ane lau afioga e le itiiti le taua o le sao o le aufaigaluega, le afioga ia Lefao ma tatou Ofisa Sili o Pulega e fiafia a le agaga e pei ona faafogafoga i finagalo leaga lea ua aumai fautuaga a le Maota ia teufatu ma faaaogaina. Ioe. Ia le aufaigaluega totofi a le Malo ia e faapena so matou naunautaiga e le faigofie nei aso aemaise o luitau o lo o i ai. E pei a ona manatua ai Faataoto a le Faaola i le oo mai i le saunoaga “ia na ou fia ai na outou aumai na ou fia inu na outou aumai e faapena le Alii.” Ioe ia faapena ona o tatou fai. O le fesili o anafea ea na e sau ai ae matou avatu se meaai, o anafea ea na e falepuipui ai ae matou o atu e asi? O le tali a le Faaola o se itiiti ua outou faia i ai o au lava lea e faapena le aufaigaluega a le Malo o la outou tautua ia faapena ona tutusa tagata uma. Ia outou tautua le afioga i le Palemia ma le Kapaneta aemaise Samoa o faafogafoga, ia manuia lenei aso faafetai.

FOFOGA FETALAI: Ua faamalo le saunoa i lau afioga i le Minisita o Fesootaiga atonu o lea ua manino foi le paia o le Maota e tusa foi o mataupu sa laga e sui usufono mamalu. Ae taua foi o lea ua e saunoa ua talia tuualalo foi a sui usufono mamalu o le Maota aua lava le agai i luma o le auauanaga a lau Matagaluega ma le Pulega. O le mea lea malo faafetai le tofa i lau afioga i le Minisita.

Ia ua tatou oo mai i le Minisita o Siosiomaga, lau afioga i le Minisita.

Afioga Hon TOEOLESULUSULU CEDRIC POSE SALESASCHUSTER (Minisita mo Punaoa Faalenatura ma le Siosiomaga): Lau afioga i le Fofoga Fetalai, e faataumatau atu ona o lenei ua logo i tino matagi lelei aua ua gafoa i le Maota i Tiafau nei faaailoilo mautinoa o le alofa laveai o le Atua o Samoa ma le lalolagi uma. E pei ona e fuatia le tao ma e utufaasili le vai o le Tagaloa aua lona viiga. Malo le seusilasila i lau to tatau tauave aua le Maota Fono, faafetai i lau afioga.

Lau afioga i le Fofoga Fetalai ou te le toe lalagaina le magalafu pe ula le faamatua i le afi mutasi aua paia talatalagata o le Maota, o tapuito ma vavau e tumau lava e leai se vave faafiamae e na te toe gafa ma faafuafuata aua e tumau lava. Taalolo ia la. O le laolao ua maua ua o tatou tiu ai i latasi ua fai lea ma mafuaaga maualuga ou te tulai ai, se i toliua le puso o le faatauagai a le Malo ma tuutau sa faafuelalaga i ai le tofa, le faautaga ma le faautaga i sui

usufono filifilia o le Maota. Lau afioga i le Fofoga Fetalai, ua logo i tino logo i loto e pei o le tala nai le Malofie le matagi agi o finagalo o sui usufono.

Lau afioga i le Fofoga Fetalai, e muai faailoa e leai se vaega o le Tala Faaopoopo Nu. 1 o le Tupe 2023/2024 o aafia ai le Matagaluega ma Faalapotopotoga o lo o i lalo o lau vaavaaiga. O le Matagaluega lea o le MNRE, o le SLC ma le STEC. E matau atu foi e leai se fesili faamalamalama, na laga ai Matagaluega ma Faalapotopotoga i saunoaga a sui usufono e ui o lo o aafia i le saunoaga a le Minisita o Tupe le faafetai i le Malo o Niu Sila e tusa o le fesoasoani ua tuuina mai mo galuega ma aafiaga o le suiga o le tau. O se tasi lenei o avanoa sa galulue ai le Matagaluega o Punaoa Faalenatura ma le Siosiomaga ina ia mafai ona faatino ai nisi o galuega i ai a outou afioga, aepeitai lau afioga i le Fofoga Fetalai sa i ai nai mataupu na afea ma fesiligia faapea foi ona fautuaina ai e sui usufono le aotelega o le auaunaga a le Matagaluega o Siosiomaga ma le Punaoa, le SLC ma le Esetete Tausi ma taumafai ai foi e faailo atu ma faamalamalama i lea lava taimi na fesiligia ai.

Lau afioga i le Fofoga Fetalai ona e tolu lava nai vaega tetele sa faapea ona lilifa iai ia finagalo o sui usufono ma fesiligia ai lenei Matagaluega, o lea e na ona ou toe otootoina atu. Muamua o galuega mo le aoaina o otaota ma lapisi, lona lua faaleleia ma le fausia o taligalu i totonu o afioaga ma alalafaga aemaise lava i vaega eleele ma fanua o lo o aafia mai fesuiaiga o le tau, ma le tolu o le vaaia lea o eleele a le Malo. Lau afioga i le Fofoga Fetalai e amata se vaivaiga i fautuaga i le aoina o le lapisi i le vaitau o le Kerisimasi e moni atugaluga e ui o lo o iai foi GPS uma i loli lapisi sa faaaogaina ma o lo o faaaogaina pea e le Matagaluega e mataituina ai le feoai o loli lapisi ina ia mafai ona iloa o lo o aoina uma vaega o lo o iai totonu o latou Konekarate. Peitai o lenei ua tapena nei le toe faaleleia o auaunaga a konekarate o lo o faatinoina le aoina o lapisi faapei o le faaopoopoina o aso e lauina ai le lapisi, faaleleia o le monitoring o Konekarate aemaise foi o se auala e galulue ai ma itumalo ma afioaga mo le faamamaina o tafaala.

Lau afioga i le Fofoga Fetalai mo finagalo sa faaalia i taligalu na ona toe faailoa atu o lo o iai nei le Komiti a le Malo o lo o latou silasila ma faataoto assessment ma prioritization e mafai ai ona faatino galuega i le maua ai o seleni a le tatou Malo ma ua faamauina. E le gata o le Fonotaga nei ao fonotaga foi ua maea ona faailo e sui usufono ia faapea foi tusi talosaga ua faapea ona faaoo mai e afioaga ma alalafaga.

Ona oo mai lea i eleele a le Malo, lau afioga i le Fofoga Fetalai e iai nisi o sui usufono sa latou laga lea vaega ae talitonu foi, ua maea saunoa le afioga i le Tamaitai Palemia i fuafuaga o lo o ua taapenaina nei mo le tuufaatasia ma le vaaia lelei o eleele a le Malo. E aofia ai foi nisi o fuafuaga alualu mamao e limataitaia ai le vaaia, le fuaina le resitalaina ma le fuafua tatauina o le tau o fanua ma lisi, e ala lea i se Land Policy o Land Reconciliation faapea ma le Land New master plan. O nei fuafuaga o le a tuuina uma i ai atugaluga ua faapea ona faailoa ia aoga aua se alu alu i luma ma le vaaia lelei o tatou eleele. Lau afioga i le Fofoga Fetalai, e ese mai ai i lea le talosaga mai le sui usufono o Salega 1 e fia faailoa atu i lau afioga, o le eleele i Siuvao ma Fagafau sa faapea ona faailoa e le o ni eleele o le Malo. O se tasi o eleele ia o fanua faaleaganuu

ao le isi eleele o fanua tumaoti, ia e taoto atu i lau afioga ma le itumalo e faapea ona outou feutagai ai i lea vaega.

Lau afioga i le Fofoga Fetalai...

Afioga Fepuleai Faasavalu Faimata Sua: Lau afioga i le Fofoga Fetalai pe maua se avanoa faamolemole

FOFOGA FETALAI: Ia malie lau afioga i le Minisita sei tuu atu le avanoa, o lea ua tali manino le afioga i le Minisita. E iai se isi ia tulai mai le sui usufono o Salega 1.

Afioga Fepuleai Faasavalu Faimata Sua: E momoli le agaga faafetai i le afioga i le Minisita lau afioga Toeolesulusulu mo le faamalamalamaina o le talosaga a lenei itumalo. Faafetai foi mo le tali malamalama ae ua ou tulai i lenei ituaso i lenei itula e tau faamalamalama ia tulaga tonu na agai i ai se lagona po o se manatu a lenei usugafono. E iai le faafanua lea e i tua o matou o lo o taoto ai fuataga ia afai e sao lau afioga e le o ni eleele o le Malo, o lona uiga o le vaega lea o le Esetete pe a ae pau le faafanua lea matou te mataitu i le taimi lenei. O lo o iai le 100eka e 200eka e lua tai 100eka ma le 37eka la e iai ao lo o tusi ai lalo o le Samoa Land sa talosaga e fuaina, ao eleele o lo o faasau ai lalo o le faafanua o eleele tau Falelima. Ae silasila la lau afioga i le Minisita o le tuaoi faavae lea o nuu ia e lua o lou itumalo o Salega 1 ma le isi itu lea o Savaii tulou foi le afioaga o Falelima. O lo o manino lava ia tuaoi faavae o lo o manino lava tuaoi faavae ao totonu o nei eleele o lo o iai tai 100eka ia e lua o eleele e faasino tonu i le itumalo o Salega 1, peitai i le faafanua lea faatoa fua ma fuaina i le tausaga 2007 sa fuaina ai ao fuataga ia ua leva ona iai fuataga ia i tua atu po o le 18seneturi pe a. O lo o iai nei suesuega i le taimi lenei ma o lo o faatino foi sailiili suesuega a lou itumalo ma au nei sei tau aumai uma i luga taimi na fai ai fuataga, ae pau lea o le faafanua lea ua ou tau atua na fuaina i le 2007. O lea la ua tatalo atu ai faamolemole pe mafai ona faamatuu mai le 100eka lea e latalata mai i Siuvao sei faato'a e fai ai galuega ma galueaina e lenei afioaga o Siuvao faamolemole. O le nuu mavae Siuvao lau afioga.

FOFOGA FETALAI: Ia tulai mai lau afioga i le Minisita.

Afioga Hon TOEOLESLUSULU CEDRIC POSE SALESASCHUSTER: Ia faafetai...

Afioga Sulamanaia Fetaiai Tauiliili Tuivasa: Lau afioga i le Fofoga Fetalai mo le fia faasaoina o le taimi o le Minisita.

FOFOGA FETALAI: Ia sei tulai mai le sui usufono mamalu.

Afioga Sulamanaia Fetaiai Tauiliili Tuivasa: Ia sa taua foi e lenei usugafono ia matou eleele ina ua tulai mai foi lena Faigamalo ma tulai mai le afioga ia Leatinuu, sa iloa lelei e Leatinuu le naunau o lenei sui i Paeaiga ua tuanai ina

ia faamatuu i lalo le \$35,000 i se tau taugofie ia o lea foi ua toe tatalo atu e alu ese lava Leatinuu e leai ma se mea o faia ia o lea ua e toe tulai mai ia o le tatalo a lena a le Vaimauga i eleele o lo o i o matou tuamaota pe leai se faamamaavega mai le 35 i le 10 po o se mea faapena.

Lona lua lau Afioga i le Minisita, ua e saunoa i taligalu... E le o po se lilo sa agiga i le Maota lenei le saunoaga a le Taitafono o Tupe, o lou afioaga o Laulii o lea o le a faamatuu... E oo mai i le taimi nei ua leva ona tapena foi fanua, se i tulou le Maota e sau ai le maa. Ia ae o lo o talia pea e si matou afioaga le saunoaga o lea e matau atu lea o le a oo lava i lenei financial year po o le a le tulaga ua i ai le taligalu i Laulii.

O le popolega o le sui usufono, e pei ona ou fai atu o le afioaga nei o Laulii e leai se aaau... O le moana, a vaai la i le siisii o le tau i le taimi nei. E faafetai a ona ole itumalo e tatalo tagata ae toeitiiti a fafati galu. E pei o le agaga lena i lau Afioga le Minisita o Siosiomaga, se i e asiasi atu ona lea e afio atu le Afioga i le Tamaitai Palemia ma afio i tua. E le o silasila atu i le mafatia... i le oooo o le tai o loo tau afaina ai le afioaga... Lau Afioga i le Fofoga Fetalai, o lau tatalo lea...

Afioga Hon Fiame Naomi Mataafa: Lau Afioga i le Fofoga Fetalai, se i saunoa sao le sui usufono ia i lana mataupu. O le mea lea e tupu ai le faalavelave i le tatou fono ma toso ai le taimi. Faaaoga tatau o tatou taimi ma fuafua a tatou faamatalaga. Talosaga pea i o pe a faapea o ou taligalu na e fia maua.

FOFOGA FETALAI: Ia tulai mai lau Afioga i le Minisita.

Tofa Hon Leainuu Wayne Sooialo: Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita mo le faasaoina o le... Se i tulai mai lau Afioga i le Minisita o Faalapotopotoga a le tatou Malo.

Tofa Hon Leatinuu Wayne Sooialo: Ia faafetai atu lava i lau Afioga. O lea ua pasi uma i o i le Minisita o Siosiomaga le mataupu. A o le mea lea o le fai mai e leai se mea o faia, e tasi lea itumalo o lo o lavea i lalo o fanua faatau faatolu. E tasi le kuata eka ae faatau faatolu.

O le isi foi mea e le o lavea i lalo o le tulaga lea ona o le suisui o komiti o fanua a le itumalo. E o ese loa le isi komiti omai le isi komiti e ese foi a latou faiga. Ia omai foi laia i le SLC i lena vaitaimi e ese foi a latou fuafuaga ia o ese atu latou ia omai... Lea sa faamalamalama e le Afioga i le sui usufono. O le isi foi mea, o lo o i ai nai faitioga e faasaga i le Afioga i le sui usufono ona e nofo i Letogo... E nofo i Letogo a o fanua ia e ia te ia o Vailele. Ia lea foi la sa taumafai e faasao lena vaitaimi ae ua tele ua uma... Ae le i faapea e leai se mea na faia. Sa tau faasaosao nai mataupu sa faaletonu. Ia ae atonu lea ua oo atu i o i le Afioga i le Siosiomaga... le Afioga o le Minisita o Siosiomaga. E masalo o ina lea la maua ai lou mapusaga lau Afioga i le sui usufono. Faafetai.

FOFOGA FETALAI: Ia, se i tulai mai lau Afioga i le sui usufono mamalu o Satupaitea.

Afioga Hon Lautafi Fio Selafi Purcell: Faafetai i lau Afioga mo le avanoa. Faafetai i le Afioga i le Minisita mo le saunoaga e uiga i taligalu leaga e tasi lea mataupu lea sa ou... umi a na ou tautala ai i le Afioga i le Minisita. O le manaia ia o le faagasologa o le saunoaga a le Minisita, ae toe oo mai lava i le fasi vaega lea e faapea... i le maua ai o se tupe. Ia ona o lea ou te tilotilo atu i le Tala o le Tupe e i ai le vaegatupe lea e aumai mai Niu Sila pei e 15 miliona. Lea sa ou taua a... pe o le a se taimi e mautinoa ai... pe fia se vaega o le tupe lea e tuu mai i le Afioga o le Minisita e fai ai taligalu aua o mea tau Climate Change e faaagaaga ai le tupe lea. Ia, pei o le taimi na e tatau ona malamalama lelei matou nei... lavea ai ma le sui o Vaimauga lea na fai mai toeititi a fafati galu. Ae ou te tautino atu i le vaisaso lea na tea nei, lea na sou ai le sami e lei toeititi fafati galu, na fafati a galu i luga o le auala o Satupaitea faamolemole. Matuai moomia a le fesoasoani i le taimi nei. Afai e vave maua mai le seleni lea ia ona iloa lea e Satupaitea ia... pe gafatia ai le taligalu pei ona talosagaina. Ae faafetai lea ua amata ona gaoioi lau Afioga i le Minisita.

FOFOGA FETALAI: Ia, malo. Lea ua faafogfa mai le Afioga i le Minisita. Ia tulai mai lau Afioga i le Minisita.

Afioga Hon TOEOLESLUSULU CEDRIC POSE SALESA SCHUSTER: Faafetai i lau Afioga i le Fofoga Fatalai mo le avanoa. Ia se i amata mai le mataupu a Salega 1. O le faailoga... o le vaega na faailoa atu i lau Afioga e leai se sese... O le fanua lea e tuaoi ma Fagafau ma Siuvao o le fanua lea faaleaganuu. O le fanua lea e i le va o Fagafau ma Faiaai ea o le freehold land. O fanua ia... e leai se fanua o le Malo seiavagana le tuaoi o Siuvao ma Falelima lea faatoa e saunoa mai ai i le taimi nei. Lea e i ai le Cornwall Estate e alu atu ai i le tuaoi lea ma e le o le 2007 o le 1964 ma le 1965 lea na taina ai le vao ma toe totoina ai le faatoaga lea o lea e oo mai i le taimi nei o lo o i ai le faatoaga. O le agai i luma o le va tonu i lalo... lea sa i ai le pa povi a le Esetete Tausi i aso ia. O fanua na... pau na o fanua o loo i lalo o le Malo. O le Cornwall Estate o loo faatino ai le tatou faasao ma le tatou forestry plantation. Ia lea foi sa iai eleele sa iai i le Esetete Tausi ma o loo i lalo ole SLC. Ae e leai ni eleele tai 100 eka e pei ona e saunoa iai. Afai e te fia malamalama lelei iai, o loo avanoa lau ofisa poo le Matagaluega foi e faailoa lelei atu faafanua o loo iai i lea tulaga. Ona ou see mai lea i talosaga a...

Afioga Fepuleai Faasavalu Faimata Sua: Malie lau Afioga pe maua se avanoa. meamanu lea e le i tea ese ma ita.

Afioga Hon Toeolesulusulu Cedric Pose Salesa Schuster: Lau Afioga i le Fofoga Fatalai e leai se isi tala i tua atu.

FOFOGA FETALAI: O lea ua saunoa manino le Minisita. Ia e le mafai foi ona fai se faafinauaiga i le tulaga lea. O lea ua manino le saunoaga a le Minisita. A o lea foi ua toe tuu atu le avanoa e i ai isi taimi ona e afio lea i le ofisa o le Minisita e faalautele ma faamalamalama atili le tulaga lea. Leaga lea ua saunoa manino le Minisita...

Afioga Fepuleai Faasavalu Faimata Sua: Ioe, lau Afioga e ava lava ma faaaloalo atu i lau taitaiga. Leaga o lea ua saunoa le Minisita e leai ni faafanua tai 100 eka. Lau Afioga lea e ia te au le faafanua lea. O le ala lea o lou talanoa i ai o lea e ia te au le faafanua lea. Faamolemole lau Afioga.

FOFOGA FETALAI: Ia, lea ua saunoa manino le Minisita. E lelei le agai o lau Afioga ma lau faafanua i le Matagaluega. O le tele o tatou eleele i aso nei e tele faafanua. O le mea lea, malie, taatia mai o lea ua saunoa manino le Minisita. I se taimi lua feiloai... ona manino lea o le tulaga lea. Lau Afioga i le Minisita.

Afioga Hon Toeolesulusulu Cedric Pose Salesa Schuster: Faafetai. Ia o le sui usufono o Vaimauga ma le sui usufono o Satupaitea, atonu e te lua le i maua mai le taumafai e faapuupuu le taimi e pei ona saunoa le Fofoga Fetalai o lea na faamalamalama lelei atu ai o taligalu o lea ua uma ona tapena fuafuaga ma assessment a le Matagaluega. O lea ua faataoto ai le faatinoga o galuega pe a maua le seleni. E pei ona e silafia le tatou Tala o le Tupe lea na i ai nei le \$400,000 ia lea ua iai nei afioaga ua uma ona fai ai assessments ma o le a taumafai e faatino ai. O nisi foi... lea foi sa maua... sa avatu ai se vaivaiga i le taimi ua tuanai o tatou seleni o lo o faapea ona taumafai e saili mai ia ma faagasolo ai le faatinoina o nei vaega. Ae talitonu le sui usufono o le Vaimauga, ia atonu o e asiasi pea i ai i lou afioaga, ae ua tolu ai nei vайасо o galulue le Matagaluega o Fuagafanua e fua ma faatulaga lau seawall. Ou te le iloa po o le a le isi vaega lea e te saunoa ai a o lea ua faatino. Ae faapea foi i le Afioga ia Satupaitea, lea e silafia ua lua ai nei vайасо talu na oo atu le Matagaluega ma ua faagasolo foi le galuega lea. O lo o faapea ona i ai i le vайасо nei le Matagaluega... ae o loo faagasolo le galuega. Ae taoto mai lo oulua faatuatuaga i le... e pei ona outou saunoa i ai muamua, ia o lea o lo o tatou taumafai e faatino.

FOFOGA FETALAI: Ia ua manino lea vaega. Saunoa lau Afioga.

Afioga Hon Toeolesulusulu Cedric Pose Salesa Schuster: Ia, lau Afioga ona maea ai lea o se vaivaiga e tusa o finagalo o sui usufono. Muamua ona faafetai atu i Matagaluega o lo o i lalo o lau taitaiga mo le fautua ma le galulue aua se manuia o Samoa.

Ona ou afe atu ai lea i le tapuaiga ma le faanonomanu a si ou itumalo Aana Alofi 4, tatou feiloai pea ma faagasolo galuega fuafua mo le atinae o le tatou itumalo. Ae faafetai le tatalo ma le fautua. E asuasu atu foi malu i puega pe afai ua le atoa se auaunaga ae o le agaga ia galue mo se lumanai o Samoa ma le tatou itumalo.

E faaiu atu ai se vaivaiga i le Fofoga Fetalai, faatasi mai le Agaga o le Alii mo toe itula o le Fonousu o Samoa aemaise ou faiva mo le taitaiga o le tatou Fono. Soifua.

FOFOGA FETALAI: Malo faafetai. Malo lava saunoa i lau Afioga. Faafetai o lea ua malamalama nisi o sui sa faaalia foi finagalo aemaise nisi o tatou...ia malo faafetai. Lea ua manino lau saunoaga. Ia masalo se taimi asiisi ai sui usufono mamalu e pei ona toe lagaia mai atonu e asiisi atu o lea ua faatino le galuega a lau Afioga ma le Matagaluega. Malo a faafetai.

Ia ua tatou oo mai nei i le faafetai i le Minisita o Taaloga... O lea ua tatou feiloai sa toesea ia atonu lava ai sa faafogafoga mai i nisi foi o finagalo o le Maota. Ia tulai mai lau Afioga i le Minisita o Taaloga.

Afioga Hon LAUMATIAMANU RINGO M. PURCELL (Minisita mo Taaloga ma Alagaoa mo le Fiafia o Tagata): Faafetai mo lou avanoa. Ua faataumalama le ana nai Tofumoe pei o le tala i le uso nai le vasa. Ua emo foi le uila laulelei i Matasaua ae lia ona faaila i Mulinuu o eleele o le Alataua. E foufou foi le tofu i le vai o Tofuola nai siu o le Tuamasaga ae popoe leaga e fai foi o le Fogavai a o le Matavai. E tu lilia foi le to pei o le tala i Atua ae popoe ma maniti tino i pisaga o agaga. O lea la ua tafa manino le atamua o le taeao ua gafoalelei foi le atasina ua malama i uluauma le alofa ma le agalelei o le Atua o Sapaota o lo tatou Faavaepapa ma lo tatou Faavae mausali. Ta ia ma faapoi faailamea pei o faiva o taulasea se gagana ne i lele le laupulaa mamala ona faigata lea o peau o le tai e pei o le upu i le taisamasama. Tulou lava.

E faafeiloai atu i lau afioga le Fofoga Fetalai o le Maota, afio lau Afioga le Taitai o le Malo, lau Afioga i le Tamaitai Palemia ma le mamalu o le Kapaneta, afifio foi Minisita Lagolago. Afio lau Afioga i le Taitai o le Itu Agai, Sui Taitai aemaise o sui usufono mamalu uma o le Palestene o Samoa.

E faafeiloai atu foi i Ofisa Sili o Pulega o Matagaluega ma Faalapotopotoga a le Malo. Faamalo le pale, malo le onosai, malo le faatoatoa aua e le faigofie felafolafoaiga o finagalo ma manatu aua se manuia o le atunu. Ona o lou avanoa muamua lenei talu ona valaauna i le tofiga Minisita mo le Matagaluega o Taaloga ma Alagaoa mo le Fiafia o Tagata ou te faaleoina ai le agaga faafetai i lau Afioga i le Tamaitai Palemia ma le mamalu o le Kapaneta. Faafetai i le amanaia o se sui usufono faatauvaa o le sui usufono o Safata 2 e ala i le tou faaeaea i le valaauna ma le tofiaina o se sui o le Kapaneta. Faafetai i lou itumalo i lana tapuaiga. Susu i susuga i faafeagaiga taulagi ma o latou faletua i so o se fatafaitaulaga. O le pule mamalu a alii ma faipule, faletua ma tausi aemaise o le loaloa o le itumalo o lo o afifio ma alaala i so o se tafa o Samoa. Faafetai tatalo. Faafetai tapuai a o taumafai e faailo so outou finagalo i le Palestene o Samoa.

E momoli foi le agaga faafetai i le Komiti o Tupe aemaise o le Matagaluega o le Tupe sa iloiloina le Tala Faaopopo Muamua o le Tupe 2023/2024 mo le fuafuaina o tupe mo le faatulai mai o tapenaga amata o lenei Matagaluega. E faamoemoe o le Tala Autu o le Tupe 2024/2025 e aumai ai se atoatoa mo le Matagaluega fou. I le taimi nei o lo o tapena faatasi e le Matagaluega o Aoga,

o le Matagaluega o Tupe ma le PSC le faamoemoe aua le tapenaina o le Matagaluega fou. Ua maea foi ona faataoto e le Afioga i le Palemia faiga faavae a le Malo mo Matagaluega faaopoopo ma o le a le toe oo i ai se faamatalaga. Ou te talitonu sa i ai foi le finagalo o le faigamalo talu ai ina ia i ai se Pulega o taaloga po o se Matagaluega e taulimaina taaloga, ma e le i faigofie i le silasila mamao o le faigamalo lenei ina ua taunu i le faataua ma le faamuamua a le Afioga i le Tamaitai Palemia ma le mamalu o le Kapaneta ona o le taua mo le atunu lautele, aemaise o se lumanai manuia o alo ma fanau o Samoa. O lea ua faatuina le Matagaluega e patino i taaloga aemaise o nofoaga mo aiga, Ekalesia ma faalapotopotoga mo malologa ma gaoioiga faamalositino e pei o paka o lo o i ai nei i nisi o vaega o le atunu. E le o toe po i le silasila le taua o taaloga lea ua aapa atu ai atunu tetele, e avea ma se meafaigaluega e atinae ai sootaga lelei, o lumanai manuia e ala i seleni e faamanuiaina ai pe ausia pine i tauvaga a le lalolagi, aemaise o lona sao i tamaoaiga e ala i seleni e sasaa mai pea taamilo i taamilosaga tetele.

E tele nisi vaega sa fia agai i ai se faamatalaga e uiga i le faatulagana o le Malo e pei ona i ai Matagaluega, ae ua ou manatu e agai se faamatalaga i nai mataupu na lagalaga mai e sui usufono o le Maota i le vaisaso ua tuanai. Lau Afioga le Sui Taitai o le Itu Agai faafetai atu mo lou finagalo e lagolagoina faaiuga a le Malo e ala i le Matagaluega o Taaloga ma Alagaoa mo le Fiafia o le Tagata, ma o le faamoemoe foi lena o le Malo ina ia faigofie le fesootaiga ma tuufaatasi taaloga ma so o se faalapotopotoga e iai lona sootaga i le taaloga i se nofoaga se tasi. Ia faaleleia atili le auaunaga ma le atinaeina o taaloga ia le gata i aoga a ia faalautele ma oo atu i nuu ma afioaga i tua. O le faamoemoe foi o le fausiaina o se nofoaga faapitoa High Performance Unit po o le Institute of Sports aua le tapenaina o tatou tagata taaalo e ala i koleniga faapitoa ma talafeagai e faaaogaina ai le tomai faatekonolosi ma metotia faaonaponei, aemaise le faaleleia o tomai o a tatou faiaoga ma pulega e ala i le taulimaina o a tatou tagata taalo ma isi lava polokalame uma tau taaloga o le a taulimaina e le Matagaluega lenei.

Sa laga e le sui usufono mo Sagaga 4 le tulaga i taui mo tagata taaalo o e faamanuiaina i pine auro i taaloga i le Pasefika , o taaloga Olimipeka, taaloga a Malo o le Taupulega ma taaloga a le lalolagi. Mo le silafia o lea na faia i ai le faaiuga a Kapaneta i le tausaga 2016 ma o na faamanuiaga sa totogi mai lalo o vaegatupe a le Pulega e faatonutonuina faatulafono taaloga tau tupe po o le Cambling Control Authority. I le taimi lenei o lea ua taulimaina e le Matagaluega le talosaga i lea vaega e aofia ai pine siliva ma apamemea i lenei foi fuafuaga a le Malo ma o lea ua galulue i ai le Matagaluega i lea suiga mo le tuuina atu i le Kapaneta i sana faaiuga.

Ae o se itu lelei i faatulagana e fai i ai faamanuiaga o seleni e tuuina atu mo i latou o lo o fai ma ave sua o le atunu i taamilosaga tetele a le lalolagi ma tumatie ai Samoa o se atunu laititi i tauvaga a Malo tetele. O le tulaga e pei ona faaalia i taaloga a le Pasefika na mavae atu nei, e lua itu o lo o tauala mai ai se fautuaga i le aofai o a tatou pulega po o officials sa malaga aemaise o le toatele o a tatou tagata taaalo na malaga mai fafo.

Muamua, e le teena e le Minisita vaega e pei ona faailoa mai ai o outou finagalo a o le tasi lena taua o le faatuina o le Matagaluega ina ia galulue faatasi ma a tatou taaloga taitasi e ala i le tapueina o tagata taaaalo o lo o alaala lava i Samoa nei. O le ala foi lea na faamatuu ese ai e le Malo vaegatupe mo le atinaeina o taaloga i Samoa e le teena le auai o tama fanau a Samoa o lo o aumau i atunu i fafo ae o taaloga laiti o atu motu mini games ma taaloga a le Pasefika - Pacific Games o se avanoa lelei lea mo a tatou tama fanau o loo atinae i Samoa nei. Ae i ai le taofi na pau ia o finagalo na faaali e uiga i lenei Matagaluega fou o le Malo. E faaeteete foi i le soona faailoa atu o isi fuafuaga ma faamoemoega o le Matagaluega lenei, ona o lo o faasolo lava e fua i taimi talafeagai, e pei lava le Matagaluega lenei o le faasologa o le tagata soifua e amata mai lava i le tamai tamameamea faasolo ifo ina totolo ma oo lava ina tamoe pe a atoatoa lona malosi.

Faamanuia i lau Afioga i le Fofoga Fetalai o le Maota, lau Afioga i le Tamaitai Palemia ma Kabeneta, Taitai o le Itu Agai ma le mamalu o sui usufono o le Palemene, lou Itumalo aemaise o le faafogafoga a Samoa atoa. Soifua ma ia manuia.

FOFOGA FETALAI: Malo faafetai, malo saunoa lau Afioga i le Minisita o Taaloga faapea foi Alagaoa. Malo faafetai mo le saunoaga malamalama.

Tulai mai lau Afioga i le Minisita o Faatoaga po o se mea e agai i o le Minisita po o le...

Susuga Hon LAAULI LEUATEA POLATAIVAO FOSI: Lau Afioga ua ou tulai atu masalo o se laolao lelei lenei mo lenei Matagaluega.

FOFOGA FETALAI: Ia o le avanoa lenei o lau Afioga leaga o lea sa... ia saunoa lau Afioga.

Susuga Hon LAAULI LEUATEA POLATAIVAO FOSI: E momoli le agaga faafetai i le malama ua sola ona o le talia e lau Afioga i le Fofoga Fetalai o le faatalaula atu a lenei Matagaluega, ina ia toloia sa matou upu ma se tala a o faagasolo le tala aloaia a le tatou Malo.

E manatu foi o lea ua amata ona valo manu o pouli, faasolo foi le la e gase lana taamilosaga, a o lo o tumau pea le alofa ma le agalelei o le tatou Tapaaau Sili i le lagi, o ia o le mataisau o tausamaaga. O Lona alofa tunoa o lo o tumau ai pea le aoina o le masina ma le soifua laulelei i le tatou Palemene.

O lea ua faaseela i Falelatai o le fale na faafaillele ai le tama a Satuala, sasa foi le aveo i peipeiga o vai o le tausala i niafane o le Aiga Salevalasi, ua emo ai a o se tioata mataua o ulugalu sa faalepa ai foe o aleaga i tuleiga ma saunoaga o le taeao ma le aso o lea ua tatou tulalata i le folasaga faai a le tatou Malo. Sa o matou seu ai i Falemua a o seu i Faletapuai ma Falevaai le faafofogaaga a le Maota Fono lenei aemaise foi le tapuaiga mau faafofoga mai a Samoa i ona tulaga faalupe.

A o paia o Tiafau ou te faatulou aua o le Malae o Tofiga a Samoa, o le Malae o le taga mamanu a Samoa, o le malae na totofi ai Aiga ma Tupu o Samoa, aua

le afifio o le paia o Aiga e fia, o Aiga o Tupu, Aiga o Nofo, Aiga o Papa ma Aiga na Tafaifa, tainaneAiga nai le ite a malama ua suluia ai Samoa i le ao o le malamalama, sosofa le lafala ma le laafa ae aumai le Atua e fai ma tatou Faavae. Le Malae lena o loo faamanusina ai le paia o Aiga ma latou Tama, Tama ma o latou Aiga, le Ssoga a Tumua ma Pule, Ituau ma Alataua, Aiga i le Tai ma le Vaa o Fonoti, tainane le tapuaiga mau a le aufaigaluega totofi o le Atua o lo o nonomanu ia tatou maua ao ma iu o Malo.

O Tiafau o le Malae e pele i o tatou loto, e pele i so o se Samoa, pele i le atunu, pele i le aufaigaluega a le Atua, pele i upu pele i tala, pele i faamatatalaga pele i faatinoga. Aisea? Leaga o le Malae na saili ai le tofa a e ua tofafa mai le atutia o tatou matua na asaina le gasu o le taeao e i ai le taeao lenei ua tatou umutalatala ai ma tatou vaavaai i le alofa faafualoa o le Atua i Lona Palemene. O le Malae na fano ai le soifua ma le ola o tatou matua, Malae na savavali ai puapuaga ma faigata, o le Malae na saili i le toto, tafe ai le vai lea ua vaimagalo ai aai ma finagalo o le atunu aemaise le Palemene o Samoa.

Lau Afioga i le Fofoga Fetalai ua ou manatu e momoli atu pea le mau lena a lenei Itumalo i Aiga Sa Tupua ma Aiga Sa Malietoa ma le mamalu i le Faletolu, le paia i le Aiga o Mavaega, le tofa i le Tuua, Falelima o Sanaeseese, ma le Gagaifomauga 3. O le matou manatu autu lena lau Afioga i le Fofoga Fetalai. O le Malae o lo o faamanusina ai le tofa a le Malo o lona Palemene o ai? O lau le Afioga i le Fofoga Fetalai, o le Maota Fono o Samoa, afioag i le Sui Fofoga Fetalai ma le mamalu o le Palemene lea e ee atu, Afioga i le Taitai o le Maota, Afioga i le Tamaitai Palemia ma Minisita o le Kapaneta. Le Afioga i le Taitai o le Itu Agai, le afioga i le Sui Taitai ma lena itu o le malu o le atoatagi ma le atoausu lea e taui ai le filiga a Samoa, tatou omai ai i inei i lenei Paeaiga XVII. Lau Afioga i le Fofoga Fetalai viia le Atua faafetai i le Atua i Lona alofa ma Lona agalelei ua taitai mai le tatou soifua ma le ola i le savaliga i lena tausaga lea ua tatou taunu mai i lenei tausaga foi aoina le masina i mea uma ua tatou vaavaai.

O lea ua logona Samoa atoa i le tofasaili na fofola ai le fala ma fulifuli laaumamafa le tofa i le Maota, aumai avatu sua atu le aulapauta sua le aulapatai, momoli lapalapa o malo ma mea uma ua tatou talanoa i ai i le a? I le tamaoaiga o si o tatou atunu, aumai ai le faatuatuaga mo tatou i lenei Paeaiga tatou te omai se i o tatou fale po o le a le mea e taitai ai Samoa i lona manuia nei ma le lumana. Ae faaleoina pea le agaga faafetai i lau Afioga i le Fofoga Fetalai ona o ou faiva alofilima.

E le faigofie lau galuega, ou te malamalama lelei i le aasa o le Nofoa lena e te afio ai. A i ai se isi o le Maota e malamalama atili pe sili atu foi leaga sa ou tautua i ina, e le faigofie ou faiva ae faamalo atu lou onosai. O le ala foi lea malie lau Afioga a ou vaai atu loa i ni mea e le talafeagai, e tatau lava ona ou tulai atu leaga o le mamalu lena ma le maualuga lena, le taualoa lena o lea e puipui ina ne i malepe le oopopo o le Palemene o Samoa ma lona tamaaliiaga. E faafetai atu i lau Afioga i le Tamaitai Palemia, Minisita o le Kapaneta, lau Afioga i le Taitai o le Itu Agai, Sui Taitai ma lena itu o le malu ona ua faaalia lo outou finagalo i lenei Tala Faaopopo o le Tupe. E le faaitiitia foi le agaga faafetai i e aufaigaluega a le Malo, Ofisa Sili o Pulega o Matagaluega,

Faalapotopotoga Tumaoti seja oo i Kampuani Tumaoti ma le loaloa o tup ma ee o tamalii ma failauga, faletua ma tausi, saoao ma tamaitai o lo o o outou velo le maa ma outou velo le aso aua le tautuaina o Samoa. Faafetai.

O lenei Matagaluega o Faatoaga ma Faiga Faiva e le toe faamatalaina paia o le Maota, o le Matagaluega ua fitoitonu ma lefafagaina o le paia ma le mamalu o Samoa atoa. O le sami, lauelele le vateatea ma mea uma e taumafai ai aua le fofoga taumafa o le atunu. Ma e momoli le agaga faafetai i le faafogofoga tapuai mai a Samoa atoa, le aufaifaatoaga, le aufaifaiva, le aufailafumanu o atinae uma o lo o outou galulue ai i Itumalo e fia o le atunu. E momoli atu le faafetai tele ia au nei ma le Minisita Lagolago ia Maiava ona o la outou lagolago mai i lenei Matagaluega. E faafetai i lo outou logona o se upu ma se tala e pese atu ai i le ao ma le po, tatou polokalame faalauiola ma mea uma o lo o matou auina atu. E tasi lava le gagana ia mau le atunu, maua taumafa i le atunu, gafataulimaina le atunu e tua i ai a tatou mea e fai, o faalavelave, faaulufalega, faaipoipoga, aso fanau ma maliu. O fea e tua i ai? E tua i tatou atinae o faatoaga ma faigafaiva. O mataupu na laga e avatu pea lau tuualalo i sui usufono mamalu uma o le tatou Maota. E 51 Itumalo e tatau foi ona 51 a tatou uluai selesselega o le polokalame na faamaite ina ia faaosofia lagona o si o tatou atunu tatou te agai tatou te toe galulue i mea e tua i ai le tama, tina, fanau, nuu, itumalo ma ekalesia. E leai se isi. O lea tatou te taualaga nei i le tau o le soifuaga e leai se mea e mafai ona tatou toe faia i le tau o le soifuaga, we can't do anything more about it. Ua pulea mai fafo lo tatou ola, ua pulea mai fafo mea tatou taumamafa ai, ua pulea mai fafo mea tatou feoai ai, a o le tatalogo masefau a lenei Matagaluega malie Itumalo uma ia outou alofagia le faatalauula atu a le Matagaluega. E tatau lava ona i ai le taimi e aofaga potopoto ai e pei o le mataupu ua uma ona avatu e le tatou Matagaluega, e le toe tapuvae tasi mai ae tatou o e faatino uma tatou uluai selesselega i nuu ma afioaga.

Ua uma ona faatino atu \$500,000 le tino i tupe \$10,000 a le Itumalo alu le vaega muamua tou saunoa mai e aua le toe avatua ni meafaigaluega ae avatu le tupe lea ua faatino le tupe.

O le tausaga lenei na o le 3 Itumalo ua faatino, tatalo atu ai le agaga faaaloalo e le aoaia e Laupua Tamafaiga i tatou Itumalo saunoa foi le sui usufono o Falelatai ma Samatau lea ua aumai lau tusi ae le i taua mai se aso. O lau fautuaga faaali mai i le tatou Matagaluega ma le Ofisa le aso e te finagalo i ai o atu loa le tatou Matagaluega e faatino.

O tatou mailei puua, o se tasi lenei o faafitauli o lo o feagai ma le aufaifaatoaga toto nei ae osofai i lea vaiaso, tele puua taaloa, tele povia taaloa, solofanua taaloa ua latou lepetia le taumafai atu e faatuputeleina a tatou taumafa. O le tatalo foi lea e faaui atu i inei, finagalo malie Fono Faavae uma o le tatou atunu se i outou alofagia fai se faamalosiga o le tuusai ma tuupa o a tatou mea fafaga.

Aua e uma ane lava e maumau le taimi e avatu ai tiapula lea e loloma nei le 500 afe tiapula a le Matagaluega e tufa i le masina fou, ae ua ou fai i ai e taofi laitiiti aua e maumau le taimi, maumau le taimi pe a latou le galulue faatasi e fofo le mataupu lenei o le lamatia.

O le ala lea lau Afioga o lea ua faasolo le tatou Matagaluega i tatou mailei puua, tasi lea fesoasoani ua manatu o i e maua ai le toomaga mo tatou, maua

mai ai le fesoasoani mai se tasi o Faalapotopotoga a le Malo o Ausetalia maua mai ai tatou mailei e 10 lea ua taunu mai.

O le isi 10 o fesoasoani a le FAO. O nei taumafaiga uma o le agaga lava lea ina ia mau le tatou atunuu i taumafa. E pei ona fai atu a lava lava mea e tua i ai le aiga i meaaano ma aano o manu fasi ou te talitonu o le tali lena o le faaititia o le tau lea tatou te atugalu nei i ai o le tau o le soifuaga.

E le faaititia ai o lea e uunai atu lava e le Matagaluega fesoasoani i Faapotopotoga aua tasi lena pepa lea na ou tolofia ai au upu analieila o le pepa e tatau ona faailoa atu ia i latou o lo o i ai mafutaga faalapotopotoga tumaoti o Tina ma Tama i totonu o le tatou atunuu Women in Business development.

Na maua mai le fesoasoani e \$263 afe mo le fia tuuina atu o le taimi lenei toe \$131 afe o loo faatali le Matagaluega i lipoti ma toe tuuina mai, Samoa Women Association of Growers, toe \$107 afe o lea e fia tuuina atu a o lo o faatali foi le Matagaluega. O le tatou SROS e \$124 afe, o le METI e \$73 afe, Asosi a le Aufaifaatoaga i Salafai e \$63 afe, Livestock Famers Association e \$42 afe, Tilapia Farmers Association e \$45 afe.

Lau Afioga i le Fofoga Fetalai e manaomia le lagolagosua faatasi e le gata i le aufaifaatoaga taitasi lea ua faasoa atu e fesoasoani i Fono Faavae ae ese foi le mea lea e taamilo ai le galuega a le Matagaluega saili tupe le... ma le World Bank gather a le tatou SAFPROM e fesoasoani atu mo le tatou faamoemoe.

O luitau lau Afioga i le Fofoga Fetalai o le mea manino ua leai se aumaga e tua i ai Itumalo taitasi. E tele ma anoanoai le tatou manpower lea ua ave i fafo, ma e avatu le faatuatuaga i lau Afioga i le Minisita o Tupe, o oe o lo o nafa ma le tau faafoefoeina o faiga faavae fou lenei ua tatou lauliliu. O le a se aiaiga e mafai ai ona faatulaga le mea lea ua leai ni tagata, toe galueaina le tele o le vao ma atinae sa masani mai ai ae na ona ona faatulaga atu faapena.

O vaafagota lau Afioga i le Fofoga Fetalai, o lo o taumafai pea le Matagaluega ona o le tele o faafitauli. O lena tou te silasila i luga o le apitagalu lea na paulia ai le vaa lea na mafuli i inei le vайaso lea na tea atu nei. Aisea? Ua taula piifa piiono piiiva vaa ua le ofi le uafu o lo o feagai ma le Afioga i le Minisita ia Olo, a o le tatalogo a Masefau o lea lava e avatu le talosaga ina ia fai se uafu faapitoa mo vaafagota lava ia. E tele o persianers tetele ia e omai e maua ai le tai 56-60 tatou container ia e le o mafai ona aumai e omai o la ua tu le meli, pe tu le vaa o oloa toe foi o loa o saati i isi atunuu a o lo o anoanoai le tupe sa tatau ona aumai i inei, filei ma fai loa ma maua isi tatou tupe faasili mo le tatou Matagaluega. Fai mai foi nisi o le tatou atunuu ua taugata tele le tau o ia i le maketi ua au le pogé i le \$100 oi le paumalo tulou lava, ioe ume. Ou te le faaseseina ae ia outou malilie se i inu tasi foi le aufaifaiva latou. A o lo o i ai le auala o lo o taumafai e fofo o le liuliu lea o le tatou tulafono e faataga ai se pasene o ia ia e maua mai tatou vaa lapopoa nei e faatau i le atunuu. Ua na o le fai o tatou vaa ia fafao i container ma lau a o lea tatou te fia taumamafa ai ae leai se auala e mafai ona fai ai. E le o toe mamao ae maea faiga faavae fou la ua talosaga i le Loia Sili, tatala le avanoa e aumai ai le pasene o ia ia e maua mai i fagotaga a tatou vaafagota le wanon ma le le deep sea se i o tatou taumamafa.

O le tulaga lava lena i le mea masani aua o lea foi e logona le saunoaga a le tatou price control board. Na tatou aveeseina aisea? Ua tatou o i le supply and le demand lea la ua tatou oo tonu mai lava ua le fetaui le supply ma le demand ua i ai le aufaipisinisi ua ova, tulou lava ou te le fai atu le upu ae mafatia ai le atunu.

Lau Afioga le Fofoga Fetalai o le tatou taligamalo, e mafaufau pea lenei Matagaluega po o le a se tali atu. O le tatalo ua ave i le aufaifaatoaga uma a Samoa, fualaauaina, fualaau taumafamata, fualaau faisua ma meatoto toe valu masina oo i le tatou taligamalo.

Ou te tatalo atu tautuana ma le aufaifaatoaga le tatou taligamalo, e le toe tau faafuluina le aufaifaatoaga ua outou silafia le mea e tatau ona fai tautuana o le lalolagi lea la a omai ia tatou. The world is gonna come here and the King will be here to meet up with our Kings, ioe. O le tatalo lea faafogoa mai le tatou aufaifaatoaga ia lava mea uma, lava le fofoga taumafa o le atunu. Fuafua le Matagaluega e tau avatu nai tulaga e teuteu ai le tafaala. Ua outou vaai i le suiga o le maketi i le taimi lenei e le toe fia sau tele se isi i le maketi, ua na o le sii ifo a o le tagatalo fola i luma o le auala, alu loa. Se esi, fruits mea uma fagusea, fagugau, vaga, tuitui everything mea uma. A o le faamoemoe o le Matagalulega, faatu lelei ni tatou faleie, lelei, laulau, nofoa, tusi ai Faatoaga ma Faiga Faiva a le tatou Atunuu ne i omai tatou Malo o la e faapena ona avatu le tala lelei mo nai a tatou faatoaga.

Ua fuafuaina foi e avea lenei avanoa e avatu ai le talosaga aloaia ona o le tatou uluai seleselega lea e fuafua nei o le a tatou talimalo mo le vaiaso o le tatou CHOGM lea ua manatu ai Maiava ma au nei ma le Pulega o le a se i sui laitiiti. E tatalo atu ai i le Fale Vaimauga 1, 2, 3, 4 ma Faleata 1, 2, 3, 4, afioga i Taitafono o le a fai le tatou uluai seleselega tuufaatas, fai le tatou show tele e fai i Malaefatu e omai tatou malo silasila i ai mo le vaiaso atoa. E le taofia lo outou fai mea lelei, o lena ua tofu a outou ma le paketi e uma tufatufa atu le fesoasoani a o le faamoemoe lena ina ia matagofie le tatou taligamalo ma le tali atu a Samoa. Silasila le lalolagi, o le tatou solution lea i le inflation lea e tau fai mai ai le aualii lea e le iloa po o le a le mea e fai, a o le tatou lea tali atu mo lena faamoemoe.

Ia, e manatu lau Afioga pau ia o vaega sa laga seiavagana le mea lea na saunoa ai le Afioga i le Taitai o le Itu Agai o le chemical lea e faaasu ai mea e ave i fafo, ua logoina au e le Matagaluega e taunu mai nei i le aso 24 Fepuari le tulaga o le vai lea e togafiti atu ai le tatou quarantine.

Mo le silafia aloaia e le tatou Maota lau Afioga i le Fofoga Fetalai ua suia nei le igoa o le Quarantine i le Biosecurity Samoa ma o lo o iai tulaga o faamaumauga ina ia lifi le level. Ua uma le taimi tatou talanoa i le quarantine o lea ua tatou talanoa i mea tau biosecurity e mafai ai ona malupuipuia mea ia e talafeauga ma le saunoaga a le Afioga i le Taitai o le Itu Agai.

Lau Afioga i le Fofoga Fetalai ae lei faaiuina se upu a lenei Itumalo...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia, malie lau Afioga i le Minisita o Faatoaga ma Faigafaiva. Se i tulai mai lau Afioga i le Sui Taiai.

Tofa Hon Lauofo Fonotoe Nuafesili Pierre Lauofo: Malo lava faafetai, ua tele a vaega ua o'oo'o iai le saunoaga a le Afioga i le Minisita, e manaia foi ia i le faalogologo. ...I le tele o na mau [.....] a ua na o le tasi a le mataupu lea sa ou fesili iai, la e silafia e le maota tatou mailei foi lea mo puua aivao. Aua o lona uiga o le isi sefulu ma le isi sefulu faasolo le tatou polokalame, ia o lea ua e saunoa manino i le taua ma le aoga o tatou mailei ia. A o le fesili lau Afioga ia aua o lona uiga lea o le a tele nei tatou puua aivao e maua. O le a se fuafuaga i se mea e faaaaoga iai puua aivao nei aua leaga o lea foi la o le a aumai, aua leaga e pau uma a i totonu o le lio lea mo atinae ma faatoaga. Ia aua o lona uiga, ola ola mo le puua aivao lea o le a aumai nei. Ia ae o se isi mea aua e le faapea o le a aumai....ia o lona uiga la...ou te leiloa pe lafoai i se mea pe o le a le mea o le a fai iai. Ia pei o le....aua e tele ia ou mafaufauga ma aikia, aikia lelei sei aumai ai se fautuaga o lea e fia faafogofoga i le tatou agai i luma i lena foi atinae.

FOFOGA FETALAI: Ia malo faafetai.

Tofa Hon Olo Fiti Afoa Vaai: Lau Afioga i le Fofoga Fetalai.

Afioga Lupematasila Galumalemana Tologata Togia Tile Leia: Mo le faasaoina o le taimi o le Minisita.

FOFOGA FETALAI: Ia malie lau Afioga i le Minisita sei tuu atu le avanoa i le sui usufono o Falelatai ma Samatau leaga o lea foi sa saunoa, lau Afioga i le Minisita.

Afioga Lupematasila Galumalemana Tologata Togia Tile Leia: Tulai atu e momoli le agaga faafetai tele i le Afioga i le Minisita o lea ua maua o le a fuafua le uluai seleselega a lenei itumalo. Ae o le a silasila le Afioga i le Minisita i le malosi o le Itumalo lenei i le itu o faatoaga. A o le fesili lea e tau avatu leaga o lea e lei saunoa iai le Minisita o le tatou Export Authority leaga o lea ua matua o lava lou Itumalo e fai faatoaga. A o lea ua matau atu i le taimi lenei ua pei ua tau poloka le maketi e ave ai i fafo, o lea foi la ua ou vaai i le taimi lenei ua fai si tele o le talo lea ua faatau i le maketi ma autafa o le auala. Ae pei o si vaegataua lena e avatu ai se faafesili mo se faamalamalamaga a le Afioga i le Minisita.

FOFOGA FETALAI: Ia, se i tulai mai lau Afioga i le Minisita o Galuega Tetele.

Tofa Hon Olo Fiti Afoa Vaai: Lau Afioga i le Fofoga Fetalai, leai na o lou fiamalamalamava i le tulaga o le biosecurity lea ua saunoa iai le Afioga i le Minisita, ta te le malamalamava foi i mea ia. Ae poo le mea lea sa faaasu foi, pe

tolusefulu tausaga ta te alu atu a ta ia ma faatau atu la ta mortein foi lea e faga ai laka ietoga. Poo le mea tonu lena lea ua e suia nei i le tulaga lea ua iai nei lau biosecurity faamolemole.

FOFOGA FETALAI: Se i tulai mai lau Afioga i le Minisita.

Susuga Hon LAAULI LEUATEA POLATAIVAO FOSI: Ia o le a amata atu i i le tali. Ou te le manao e tau le pua ma lafo pei o le upu na ou faia i le Palemene ua fai le auala. Olo na mortein mai lava i le luasefulu tausaga talu ai la e mortein. Ioe. A o lea ua fai le tatou faiga fou ona o lou finagalo e aua nei matou toe iai i luga o le uafu lea e taofiofi ai matou atinae. Ua e finagalo e aveese uma matou mea faaasu ma ogaua ia e susunu uma ai mea foi ie. Ae ou te talosaga atu lau Afioga sei e alofagia e manaomia le matou service i le uafu aua uma containers ma mea faaletonu o lea e omai, o meli ma mea uma, e faapena atu se tala. A o lau saunoaga, e sao lau saunoaga ae ou te le manao e toe tau le pua ma lafo o lea ua fai lea auala fou ma le lelei.

Falelatai ma Samatau aua e te popole pau lava o le feeseseseaiga ua e tusi mai ae le atoa lau tusi, a na e saunoa mai o le aso lea ua fai. E te le saunoa i le ta Itumalo i mea tau faatoaga ma le export because that was my life, mai aumoe malae tau i pata, tua o Siufaga, tua o Samatau. I was there. Ioe. E leai se iota o fanua la e i uta, la e faafogofaga mai le Itumalo, la e faafogofaga mai le ta Itumalo mai aumoe atoa sau e tau i le mauga mutu na fai ai le tuaoi ma Faleaseela e leai se mea na ou le savali ai. Ou te malamalama lelei i le tatou Itumalo o se tasi o itumalo na tele le sao e oo mai lava i le aso, aua e te popole.

O le tatou export authority toeititi lava uma, lea ua e vaai i le taimi lenei na omai le Faigamalo na o le lima ea pe ono container, o le taimi lenei ua luasefulu ma ona tupu container o lea e lau i fafo. A o le apaapa lea e fai ia lava muamua taumafa i le atunuu, service muamua a tatou i inei. Our food service and our food security is our priority. O le tali lena o le mea lea tatou te faimai ai nei, lau mai container falaoamata, lau mai container alaisa, lau mai container moa. O le a? O lefafaga ia lava a tatou moa. Luasefulu ma ona tupu afe tamai moa ua uma ona avatu, ou te le manao e tau talatala nei tei ua outou faapea ou te sau ma vivii galuega a le matagaluega.

La e faafogofaga mai le aufaimoa e lei iai ni tamai moa faapea sa fai muamua, la ua faatu le feed mill. Ua a nei? O la e lava e unai atu lava, unai atu lava, tai sefulu ma ona tupu afe moa la ua o toeititi a taumamafa moa nei, alu atu ai ma le taga meaai e avatu fua ae na o le \$2 i le moa. Ia sei outou silasila la iai. Ae o le mea lenei o le tatou fua o faaeleeleaga e le taofia, ananafí na matou talanoa foi ma isi au exporters fou mai Christchurch, the door is open. Sau ou te sainia lau export permit ma ave au talo. Pau lava le mea lea e naunau iai i le taimi lenei ia lava, o le taimi lenei e le o lava mo le tatou export market. O le upu tautino lena. Ae o le tatou export authority tatau ona tapena, o se mea na amata i ina e lei faauma lea ua faauma. O le uiga lena o le tatou galuega, e aumai ma avatu ma faatulaga.

Lau Afioga i le Sui Taitai ia aua e te popole seiloga o se Itumalo e faaletonu mafaufau ona maua mai lea o le 10 puua i le mailei ae ave tiai. Ia, a mea o le

saumolia lena o le Itumalo lena e malamalama Itumalo. Satupaitea le isi itumalo taumafa puua la e iai nei i mailei puua, e le avea e le matagaluega. O le uluai sefulu muamua na maua i le tataoga i Salelologa na ave uma lava, taumamafa e na gaseseina e le toe tapa e le Malo. Afai lava e maua ai le sefulu puua poo le sefulu povi mea na a le itumalo, e le faapea e toe tau faiatu le atunuu.

Ae o le vaevaega la o tatou mailei puua, o lea ua aumai tou tusi ua ou vaai le vave o le tusi ina ua ou toe faiatu e aumai tou tusi. O le 20 lea o le 20 lava lea e patino i le matagaluega, e faasolosolo uma aua e le faapea e tatao tasi pe tatao faalua, e tatao faasoloatoa. E taamilo le cycle o le tataoina o mea nei aua e uma atu nei toe faasolo, toe faasolo, toe faasolo seja oo lava ina matua pe a i lalo le tulaga o puua taaloa ia ma lagolago e Itumalo ia tulaga o le taaloa o tatou meafafaga.

Afioga Hon Lautafi Fio Selafi Purcell: Lau Afioga i le Fofoga Fetalai.

Susuga Hon LAAULI LEUATEA POLATAIVAO FOSI: Ae faafetai mo i latou ua aumai ia le tulaga o le talosaga i mailei puua.

FOFOGA FETALAI: Ia o le a le mea....ia se i saunoa lau Afioga leaga o lea ua tau lou Itumalo.

Afioga Hon Lautafi Fio Selafi Purcell: Ioe.

FOFOGA FETALAI: E tatau ona e fafia o lea ua tau lou Itumalo.

Afioga Hon Lautafi Fio Selafi Purcell: Ioe o lea ou te fafia, o lea ou te tu e faailoa lou fafia lau Afioga. Faafetai i le Afioga i le Minisita, e saolele lava o lou itumalo le isi itumalo lea na tatao ai pe lua ea mailei na tatao ai. Ia e sao ai ua ta fiu e ai puua, ua ou fiu e tetee atu le tele o le puua aivao la e lau mai, ia ua fafia le Itumalo i le tulaga na oo iai. O lau talosaga la i le afioga i le Minisita mailei e lua lea na avatu tatao i Satupaitea, la ua ou faiatu tatao ai pea i ina mo le isi luasefulu tausaga aua le toe aumaia o lea ua iai ia mailei fou ia ua aumai. Ia o le talosaga lea lau Afioga, faafetai.

FOFOGA FETALAI: Lau Afioga i le Minisita.

Susuga Hon LAAULI LEUATEA POLATAIVA FOSI: Ia, malie ia lau Afioga o le tatou motutele i Salafai e luasefulu Itumalo e ono ona pule e aafia ai lau Tofa i le Vaimalae Asiata. E tiga lava ona ou iloa e tatau ona e mulimuli ae na faamuamua atu lava le tatou Itumalo ma Asiata Selesel. Ia ae faafetai o lea ua e molimau, musumusu ane i le Sui Taitai e moi mea ia ou te faiatu ai ina nei uma ane foi faataaloga i vai, ia e faapena. U i o lea lau afioga i le amomua a le Tuiatua ua tusi lou Suafa i lalo e le o oe ae o lou alofa i le Itumalo lea ua mafua ai ona avatu ma lou faaaloalo atu i lau Afioga. Faai se tala a lenei Itumalo...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetatalai.

FOFOGA FETALAI: O lea ua saunoa manino le Minisita.

Tofa Hon Lauofo Fonotoe Nuafesili Pierre Lauofo: Leai ua ou tulai atu e faamauina lau faafetai o lea ua tusia le igoa o lenei Itumalo. Ae faafesili atu faamolemole lau Afioga i le Minisita o Faatoaga, la e fesili mai le aufai pa moa o si o matou Itumalo sina au saunoaga faamalamalama, ua lotovaivai foi i le tatou uta fuamoa lea na ave i Amerika Samoa ua avatu pei ua le faaaogaina i o. O lea la poo le a sau saunoaga i se mea e toe... pe i ai sina mea e toe faalelei ai le tatou atinæ lea ina ia talia ma faatau atu i o ia tatou fuamoa ia ma talia lelei.

FOFOGA FETALAI: Tulai mai lau Afioga i le Minisita.

Susuga Hon LAAULI LEUATEA POLATAIVAO FOSI: Faafetai e tatau lava ona faamalamalama lelei. E le o iai se mea o afaina ai le tatou aano o manufasi, tatou fuamoa ia e ave i Amerika Samoa. O lo o tatala le avanoa i le tulaga i consumption lava ia a le tagata ia e faaaoga ma o lo o toe iloilo le tulaga faapisinisi. Tatou fuamoa la ia e aveatu i Tutuila ma Manua e le o ni fuamoa o tatou lafumoa ia, le tatou free range. Leai e na o fale fuamoa lava ua certify e iai le fale fuamoa a Frankie ma le fale fuamoa a Ah Liki. O falemoa na ua uma ona omai lelei le asiagiaga a le MAF a Tutuila ma Manua ma le vaega mai Amerika e certify muamua. Ia o le faamalamalamaga lena, o la a e alu. A o fuamoa ia e maua ia tatou free range o mea na e taumamafa ai le atunu, tatou te o a ia maua ia taumamafa fuamoa uma le atunu. Ioe. O le agaga lena ma le faamalamalama atu.

Lau Afioga i le Fofoga Fetatalai...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetatalai tulai atu faamolemole i si mea lea laititi.

FOFOGA FETALAI: Ia o lea ua tele avanoa e avatu lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O lau fesili mulimuli a lea leaga o lea sa taua e le Minisita aano o manufasi.

FOFOGA FETALAI: Semanu a o lea o le a e alu i lau fesili mulimuli leaga e iai lau saunoaga lea na fai i le amataga. O le a e le popole i le gaogaosa lea sa e saunoa iai. E mafai ona fai se isi au faaupuga e toe sui ai lea faaupuga, o le gaogaosa.

Tofa Hon Lauofo Fonotoe Nuafesili Pierre Lauofo: Ia o isi mataupu sa afea i le saunoaga a le Minisita.

FOFOGA FETALAI: Ia e le o se gaogaosa o lea e faafofoga le Afioga i le Minisita o lea e faafogafoga le Maota leaga e le gaogaosa uma le saunoaga a le Afioga i le Minisita, o mealelei mo le atunu. Ae sina upu e te saunoa mai ai semanu e lei toe tuua i le Afioga i le Minisita.

Tofa Hon Lauofo Fonotoe Nuafesili Pierre Lauofo: Ia, a foi la o le tulaga lena o mataupu ia na saunoa iai a. Ou te le i fai atu e gaogaosa le saunoaga a le Minisita o mataupu ia sa agai iai lau tala. Ae o lau fesili i lau Afioga, o le tatou aano o manufasi lea foi ua aumai leaga e taua tele le mea lea, e taua tele. E tatau foi ona maua se maketi i fafo. Le tatou fale fasimau foi lea sa faapea e fausia i le tatou poloketi a le SACEP ia lea la na le taunu. O le a se faamoemoe o iai, e faataunuina i se taimi. O le a le tulaga e iai ina ia omai foi la le vaega lena mai Amerika o le USDA ea poo le a le igoa e omai e asiasi mai ina ia faamaonia ma pasia ia ona tatala foi lea o lena maketi.

O le fesili lena lau Afioga.

FOFOGA FETALAI: Tulai mai lau Afioga i le Minisita.

Susuga Hon LAAULI LEUATA POLATAIVAO FOSI: Faafeai lava i lau Afioga, e iai a le faalele e iai foi le matau. O le saunoaga foi a le Minisita lea e malu ae ivia, e le gaogaosa sau upu poo sau tala. O le ala foi lea sei faaiu atu iai lau upu i le saunoaga foi lea na fai anala ou te manao lava e aveese ma faamaumauga a le Maota leaga o lea foi ua amata na pepese mai ai i latou, tulou lava. E faatoilaloina ai ma faatauvaaaina ai le tatou Palemene.

O le tulaga i aano o manufasi pei ona ou faiatu la e ave i fafo, leai a se mea e tasi o taofia. Faatoa foi mai nei le Afioga i le Tiakono Toeaina ia Seuamuli ma le Afioga i le Tiakono Toeaina o le Vaa o Fonotia ia Mauu na o ma ave uma fasipovi e fai ai le oso mo le mafutaga a Toeaiina o le EFKS ia ma Kanana Fou. E le o ni mea la e o e faatau a o mea e ave ai le saumolia a tatou tagata e ave ia tatou uso la i o i le mafutaga a le Ekalesia. E pei o le ala lea o lou faiatu o lo o manino ma malamalama uma le tulaga lena.

O le a foi le isi mea le na e saunoa mai ai? Faafetai ua e malamalama ao tulaga uma ma le faamoemoe ia aua lava nei i ai se manatu e oti i tua ia uma i le Palemene uma ae aua foi tou te o e lalafi i tua o fake pages ma tele mai isi tala.

Lau afioga i le Fofoga Fetalai e faaiu se manatu o lenei itumalo, a matau i le faafogafoga a Samoa i se matou tautaulemau ma se matou apaapa atu lau afioga i le Fofoga Fetalai. O le gagana i le Palemene o Samoa ou te tatu pea i le too ma ou tepa i le ata i le faasologa Nofoaiga o le tatou Maota Fono lenei. O le nofoaiga uigaese lenei ua o tatou vaaia ai i mea nei sa o tatou le manatunatu ma o tatou leiloa o le a tatou oo i ai.

A manatu lau afioga i le Fofoga Fetalai i le tafailagi ma le social media talofa e i le atunu, talofa e ia Samoa ma lana tapuaiga. Lau afioga i le Fofoga Fetalai e le o ni upu e avane ai. E momomo le loto ma e matua tau le tui i le fatu i le mea ua oo i ai le gagana, le gagana lea ua liaina i vao ae puaina i ala felauaiga o upu ma tala.

Lau afioga i le Fofoga Fetalai e le faaloaloa vale Samoa ua iloa ona Aiga ua iloa Tama o le atunuu e tala tofi, e loloto le moanauli lea ua iloa ala o i'a, e filifili le vaosa ua iloa mamalu ma paia e malu ai le atunuu. Peitai e na ona ou piipiama po o le a se faiga e tatau ona fai a'i lau afioga i le Fofoga Fetalai, o se mea e tatau ona o tatou tilotilo faatasī uma i ai le Palemene po o lea le fofo o le mataupu lenei.

Ua lau atu ua lau mai ua lau ifo ua lau ane. Aisea? Ua le mapu ua le malu le oo popo i le Maota lenei aemaise o lea e lalamua ai Suafa o le Maota lenei. O ta ita ia e na o le talimalu lava, talimalu lava le au ona o tiga ma faigata o upu ia e faalele. O tuuaiga ma mea uma o lo o agai mai ma le tatalo i le Atua e foai mai le loto fou le loto malosi ma le loto faamagalo. A o le itu sili lau afioga i le Fofoga Fetalai o lea e amatamea atu i nei i le Maota lenei e fai ma faata i le atunuu. Afai ua faigofie na gagana le mafaufau Taitai o le atunuu e pei o le selo i le tapuaiga a Samoa o lo o tapuai mai, e le mafai ai ona nofonofo lou sui usufono aunoa lou itumalo Laauli ia e tautala i le mea lenei leaga ua oia le va. Ua malepe le taualuga o le pou tutoa lea o le Maota o Samoa e faalalago i ai tatou pou lalo. Ua a nei? Lau afioga i le Fofoga Fetalai o si a matou upu faaiu lena. O le igoa o le malaefono o lou itumalo o Malaefilogia e faapena se lagona i le mea lea ua i ai i le Maota. Ua filogia le Maota filogia le Maota i tulaga le talafeagai ona o le iuga o le Faamasinoga. E le talafeagai le tatou toe fono faatasī ma i latou ua faamaonia a latou soligatulafono. Talofa e i le maimoa mai a Malo Temokarasi ma le CPA a le Lalolagi ma Palemene o lea atunuu. Talofa e what happened? Ua tatou talia. O fea le tatou Rule of Law? O fea le tatou upu na fai? Ua tatou talia, ua tatou talia ia tagata solitulafono e fai Tulafono o le atunuu?

E naunau le aila i vaitafe, naunau le mutia i le sau...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai.

Susuga Hon LAAULI LEUATEA POLATAIVAO FOSI: Lau afioga e momoli atu le tala ma le upu lena a si ou itumalo, alofagia a alualu Taualumaga o le Apili lenei ae le tau le mamalu o le Palemene lenei. Lau afioga i le Fofoga Fetalai o na e i ou aao le malu o le Palemene mo le lumanaí, ia aua nei mama i oa ma mama italoa le mamalu ma le paia ma le maualuga o le Palemene. O ai? O Aiga ma a latou Tama...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai pe maua se avanoa.

Susuga Hon LAAULI LEUATEA POLATAIVAO FOSI:o Tama ma o latou Aiga ma Samoa...

FOFOGA FETALAI: Onosai mai, se i faauma mai le saunaoaga a le Minisita o lea ua faaiuiu lana saunoaga.

Susuga Hon LAAULI LEUATEA POLATAIVAO FOSI: Ia ona faata'i lea ma se leo lau afioga i le Fofoga Fetalai, faafogfa le Taitai o le Malo ma le Palemene le tapuaiga mau a le Afioga i le Ao Mamalu o le Malo ma lana Masiofo, le Sui o le Fono Sui Tofia o tofiga uma a le tatou Malo. E faapena so matou lagona ia maua la outou tofa lau afioga i le Fofoga Fetalai, ia toa pea lou loto, Papalii e le i soona filifilia oe i ina o lou malae na taunu i ai le pupula o le Malamalamo o Iesu e taitai ai le atunu. Ia lava lau tofa aua foi e te fefe e fai le faaiuga o le amiotonu aua Samoa. Manuia le afioga i le apulupuluia o le fala i tofaga le afioga i le Taitai o le Malo ma lona taumafai mai pea i tatou fono. Manuia le loaloa o le Kapaneta, manuia a outou afioga i sui usufono manuia aufaigaluega totofi a le Malo.

Lou itumalo pele ia ua uma sa tatou upu, mau mai pea le toovae ma outou tui mai le mulipapaga ma outou tatalo, tou tatalo e le faigofie le filifiliga. Tatalo i le Atua e fesoasoani mai i o tatou mafatiaga tatou folau pea ma le faatuatua e ala i le tausiga ma le leoleoga o le Vaega Faaupufai na tatou omai tatou te lagolago i ai, Ia Faatuatua i le Atua Samoa ua Tasi.

Soifua ma ia manuia le fono.

FOFOGA FETALAI: Malo saunoa i lau afioga i le Minisita, a o lei faiatua se tala a le Nofoa, e muamua ona faatonuina le Failautusi ina ia aveesea le upu lea o le ‘gaogaosa’ lea sa saunoa i ai le Sui Taitai o le Itu Agai i le saunoaga a le Afioga Minisita o Faatoaga. Atonu o lea e le i maua lelei mai ao le agaga lena leaga lea sa maua lelei e le Nofoa.

Ua manatu foi i lenei itula, lau afioga i le sui usufono o Falelatai ma Samatau o lea ua faaiuiu mai le saunoaga a le Minisita, e iai foi le manatu ia tatou lava papale foi ma tatou lava onosai. O lea o le a faiatu se tala a le Nofoa e faamaea ai foi le tulaga lea oute tau vaai atu lea e tau tulai mai ai lau afioga i le sui usufono mamalu.

O lea ua faamaea mai le saunoaga a le afioga i le Minisita.

Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Anoamaa 2: “[gaogaosa]”.

Afioga Lupematasila Galumalemana Tologata Togia Tile Leia: E laititi a si vaega lea e fia faiatu ai se tala pe a tusa ai ma le finagalo o lau afioga.

FOFOGA FETALAI: Ua ou manatu lau afioga i le sui usufono mamalu, o lea lava e afio mai le afioga i le Sui Taitai ma lena itu, e le o afio mai le Taitai o le Itu Agai. Ia e faapena o tatou e fesili...

Afioga Lupematasila Galumalemana Tologata Togia Tile Leia: Ia faafetai.

FOFOGA FETALAI: E fesili le tofa ma le uta mamao aua lava le manuia o le atunu aemaise foi o le toamalie o le tatou Maota, o le mea lea ia faafetai.

Afioga Sulamanaia Fetaiai Tauiliili Tuivasa: Lau afioga i le Fofoga Fetalai, pe maua se avanoa o le faafetai a lenei itumalo. I le saunoaga a le afioga i le Minisita ua afea ai lenei itumalo o le a atofaina le tulaga i le Talomua mo le masina o Oketopa.

FOFOGA FETALAI: Ia sei saunoa le sui usufono

Afioga Sulamanaia Fetaiai Tauiliili Tuivasa: E momoli le agaga faafetai i lau afioga foi i le Minisita ua afea foi lenei itumalo o Vaimauga 1,2,3,4. E momoli atu ai le agaga faafetai i le amanaia o le Vaimauga. A o sina tulaga e fia avatu foi i lenei itula i le manaia o le saunoaga a lau afioga i le Minisita. Ua faalogologo foi lenei Maota aemaise le tapuaiga a si o tatou atunuu o lo o iai le sosia o faamanuiaga i lau afioga i le Minisita i upu ma.... Ae lagona le faanoanoa i lenei itula se ua toe faaleaga a lau saunoaga matagofie i le tuuaiga lea e tuuaia ai lenei itu i isi o lo o iai totonu o lea e faasolitulafono. Leaga o lea e faalogologo le Faamasinoga ua uma ona fai le iuga a le Faamasinoga e omai sui usufono ia i totonu, ia pei o le agaga lena lau afioga i le Fofoga Fetalai e manumanu ai le sui usufono lenei o Vaimauga.

FOFOGA FETALAI: O le ala foi lea sa taumafai atu ai le Nofoa ina ia to'a pea le tai i le paia o le tatou Maota. O a foi ni mea ua lagalaga i le saunoaga a le afioga i le Minisita ia vaatele i outou finagalo, o lo o silafia e le Atua mea uma. O lagona lava ia ua faaalia ona o le tulaga ua iai nei ia ao lo o tumau lava le tatou amanaia foi o le tulaga o iai le Tulafono i lenei taimi. E le i teitei foi toe talosaga le Fofoga Fetalai i le Faamasinoga ia o le ala foi lea o le leai o se upu a le Fofoga Fetalai i le tulaga lea ona o lo o talia ia le Faamasinoga. Ona o lo o manino i a tatou Tulafono Tumau, so o se mataupu i luma o le Faamasinoga e le mafai ona tatou toe tagofia.

O le mea lea e faamalulu atu ai i lau afioga i le sui usufono mamalu, o lagona lava ia o lea ua tuuina mai o lea foi ua oo iai se leo o le Nofoa ia tatou lava papale ma tatou lava onosai e aumai lava e le Atua malama, tatou faamoemoe pea i le Atua e fesoasoani mai e faailoa mai le amiontonu ma le mea moni. Ia o lena e fai mo i tatou aemaise o le paia o le Maota aemaise foi le tapuaiga a le atunuu.

O le mea lea faafetai tele i lau afioga i le Minisita mo le tolaulauga foi o faamatalaga o le Matagaluega aemaise lava o le atinae mo le agai i luma o le atunuu. Malo lava fai o le faiva, faafetai tapena, malo foi le galulue ma lau Matagaluega. I le matau lava ia, leai o lea ua lava tapena le Matagaluega i itu uma. O le mea lea e momoli atu ai le agaga faafetai a le Nofoa ao tulaga o lenei aso ma le faailoa foi o nisi vaega ia atonu o se taimi, o lea e faafofoga le afioga i le Tamaitai Palemia ma le Kapaneta. O le a silasila totoa i ai i lea vaega aua lava le agai i luma o le mamalu o le tatou Palemene.

O le mea lea, o le a faataatiae tatou.....

Ia tulai mai lau afioga i le Tamaitai Palemia e iai se mea o fia saunoa i ai lau afioga

Afioga Hon Fiame Naomi Mataafa: Lau afioga sa fia faanoai atu i lou tulaga faasui Minisita o Tiute ma Tupe Maua pe maua se avanoa e tali atu ai foi i nisi o mataupu sa laga e le Maota.

FOFOGA FETALAI: Ia malie lau Afioga o lea ua tatou malolo, tatou taliu mai loa i le malologa ia o le a tuu atu loa i lau afioga e talifuaitau aua le Minisita o Tupe Maua ma le Tiute.

Ua faataatiae a tatou galuega mo le malologa ia tatou toe feiloai.

Na faataatiae Taualumaga a le Fono Aoao Faitulafono i le itula e 6:46 i le afiafi mo lana malologa ma toe faaaauau i le itula e 7:20 i le afiafi.

FOFOGA FETALAI: E faasilasila atu ua toe amatalia nei Taualumaga o le Fono Aoao faitulafono, i le toe taliu mai ai o le tatou malologa e iai le manatu ua matu i fau le taligasua o le paia o le Palemene, maua foi se faasiliaga malosi e faamaea ai le tatou galuega o lenei afiafi .

E faataatiae tatou taualumaga ua maea saunoaga talifuaitau a le Afioga i le Ministra o Faatoaga ma Faiga Faiva. Ou te tapa ma le faaaloalo lau Afioga i le Palemia poo lau afioga foi i le sui Minisita o Tiute ma Tupe Maua mo lau saunoaga.

Afioga Hon FIAME NAOMI MATAAFA: Faafetai lau Afioga i le Fofoga Fetalai mo le avanoa , o lena e silafia e le Maota ua toesea le Afioga i le Sui Palemia poo le Minisita foi o Matagaluega o Tiute ma Tupe Maua, ma ua faapea ona faaoo mai nisi o faamaumauga a le Matagaluega e tusa ai foi ma nisi o mataupu sa laga.

Lau Afioga i le Fofoga Fetalai, o le tatou Matagaluega lenei o Tiute ma Tupe Maua e 3 lava ana manulauti taua.

O le tulaga muamua o aoina o tupe maua a le Malo mai tiute, lafoga, laisene atoa ai ma totogi o auauanga tuuuina atu e ala lea o le faafoeina lelei o pulega o tiute ma lafoga e tusa ma ana tulafono.

O le lona lua o manulauti o le unaia lea o auala ma faatinoga ina ia faafaigofie ai fefaatauajiga ma femalagaina i o tatou tuaoi faavaomal.

Ia ma le lona 3, galulue faatasi ma Matagaluega ma Ofisa a le Malo atoa ai ma pisinisi tumaoti i le puipuiga malu oa tatou tuaoi faavaomalo.

Lau Afioga i le Fofoga Fetalai ma le maota, i le vaai atu i mataupu sa laga mai e pei e 3 ni vaega i le aoaotelega .

- 1 o faamamaavega tuu saunoaga poo faapau o tiute mo nisi o oloa auina mai;
- 2 o faiga faavae mo le tatou lafoga VAGST;
- 3 o le puipuiga lava o tatou va tuaoi poo tatou boundaries .

E tali atu muamua lau Afioga i le aotelega o le mataupu muamua o faamama avega mo oloa auina mai aemaise mo vaega tau aoaoga, soifua maloloina faatoaga. O taumafa masani i aso faipea poo stables ma oloa mo fanau pepe.

Lau Afioga i le Fofoga Fatalai o vaega uma ia na faafesili mai ai sui usufono mamalu o le maota o le tali, Ioe e iai le faamamaavega. E pau tiute pe tuu saunoa foi i vaega ia ua faamalauina atu.

O le lona lua o mataupu sa laga mai o le faiga faavae lea mo le lafoga VAGST ma e pei e matau atu o le mau o loo momoli mai o se tasi lea o tuu saunoaga i nisi o oloa e tali atu ai i le taugata o le soifuaga.

Lau Afioga i le Fofoga Fatalai o le tali puupuu o le tatou lafoga lea, o le lafoga e laugatasia ai tagata uma, a tele lau faatau tele foi lau lafoga a laititi lau faatau faapena foi fua o le lafoga. A o le lafoga lea e tasi e laugatasia uma ai ia le tatou atunu, ma e le tau faamatalaina lau Afioga ma le Maota le alaoa lenei mo le Malo i le faatinoga o ana galuega ma ana auaunaga o a tatou tiute ma tatou lafoga.

O lea la ua manino atu e iai tuu saunoaga ma faamama avaega mo vaega ia e pei ona faamalau atu. O le tali puupuu i se mau o loo aumai mo le tatou lafoga VAGST, o le taimi nei e le o iai se fuafuaga a le Malo i se fetuunaiga mo le VAGST.

Ona ou oo mai lea i le mataupu 3, tapenapenaga mo le puipuiga o tatou tuaoi faavaomalo, lea ua agiga i le Maota ia tatou faata i luga o le uafu ma ou te manatu ua lata mai le taimi mo le tatou faata tele lea. O loo iai foi se tapenaga a le Matagaluega mo faata laiti i vaega eseese o le atunu o loo faapea ona faatino ai le auaunaga ma o mea e tatau ona tapena iai.

O taifau sosogi o lena foi ua talanoaina e nisi o afioga i Minisita, o se tasi lea o taumafaiga o loo faapena ona tapena pea iai ma galue ma tatou paaga. O le isi vaega tele mo le puipuiga o le tatou tuaoi faavaomalo o loo iai foi se mau a le Matagaluega o loo talosagaina ai le Komisi o Tagata Faigaluega a le Malo i lana sailiiliga o loo faagasolo nei i le manaomia o nisi tagata faigaluega faaopopo mo lea tiute.

Lau Afioga i le Fofoga Fatalai pau na o nai vaega sa laga mai i le tatou Matagaluega lea.

Afioga Leaana Ronnie Posini: Lau Afioga i le Fofoga Fatalai .

FOFOGA FETALAI : Malie lau Afioga i le tamaitai Palemia, se i tulai mai le sui usufono o Safata 1.

Afioga Leaana Ronnie Posini : Faafetai tele i le Afioga i le tamaitai Palemia lea ua matau atu o lea ua.... ona o lea ua toesea le Sui Palemia ona o tuatuagia faale-Malo. Ae e iai lau fesili na fai e faasaga tonu lava i le Sui Palemia, tulaga lea i le mataupu lea ave iai le faamuamua a le tatou Faigamalo i le mataupu lea i Leoleo ia na taua e omai e suesue le mataupu lenei ona o lea ave iai le faamuamua a le tatou Malo, ona ua aafia ai ia sui usufono, o Minisita. A o lea ua matau atu poo fea le mea ua fai i ai ae o lea faatoa uma ona tatou talanoa ao lea ua maua ia le....

FOFOGA FETALAI: O lea ua maua lou finagalo, lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai o le mataupu lea e saunoa mai ai le sui usufono, o lea sa ou maua na fai ai le faaiuga a lau afioga. Ou te leiloa la poo lea le mea lea e tulai mai ai pea ia le sui usufono. Ae lelei le faiatu pea o sau faamatalaga. Ou te leiloa pe silafia e tou afioga o loo iai ia leoleo mai fafo o loo galulue ma tatou Matagaluega o Leoleo. E le tausailia mai nisi leoleo. O lea faaaoga ia Leoleo a tatou ma Leoleo o loo tatou galulue faatasi e faatino o latou tiute.

Llau Afioga ae ou te lei nofo i lalo, e fia fai lava sau upu i le Mataupu mulimuli lea na faaiu iai ia le suanoaga a le Minisita o Faatoaga, i le mataupu lea i le Faamasinoga. E iai lou faaetetega lau Afioga le Fofoga Fetalai ou te malamalama i le tiga o lagona o sui usufono, e faapena foi sou lagona i le itu lea o le fesopoai o itu tino eseese o le Malo ao lea taatia faiga faavae e tumavaevae ma e tumaoti. A o le lagona lena lea taofi. Ona o lea?

Muamua, lea ua uma na saunoa le Fofoga Fetalai, ua talia e le Fofoga Fetalai i ala o le tulafono tatou onosaia o lea ua fagasolo le toe talosaga i le mataupu lea. Ae mo tatou i le Maota lenei ina tei ua tatou manatu pe mama i le Malo, e le o lea, ae teu foi ma manatua oa faavae o le tatou Malo o le Tulafono. O fea e iu iai mataupu o le Tulafono? E iu i o.

Ma o isi itu ia e taofiofi ai ia le lagona aua a tatou tepa i tua i le faagasolo mai o le fesuiaiga o Paeaiga o le tatou Faigamalo lea na tatou iai nei e le faigofie, lagalaga ia tatou tulafono, lagalaga lo tatou faavae, lagalaga ia tofi o le Malo. A o le a le mea na tatou savavali ai ma tatou taunu ai i se taunuuga ua tuu malie ai, a lea ua faagasolo ia le tatou faigamalo. O le Tulafono. O le mea lea i tou Afioga i sui usufono o a o tatou lagona aua nei gallo ia tatou o le faavae lea o le Pulega faale-tulafono. E maua lava i le faalogo le sai, sese tulafono, sese Tulafono, le sao Tulafono. O le a le auala e fai ai? Toe aumai i totonu o le Maota lenei e faasao ai pe a faapea ua sese.

Ao le tausolomua i le Maota lenei ona faapea atu a mea o le tulafono ea, a o le Faamasinoga ea ma a, o le tatalo tatou tausi le va ma le itutino le la o le Malo. A faapea ua lapse i so outou lagona ma so tatou mafaufauga faaiuga ua fai ia lava papale tatou onosai faatuatua e iai lava le auala e momoli mai ai se taatiaga e toofilemu ai le tatou atunuu.

Ina tei ua faapea na o ai ma ai e iai ni ona lagona malolosi i le mea lea, leai o au ia e tau atu i lau Afioga i le Fofoga Fetalai e le nofo filemu lou lagona i le laasaga lea ua tatou oo iai. Ae ou te faatuatua aua lea faagasolo le tulafono atonu e toe liliu mai ma faataoto le mataupu lea i sona taotoga lelei, o le matou tatalo lea ma le faamoemoe i lea foi mataupu o loo feagai i le va o le Maota Fono ma le Faamasinoga a Samoa.

O se matou faamatalaga lea lau Afioga i le Fofoga Fetalai ae faagasolo atu ia i le Minisita e ou le tulafono e faaiu mai ai le Tali a le Malo ma faagasolo le tatou galuega.

FOFOGA FETALAI: Malo saunoa i lau Afioga i le Palemia, atonu o lea foi ua faafogafoga le paia o le Maota aemaise foi le faafogafoga mai o le atunuu i le mea o taoto ai lou finagalo le Taitai o le Malo aua lava le filemu ma le toamalie o le atunuu. Aemaise foi o le vafaafeagai ai o le Palemene ma le Faamasinoga.

Malo le tofa, faafetai mo le saunoaga aemaise foi o nai mataupu na lagalaga i le Matagaluega o Tiute ma Tupe Maua, faafetai lau Afioga o lea ua manino le tatou Maota.

Lau Afioga i le Minisita o Tupe o le taimi lenei o le saunoaga a lau Afioga.

Afioga Hon LAUTIMUIA UELESE VAAI (Minisita o Tupe): Lau Afioga i le Fofoga Fatalai, tulai foi ma le agaga faaaloalo tele tulou le malu tauuee le paia maualuga o lenei Palestine. E talifuaiteau i nai mataupu i lona aoaotetele sa laga mai e sui usufono mamalu i le Tala Faaopopo Muamua o Tupe 2023/2024 aemaise foi o nisi o vaega e ao ona faamalamalama ma faamanino i faiga faavae a le tatou Malo e limataitaiina ai galuega ma auauanaga a le Matagluega o Tupe faapea foi Faalapotopotoga o loo i lalo o le Vaega Maoti o tupe poo le Finance Sector.

Lau Afioga i le Fofoga Fatalai ua maualuga ma toto tetele le Maota nei, le afio o lau Afioga i le Fofoga Fatalai o le Maota, afio lau Afioga i le Taitai o le tatou Malo lau Afioga le Tamaitai Palestina, afifio Minisita o le Kapaneta, Sui Fofoga Fatalai ma Minisita Lagolago, afio lau Afioga i le Taitai o le Itu Agai, Sui Taitai aemaise sui usufono mamalu uma a lenei Palestine.

Le tapuaiga mau a le Afioga le Ao mamalu o le tatou Malo, le Sui o le Fono Sui Tofia , Faamasino Sili, le Peresitene o le Faamasinoga o Fanua ma Suafa vasega o Faamasinoga .

Afio foi Lau Afioga i le Failatusi o le Maota ma le Ofisa o le Fono, afifio a outou Afioga o Ofisa Sili o Matagaluega, Faalapotopotoga ma Pisini Tumaoti a lo tatou Malo. E le faagaloina le tapuaiga a si o tatou atunuu pele o Samoa paia o ositaulaga o le Talalelei o auaua a le Atua o nonomanu i fata fiaaulaga e fia au a se manuia o Samoa ma lana Faigamalo .

Le tapuaiga a Samoa i tafa e fia, Samoa nei ma atunuu i fafo i ona faatumutumuga seja oo atu i ona fatu tuloto. E le faagaloina foi le tapuaiga a si ou Itumalo Vaimauga 3 faamalo le soifua faafetai le tapuai, faamalo faafetai tatalo.

Lau Afioga i le Fofoga fetalai e fia faamauina le agaga faafetai le lagolagoina e sui usufono mamalu uma o lenei Palestine le Tala f Faatatau Faaopopo Muamua o le Tupe mo le tausaga faaletupe ua faagasolo nei 2023/2024. E faapito augafa le agaga faafetai i le Komiti o Tupe Maua ma Tupe Totogi, lau Afioga i le Taitaifono, Sui Taitaifono aemaise sui usufono mamalu uma o le Komiti e tusa o le galuega maeaea i le suesueina ma le iloiloina o le Tala Faaopopo Muamua o Tupe 2023/2024 ina ia mautinoa sona atoaga e pei ona folasia ai nei le Lipoti a le Komiti i le Palestine. Faafetai le tofa tatala i le manino o la outou iloiloga ma le faamalamalamaaina o vaega taitasi o lenei tala faatatau faaopopo muamua o tupe faafaigofie ai la matou pitolaau.

E faamauina foi le agaga faafetai i fautuaga ua tuuina mai e le gata mo lenei Palestine aemaise foi o fautuaga sa timai ai le Komiti i Matagaluega ma Faalapotopotoga a le tatou Malo sa auai i faatalanoaga aua lava le siitia ma le faaleleia atili o auauanaga a le tatou Malo e tuuina atu i si o tatou atunuu. Viai le Atua ona o la outou galuega aemaise o le faatofalaiga.

Lau Afioga i le Fofoga Fatalai e pei ona folasia muamua o le Autu o lenei Tala Faatatau Faaopopo Muamua o Tupe, O le faatinoina o le toe fetuunaiga o matafaioi a Afioga i Minisita o le Kapaneta faatasi ai ma nisi o vaega e moomia mo le faatinoina o galuega ma auaunaga a le tatou Malo i le afa mulimuli o le Tausaga Faaletupe o loo faagasolo nei .

E talitonu le taofi o lea ua manino auofala i le Lipoti a le Komiti o Tupe Maua ma Tupe Totogi aemaise le folasaga a le Afioga i le Taitaifono. O le tele o mataupu sa lagalaga mai ma fesilgia e sui usufono mamalu e uiga i le Tala Faatatau Faaopopo muamua o tupe ma o le a le toe oo iai se faamatalaga. Na o nai vala lava ia lau Afioga i le Fofoga Fatalai e fia faaopopo atu iai e talafeagai le faamanino e tusa o finagalo o nisi o sui usufono mamalu na faaalia.

Lau Afioga i le Fofoga Fatalai o le a ou amata atu i tatou polokalame o galuega faavaitaimi. E pei ona talosagaina i lenei tala faatatau faaopopo muamua o tupe o le a faaopopo tatou sooupoo tatou Liaison Officers e faaopopo i Ausetalia ma Niusila. O le a siitia mai ai le aofai o tatou Liaison Officers mai le toalua i le tai toatolu i le atunu, e 3 Niusila, 3 Ausetalia. E galulue faatasi ma tatou Ofisa Konesula faapea tatou Trade Commissioners i lalo o faamalumaluga a le Komesina maualuga i Ausetalia ma Niusila e tauala atu i le tatou Matagaluega o le Va i Fafo. O se itu taua tele lea e tusa o le faiga faavae ua faataoto nei e le tatou Malo e lagolago ai le faatinoga o lenei polokalame aemaise le fesoasoani tele le tuuitiitia o mataupu ogaga o faalavelave e ona tulai mai fafo. E aafia ai le saogalemu ma le soifua o tatou tagata o lo o auina atu i fafo mo galuea faavaitaimi nei.

Lau Afioga le Fofoga Fatalai e le o toe po se lilo i faafitauli ma faalavelave ua tutupu mai i tatou galuega faavaitaimi i Ausetalia ma Niusila. O le silasila a le tatou Malo o le auala vave lea ma le taua e foia ma vave fesoottai mai ai i le tatou Malo e tauala mai ile Ofisa o le Vai i Fafo e vave fofo ai ni faafitauli e ona tulai mai i lenei polokalame.

Lau Afioga i le Fofoga Fatalai o lea foi ua faamaonia e le Kapaneta le tofia ai o le Komiti Galulue poo le Lead Task Force latou te faagaioia lea polokalame. O lenei Komiti e na o Faauluuluga ma Ofisa o le Malo o loo aofia ai ma e leai ni vaegatupe faaopopo e manaomia mo lenei Komiti. O sui o le Komiti e aofia ai le Faauluuluga o le Matagaluega o Tupe, Matagaluega o le Va i Fafo, Matagaluega o Pisini, Alamanua ma Leipa, Matagaluega o Numera Faamaumaunina, Kovana o le Faletupe Tutotonu, faapea le Failautusi o le tatou Komisi e pulea tagata faigaluega a le Malo, Taitaifono ai le Minisita o Tupe.

O lea Komiti tofia e le Kapaneta e faatinoina fetuunaiga o loo faagasolo nei aemaise le faatinoga poo le implementation o faiga faavae mo galuega faavaitaimi ua pasia e le tatou Kapaneta.

Lau Afioga i le Fofoga Fatalai o lea na afea i saunoaga a nisi o sui usufono mamalu le fuafuaaga sa faalauiloa e le tatou Malo e faamatuu atu i tua i Itumalo taitasi tauala atu ia tatou Fono Faavae le resitalaina ma le filifilia o tatou tagata e auina atu i galuega faavaitaimi i fafo.

Lau Afioga le Fofoga Fatalai o loo tumau pea lea fuafuaga ma le faamoemoe o le tatou Malo e le o suia, pau nai suiga laiti o taimi o le faatinoga o ia suiga

aemaise le faamatuu atu o matafaioi i tua i tatou fono faavae ona o mafuaaga tatau nei.

Muamua ua matauina e le tatou Komiti tele se galuega e tatau ona faatinog muamua mo le faalauiloaina o le faiga faavae ua pasia e le Kapaneta a o lei amata faatinoina nei suiga, ina ia mautinoa le lelei ma le atoatoa o le faatinoga poo le implementation o le faiga faavae.

Lua, matauina foi e le Komiti e tatau ona faia ni polokalame faaleaoaoaga training programmes mo tatou fono faavae i le faatinoina o matafaioi ma galuega mo le resitalaina o talosaga aemaise o vaega uma ma pepa faamaonia e moomia mo galuega faavaitaimi nei fafo.

Mo le silafia e lau Afioga Fofoga Fetalai aemaise lenei Maota lea ua faagasolo le faatinoga o tatou polokalame faalauiloa, polokalame faaaaoaoga pei ona faia ai ai polokalame mo tatou paaga i le masina o Novema i le tausaga na tea nei 2023. O loo fuafua e faaauau lenei polokalame faalauiloa lenei polokalame faaleaoaoaga i le masina fou Fepuari ma Mati ma tatou fono faavae i Upolu nei faapea isi faalauiloa ma polokalame faaleaoaoaga mo fono faavae i Savaii.

O le taua o nei faalauiloa lau Afioga i le Fofoga Fetalai ina ia nofo manino ai Komiti o Fono Faavae i tulaga uma e moomia e pei o pepa fanau, o pepa moomia mai falemai ma fomai, kilia mai le Matagaluega o Leoleo, pepa o molimau mai le Ekalesi ma Nuu, fale faigaluega na faigaluega ma isi, e aofia ai foi ma le faaaogaina o le tatou system o lo o iai nei e resitalaina ai o tatou tagata e agavaa mo nei galuega.

O le matau a le tatou Komiti lau Afioga i le Fofoga Fetalai e le se tamai galuega matafaioi ia o le a faamatuu atu i tua i tatou fono faavae ma e tatau ona tapena lelei muamua le aufaigaluega a fono faavae tauala atu i tatou faalauiloa ma polokalame faaleaoaoaga ia e faagasolo atu ona faamatuu atu loa lea tua o ia galuega e faaaoga ai le face approach poo le faamatuu atu auauai seja maea lelei lona faatinoga.

O fuafuaaga a le tatou Komiti faasolsosolo ma faamaea uma le faatinoga o lenei polokalame aemaise le faamatuuina atu o nei matafaioi uma i tua i tatou fono faavae a o lei maea le tausaga faaletupe o loo faagasolo nei. O le tatalo ma le tuualalo, sui usufono mamalu aemaise foi o a outou afioga foi o Taitaifono o tatou fono faavae tatou lava papale ma onosai. O lo o faagasolo atu polokalame a le tatou Komiti mo le faatinoga o lenei faamoemoe seja taunuu uma ma maea lelei.

Lau Afioga i le Fofoga Fetalai o le taimi lenei o loo faaauau pea le resitalaina o galuega faavaitaimi ia atunuu i fafo i le tatou Matagaluega e pei ona sa masani ai. E le o taofia, e le o suia foi lea tulaga. E oo mai i le taimi nei mo le silafia e sui usufono mamalu o lenei Palemene aemaise le faafogafoga tapuai mai a si o tatou atunuu.

Susuga Hon Mulipola Anarosa Ale Molioo: Lau Afioga i le Fofoga Fetalai

FOFOGA FETALAI: Malie lau Afioga i le Minisita, se i tuu atu le avanoa i le Afioga i le Minisita o le Matagaluega o Tina ma Tamaitai.

Susuga Hon Mulipola Anarosa Ale Molioo: Faafetai lau Afioga i le Fofoga Fatalai e leai se manatu e faalavelave i le saunoaga matagofie a le Afioga i le Minisita o Tupe. A o le ala o lou tulai o lea ua faataatia le task force o le tatou RSE ae pei e matau atu o le faamoemoega a le tatou Malo e see atu le tofiga a o lea pei e matau atu, o lea misi le Ofisa Sili a lenei Matagluega.

Ia e pei o le tatalo ma le aioi foi i lau Afioga i le Minisita o Tupe pe le alagatatau foi ona iai ma le Ofisa Sili a lenei Matagluega ona o lea e iai le fuafuaga i le filifiliga o tatou vaega lea ma le faaaloalo lau Afioga. Faafetai.

FOFOGA FETALAI: Tulai mai lau Afioga i le Minisita.

Afioga Hon LAUTIMUIA UELESE VAAI: Lau Afioga i le Fofoga Fatalai momoli atu le faafetai i le Afioga i le Tamaitai Minisita faamauina ma le agaga faafetai le finagalo foi o le Afioga i le Minisita i le faaopopoina mai foi o le Faauluuluga o le Matagluega o Tina ma Tamaitai i le tatou Komiti.

Lau Afioga i le Fofoga Fatalai, na taua e le Afioga i le Minisita o Faatoaga le tulaga i le tatou faiga faavae i le aafia ai o tatou tagata faigaluega e faatinua le tatou galuega i le tatou atunu. O mea uma ia lau Afioga i le Fofoga Fatalai se taimi o i luma faamalamalama ae tau ina ou faapea atu, o totonu o le tatou faiga faavae o loo faagasolo nei ua taoto mai ai, pasia e le tatou Kapaneta na o le 6,000 tatou tagata mo Ausetalia 6,000 foi tatou tagata mo Niusila soo se taimi. O le gap lea o lea ua tuu iai e le tatou Malo ina ia aua nei aafia tatou galuega i inei i si o tatou atunu.

Lau Afioga i le Fofoga Fatalai taua e nisi o sui usufono mamalu le aafiaga o le fesuiaiga o le tau o le suau.

Lau Afioga i le Fofoga Fatalai na faailoa atu i le lauga o le Tala Faatatau Faaopopo Muamua o Tupe le tuuitiitia o le tau o le suau ia Tesema o le 2023 ma o lea foi na toe tuuitiitia le masina lenei Ianuari 2024.

O le naunautaiga lava o le tatou Malo ia faaaauau pea ona tuuitiitia le tau o le suau e taunu mai i le tatou atunu ina ia faaaauau ai pea le pau o le tau o le suau i totonu o si o tatou atunu i masina taitasi. Se i vagana foi tulai mai nisi o tulaga faaletonu e tutupu pea i le lalolagi e aafia ai le tau o le suau e le oo iai so tatou malosi ona toe ono fesuiai foi lea o le tau o le suau.

O ia vaega uma lau Afioga i le Fofoga Fatalai o loo mataitu totoa lelei e le tatou Malo aemaise le tatou Matagluega o Tupe.

Lau Afioga i le Fofoga Fatalai o lea na faalauiloa le tului poo le dividend payout e 2.4%

Afioga Lupematasila Galumalemana Toloagata Togia Tile Leia: Lau afioga i le Fofoga Fatalai.

FOFOGA FETALAI: Malie lau Afioga i le Minisita, se i tulai mai lau Afioga i le sui usufono o Falelatai ma Samatau.

Afioga Lupematasila Galumalemana Toloagata Togia Tile Leia: E leai se agaga e faalavelave i le saunoaga matagofie a le afioga i le Minista ae faafetai

o lea e faaauau le pau o le suauu. A o le tuualalo ma le fautauag lea sa avatu e silasila le Malo e fai se special price o le suauu mo le Faalapotopotoga o le EPC aua e tele le impact i le benefiti o le atunuu atoa pe a maua se faamamavagea mo le tau o le suauu mo le EPC, pe aveese ia levy ma mea na e iai ae taugofie ai le tau o le eletise ma le agaga faaaloalo.

FOFOGA FETALAI: Tulai mai lau Afioga i le Minisita .

Afioga Leaana Ronnie Posini: Lau Afioga

FOFOGA FETALAI: Mo le faasaoina o le taimi o lau Affioga alii Minisita se i tulai mai lau Afioga i le sui usufono o Safata.

Afioga Leaana Ronnie Posini: Faafetai tele lava leaga o lea sa ou... o lenei itumalo sa laga ia galuega faavaitaimi o lea la ua manino mai i le saunoaga a le Afioga ile Minisita, e momoli atu ai le agaga faafetai tele. Faafetai i le polokalame atoa ma le faataatiaga mai o le a tuu atu i tua i Fono a Itumalo. O le taua o lou lagona o le pule mamalu a Alii ma Faipule latou te aumaia ia tagata nei i totonu o galuega faavaitaimi aua e ave ai foi ma le faamatalaga a le Pule mamalu a Alii ma Faipule ma faasalaga mamafa, aua ou te talitonu ana tupu mai le ituaiaga faiga lea ua fai ai ua faatino mai e pule mamalu a Alii ma Faipule ailoga e tupu le mea lea o le maliliu o tatou tagata i nai masina talu ai. A o le agaga faafetai o lea ua faamanino e lau Afioga i le Minisita ia le tulaga o le a agai iai ma le agaga faaaloalo.

FOFOGA FETALAI: Tulai mai lau Afioga i le Minisita

Afioga Hon LAUTIMUIA UELESE VAAI: Lau Afioga i le Fofoga Fetalai tali atu i le mataupu laga e le sui usufono mamalu mai Samatau ma Falelatai o lea tau o le tatou suauu lea alu i le EPC lea alu i le wholesale price. O lea e faatau i le EPC i le wholesale price, o lona uiga o le special price lea e ave i le EPC e le o tutusa ma le retail price lea faatau e le tatou atunuu lautele. Mo le silafia e le tatou Maota o le tulaga lea o lea e iai le tau o le tatou suauu lea faatau atu i le EPC e oo mai le taimi lenei.

Lau Afioga i le Fofoga Fetalai o lea sa faalauiola le tului o tatou dividend payout o le 2.4% i luga o saofaga a le aufaisaofaga ma le tatou Faalapotopotoga o le NPF, lea na amata totogiina atu i le aso 10 o le masina o Ianuari 2024 ua faamauina le silia i le 70% o ia dividends ua maea ona faamatuina atu e le tatou NPF i le mamalu o le aufaisaofaga e oo mai i le aso. E tusa lea ma le silia i le \$17 miliona o le autu o lea faamanuiaga e fesoasoani i tapenaga o le toe amata o aoga a le fanau ma o le tasi o vaega o faiga faavae tau tupe a le tatou Malo, e fesoasoani ai i si o tatou atunuu i nei vaitau. Na fesiligia e se tasi o sui usufono mamalu i tulaga o totogi mo auaunaga po o fees fou a le NPF e fia faailoa atu i le mamalu o lenei Palemene o le tele o ia fees e le o ni fees fou, o fees ua leva na iai ao lea faatoa faailoa faalauaitele e le tatou NPF. Lau afioga i le Fofoga Fetalai e tusa ai ma taiala ma faiga faavae aemaise foi le tulafono o

le puleaina o tupe a le tatou Malo, o le fesiitaiga o totogi po o fees and charges o auaunaga a so o se Matagaluega po o so o se Faalapotopotoga a le Malo e ao lava ina faaoo atu i le Komiti o Tupe Maua po o le Revenue Board ao lei tuuina atu i le Kabeneta mo le faamaoniga ona faatoa mafai lea ona faatino. Ua fautuina foi le tatou NPF ina ia mulimultaia ia taiala ma faiga faavae i le agai atu i le lumanai.

Lau Afioga i le Fofoga Fetalai, ona ou see mai lea i se tasi o mataupu taua sa laga mai e se tasi o sui usufono mamalu i vaega e mataituna ai le faatinoga ma le taunuuga o fuafuaga mamao ma galuega a le tatou Malo. Mo le silafia e le nei Palemene ua pasia e le Kabeneta ma sa faalauloa aloaia ia Tesema o le tausaga na tea nei 2023 le tatou faavaa po o le framework o le monitoring, evaluation and learning framework mo le mataituna ma le iloiloina o taiala mo le lumanai manuia o Samoa po o le PDS(Pathway Development Strategies). O lenei faavaa po o le framework o lo o faataatia ai alafua ma faailoilo e fua ai taunuuga o le tatou fuafuaga mamao lenei, aemaise polokalame uma a le tatou Malo o lo o faagasolo e aofia ai ma le tatou Poloketi o le Miliona.

O le a tuuina atu se otootoga o le faagasologa o nei taunuuga i le lauga o le Tala Faatatau Autu o Tupe i le Tausaga Faalelape o lo o lumanai nei e tusa ai o ia vaega uma. E faafetai foi i sui usufono mamalu mo le faamanatupea o ia vaega taua o le galuega e mataituna le gasologa lelei o fuafuaga ma galuega faatino a le tatou Malo. Lau afioga i le Fofoga Fetalai na saunoa ma fesiligia e se tasi o sui usufono mamalu le tulaga o vaegatupe totoe e lei maea ona faaaogaina i le tausaga faalelape ae fuafua e faaaauau atu lona faaaogaina i isi tausaga faalelape pe roll over. Na fesiligia e le sui usufono mamalu le tulaga i le faatagaina faalelafono o lea vaega mo le silafia e le Palemene, a latalata ina maea le tausaga faalelape e lei maea ona faatinoina se galuega po o se Polokalame taua a le tatou Malo e mafai ona talosagaina le Matagaluega o Tupe mo se faatagaga le faaaauau atu i le isi tausaga faalelape le faaaogaina o ia tupe e faamaea lelei ai sea galuega po o sea Polokalame. I lalo o le Tulafono o le Puleaina o Tupe a le Malo 2001 Public Finance Management Act 2001, Vaega e 8 parakalafa 56 o lo o faatulafonoina ai le mafai e le Failautusi o Tupe a le Malo po o le Ofisa Sili o le Matagaluega o Tupe ona faaaauau o ia vaegatupe i le isi tausaga faalelape e sosoo ai ae tuu atu i totonu o ni Special Purpose Account e faaaauau ai se faatupeina o se galuega seia maea lelei lona faataunuina. E le mafai ona suia ni galuega po o ni Polokalame e faaaoga iai nei vaegatupe ua tuuina i totonu o Special Purpose Accounts seivagana galuega lava ia ma polokalame sa faatatauina ai nei tupe e pei ona pasiaina e le Palemene i le Tulafono Tala Faatatau o Tupe i tausaga taitasi.

Lau afioga i le Fofoga Fetalai o lo o faaaauau pea ona fautua le Matagaluega o Tupe...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai.

FOFOGA FETALAI: ia malie lau afioga i le Minisita o Tupe o le sui usufono lea sa laga le mataupu lea ae o la ua manino le saunoaga a le Minisita

Afioga Lupematasila Galumalemana Tologata Togia Tile Leia: Ia faafetai tele i lau afioga i le Minisita o lea ua faamalamalama foi le Tulafono e mafai ai ona faaaauau ona tuu i se special account ia tupe ia, ao le faafesili atu ua fia la ni tatou tupe ma ni a tatou special account ua maua mai ia tulaga. O le talitonuga o lenei sui usufono o le Palemene lenei e aumai uma iai talosaga o mea tau tupe a le uma ona faaaoga tupe i lea tausaga e toe aumai a i le Palemene lenei e fai atu ai le faaiuga. E ui foi la in ai ai le malosiaga e pei ona e saunoa e tatau ona aumai aloaia i le Palemene lenei e pasia aloaia atu ai. Ia ma le agaga faaaloalo.

FOFOGA FETALAI: Ia tulai mai lau afioga i le Minisita se i toe faamanino le tulaga lea.

Afioga Hon LAUTIMUIA UELESE VAAI: Ia faafetai i lau afioga i le Fofoga Fatalai aemaise ai foi i le sui usufono mamalu e tusa ai foi ma le toe faafesili. E pei ona ou faamanino lau Afioga i le Fofoga Fatalai, o lo o aiaia i lalo o le Tulafono, e mafai i le Failautusi o Tupe ona faaaauau tupe nei i le isi tausaga ae ttuina i totolu o le special accounts mo ni galuega a le tatou Malo na pasia atu i le Tala Faatatau Autu o Tupe i inei e le i maea ona faatino i le tausaga. Silasila lau Afioga i le Fofoga Fatalai, i le maea ai o galuega ia, lea e faaaoga i ai tupe ia i totolu o le special purpose account, e uma audit ona toe lipoti mai i totolu o le Palemene. O le tualga lea e faamanino atu i le tulaga lea, a o lo o aiaia i lalo o le Tulafono o le Puleaina o Tupe a le Malo e faatagaina ai le Failautusi o le Tupe e mafai ona tuu tupe i totolu o le special purpose account e roll over i le isi tausaga se i faamaea lelei galuega ona audit lea ttuina mai i le Palemene mo le silafia e le Palemene o le faaaogaina o tupe. Ma le agaga faaaloalo.

FOFOGA FETALAI: Faafetai ua manino. Ia faaaauau le saunoaga a lau Afioga i le Minisita.

Afioga Hon LAUTIMUIA UELESE VAAI: Ia lau Afioga i le Fofoga Fatalai, o lo o faaaauau pea ona fautua le Matagaluega o Tupe i Matagaluega uma a le tatou Malo ina ia mataituna lelei le faaaogaina o latou tupe po o Tala o Tupe i totolu o tausaga faaletupe taitasi ina ia faaitiitia po o le leai foi o ni talosaga mo vaegatupe e roll over faapea i tausaga taitasi mo le silafia o lea ua faaitiitia ia vaega i le Tausaga Faaletupe lenei faatusa i le tausaga faaletupe tuanai. Mo le silafia o lea e faafogafoga mai Matagaluega a le tatou Malo ina ia mataitulelei ia tulaga.

Lau Afioga i le Fofoga Fatalai, o se vaivaiga lea, ua faamalamalama maina foi nisi o mataupu na laga mai e sui usufono mamalu.

Afioga Sulamanaia Fetaiai Tauiliili Tuivasa: Lau Afioga i le Fofoga Fatalai ona o lea e maitau atu ua lamalama faaiu le saunoaga a le...

FOFOGA FETALAI: Ia, e maitau atu o lena e te lua sosoo ma le Minisita o Tupe. Ou te iloa o lena ua e malamalamava ae toe fesili lava.

Afioga Sulamanaia Fetaiai Tauiliili Tuivasa: E le tuua i lalo e le sui usufono o le Vaimauga 1 le lagolagoina o le Tala Faatatau Faaopoopo a le Minisita o Tupe leaga o le sui usufono o le Vaimauga. A o le agaga faafetai sa ou le faalavelave lava, o lea ua saunoa manino le Afioga i le Minisita o le tulaga foi lea sa avatu ai le avatu ai le manatu o le Vaimauga i le task force lea sa approve e le Kapaneta. Sa i ai le popolega faapea ai e pay foi sea Komiti o le a faagaoioiga le galuega faavaitaimi. Ae faafetai i le Minisita atamai o lea ua maua e le pay ina o mea o Faauluuluga o Matagaluega. O le tatalo la a le Vaimauga lea na naunau atu ai leaga o lea foi ua talosaga mai le Minisita o Tina ma Tamaitai, pe mafai ona avatu ai i totonu sui o lenei Fono a le matou foi Itumalo nai tamalii e toalua, avatu i totonu o lau Komiti lena aua o lea e totogi lava i le tupe a le matou itumalo i alauni, ae avatu ai nai tamalii na e toalua e faaaaoga i ni fautuaga e tuualalo atu ai. E pei o le talosaga lena ona sa popole le sui usufono o lea foi o le a toe fai se isi Komiti e pay i ni tupe, a o lea ua faamanino le faamalamalamaga a lau Afioga, e leai, o CEOs lava o Matagaluega a le Malo. O lea la ua tatalo mai le Minisita e tuu atu lana CEO, ae tatalo atu le sui o le Vaimauga 1 i nai sui o lau Fono Faavae se toalua i totonu o lau Komiti lea. Ma le agaga faaaloalo lau Afioga i le Fofoga Fetalai.

FOFOGA FETALAI: E faamalie atu i le sui usufono mamalu mo Vaimauga 1, e le o se mea faa-Vaimauga le tatou mataupu. Ia tulai mai lau Afioga i le Minisita.

Afioga Hon LAUTIMUIA UELESE VAAI: Faafetai i lau Afioga i le Fofoga Fetalai, faafetai foi i le finagalo faaalia o si ou uso a sui usufono mai Vaimauga 1. Mo le silafia na pasia e le Kapaneta na o officials a le Malo, o lona uiga na o tagata faigaluega a le Malo e leai se tupe e alu ai. O le tatou Komiti foi lea e faia trainings ia mo Fono Faavae. O lona uiga o au sui ia e tau faatutu maim o le Fono Faavae lau Afioga, ia e omai e aooga i tatou officials ia o le a faagasolo atu le tatou polokalame. Ma le agaga faaaloalo tele.

Lau Afioga i le Fofoga Fetalai, e toe momoli atu le faafetai tele i le lagolagoina e sui usufono mamalu o le Palemene o lenei Tala Faatatau Faaopoopo o le Tupe 2023/2024. Faafetai tele mo finagalo faaalia ma fautuaga e faaleleia ai le auaunaga, e toe momoli atu foi le faafetai tele i le galuega fita a le Komiti o Tupe Maua ma Tupe Totogi mo le lauliliuina o le tatou Tala Faatatau Faaopoopo o le Tupe. Malo faafetai mo le galuega maeaea.

Ona ou oo mai lea i si ou itumalo lau Afioga i le Fofoga Fetalai. Si ou itumalo pele o Vaimauga 3, ou te ofo alofa ma faatalofa atu i le paia maualuga o si o tatou itumalo i ona mauga tetele seia oo i ona iu, i le paia o le aufaigaluega a le Atua o lo o talafaauto i fatafataulaga e fia i totonu o si o tatou itumalo. Taitai o Ekalesia i Susuga i Toeaina ma Susuga i Sea, aemaise le loaloa o le aufaigaluega, faafetai le tatalo malo le tapuai, faamalo le soifua manua.

Ia le paia o si o tatou itumalo aua le afio o Alosina, afio le Matua afifio le Aiga Salevalasi, Usoalii o Gafa ma Aiga, Susu alo o le Malietoa, alaalatai o Tuisamau, le Faletolu ma le Vainalepa, o Sa Ataga ma Fuata, Taga ma Salaitia, le Launiu Saelua ma le moa fagatau.

E le faagaloina foi le isi itu o le matou vai i le afio o le Matua, afio le afioga i le Matua ia Tofaeono, afifio Tama ia Asi ma le Patu ma laua na taitai aemaise le nofo a ituaiga ia Fuata. Ia o paia o si o matou o Vaimauga 3, e 21 nuu ma pitonuu e afua mai Tiavi seia paia le tolotolo i Matautu. Faamalo le pale malo le onosai, soifua manuia malo faafetai tapuai faafetai tatalo. O le a foi sa outou faafogafoga le tau i se auauna le tau a la outou auauna, e talitonu lava e matua atu i ina i lau tofa faamatua e magalo ai se vaivai. Tau ina faamanuia tele le Atua i lau tapuaiga aemaise o lau tatalo, maua so ta ai aemaise o so ta sao aoga e tautua ai si o ta itumalo aemaise o Samoa e ala i lana Palestene aemaise le tatou faigamalo.

Lau Afioga i le Fofoga Fetalai e faaiu atu se upu, o le a foi se lafoga ua le tautamalii i le faafogafoga a lenei Palestene aemaise o le faafogafoga tapuai mai a Samoa, alofa toe faafoi mai. Ia manuia tele lau Afioga i le Fofoga Fetalai, manuia tele lau Afioga i le Palestene, Kapaneta aemaise o lenei Palestene, manuia tele lau Afioga i le Failautusi o le Fono, le Ofisa o le Fono, manuia tele lau Afioga i le Ofisa Sili o Pulega o le Matagaluega o Tupe aemaise o Ofisa Sili o Pulega uma ma le aufagaluega, le Finance Sector. Faamanuia le Atua i lo outou soifua tautua.

Manuia le saofaiga a Ofisa Sili o Pulega o Matagaluega ma Faalapotopotoga a le tatou Malo aemaise o le tapuaiga a Samoa le atunu pele. I le Suafa o le Tama le Alo ma le Agaga Paia. Soifua ma ia manuia.

FOFOGA FETALAI: Ua faamalo saunoa malamalamā i lau Afioga i le Minisita o Tupe. Ou te talitonu foi o le taunuuga lea o tali a le tatou Malo e taunu lava i lau Afioga i le Minisita o Tupe, ona o le tatou Tulafono o le Tulafono aua le tatou Tala Faatatau Faaopoopo o le Tupe.

O le mea lea faafetai i lau Afioga i le Minisita mo saunoaga malamalamā ou te talitonu o lea ua malilie foi finagalo o le Maota e tusa foi ma mataupu na latou laga. O le mea lea, malo le tofa, faafetai galulue i lau Afioga aemaise foi le Ofisa Sili o Pulega ma le Matagaluega o Tupe mo le galuega. Faafetai.

FOFOGA FETALAI: Ia ua maea felafolafoaiga i luga o le faiatauga faalua o le Tulafono Tau Faaofi o le Faatatauina o Tupe Faaopoopo (Nu.1) 2023/2024, ma o le a tuuina atu loa le fesili.

Na tuuina atu le fesili i le lafo e pei ona faatuina i le aso 19 Tesema 2023 ma ua faamaonia le faiatauga faalua.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2023/2024 – iloiloga auiliili

FOFOGA FETALAI: O le a sagai atu loa le Fono Aoao i le iloiloina auiliili o le Tulafono Tau Faaofi o le Faatatauina o Tupe Faaopoopo (Nu.1) 2023/2024.

I le faagasologa o le iloiloga auiliili o le Tulafono Tau Faaofi e mafai ona saunoa faatepa sui usufono i Mataupu o lo o tusia i le Tala Faatatau o Tupe

Faaopoopo Muamua o Tupe Maua ma Tupe Totogi a le Malo o Samoa mo le tausaga faaiuina aso 30 Iuni 2024, faapea le Lipoti a le Komiti o Tupe Maua ma Tupe Totogi i le Tala Faatatau Faaopoopo Muamua o Tupe 2023/2024, P.P.2023/2024 Nu.108.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i ona Faamatalaga.

FAAMATALAGA MUAMUA

VAEGATUPE MA TALA FAATATAU

FAAOPOOPOGA I TUPE FAATATAUINA

MATAGALUEGA

FAAMATALAGA AOFAI TUPE ALU

**PISINISI, ALAMANUIA
MA LEIPA**

\$263,810.

Faamaonia.

**AOGA, TAALOGA
MA AGANUU**

\$262,540.

Faamaonia.
TUPE:

\$465,588.

Faamaonia.

**MATAUPU TAU LE
VA I FAFO MA
FEFAATAUAIGA**

\$902,802.

Faamaonia.

PALEMIA

\$746,700.

Faamaonia.

**GALUEGA TAU ALAMANUIA
MA ATINAE A LE MALO** \$115,121.

Faamaonia.

**AOFAI FAAOPOOPOGA I TUPE
ALU AOAO 2023/2024** \$2,756,561.

Faamaonia.

FAAMATALAGA LONA LUA

FAAITIITIGA I TUPE FAATATAUINA

MATAGALUEGA FAAMATALAGA AOFAI O TUPE FAAITIITIA

**PISINISI, ALAMANUIA
MA LEIPA** \$(520,621).

Faamaonia.

TUPE \$(400,000).

Faamaonia.

**AOFAI FAAITIITIGA AOAO I
TUPE ALU 2023/2024** \$(920,621).

Faamaonia.

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$2,756,561 mai le Faaputugatupe a le Matagaluega o Tupe.

Faamaonia.

FUAIUPU 3: Faaitiitiga o aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.1) 2023/2024.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2023/2024 e aunoa ma se Teuteuga.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2023/2024 – faitauga faatolu

FOFOGA FETALAI: Tulai mai lau Afioga i le Minisita o Tupe.

Afioga Hon LAUTIMUIA UELESE VAAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2023/2024 i lona faitauga faatolu.*

Faaluaaina e le Minisita mo Faatoaga ma Faiga Faiva ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

Na faaalia le agaga fiafia o le Maota i le patipati o latou aao i le pasia ai o le Tulafono Tau Faaofi o le Faatatauina o Tupe Faaopoopo (Nu.1) 2023/2024.

FOFOGA FETALAI: Ia, ona o le tatou lafo lau Afioga i le Palemia, sa faaauau mai le tatou lafo ina se i maea le tatou Tala o le Tupe, ae o lo o i ai nai

galuega o totoe a le tatou Maota, ae lafo atu i lau Afioga po o le a se finagalo o lau Afioga.

Afioga Hon FIAME NAOMI MATAAFA: Lau Afioga ae sa tuu taimi foi tatou mo le 10:00. Ia o lea lava e maua le tatou taimi, o nai Tulafono pupuu. Ou te talosaga atu ai i le Nofoa ae tatou faaaauau e faamaea atu ai na galuega e tusa ai foi ma le faagasologa o nai a tatou Tulafono Tau Faaofi. Faafetai.

FOFOGA FETALAI: Malo faafetai i lau Afioga i le Palemia. Ia, e faaaauau le tatou galuega.

TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2023 – iloiloga auiliili

FOFOGA FETALAI: Mo le silafia e le Palemene, o le Tulafono Tau Faaofi lenei sa faia lona faitauga faalua i le aso 16 o Iuni 2023. Na faamaonia e le Fono Aoao Faitulafono lafo faaopoopoga o iloiloga a le Komiti i le aso 24 o Oketopa 2023 ma le aso 19 o Tesema 2023.

E tusa ai ma le Tulafono Tumau 107(1), e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ou te tapa ma le faaaloalo lau Afioga i le Taitaifono o le Komiti o Tupe Maua ma Tupe Totogi.

Afioga FALEOMAVAEGA TITIMAEA TAFUA (Taitaifono o le Komiti o Tupe Maua ma Tupe Totogi): Lau Afioga i le Fofoga Fatalai, ou te faatu le lafo ina ia faamaonia e le Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023, faatasi ma le Teuteuga ma le Faasaoga.

Faaluaina e le sui usufono mamalu mai Vaisigano 1, le sui usufono mai Lefaga ma Faleaseela, ma le sui usufono mo Faasaleleaga 2.

Na faamaonia le lafo.

FOFOGA FETALAI: E faasilasila atu ua faamaonia nei le Lipoti a le Komiti i le Tulafono Tau Faaofi ma o le a sagai atu loa le Fono Aoao mo le iloiloga auiliili.

E tusa ai ma le Tulafono Tumau 104, e amata le iloiloga auiliili i le Fuaiupu 2.

FUAIUPU 2: Ua faaofiina le vaega 12A fou.

FOFOGA FETALAI: O lo o i ai Teuteuga a le Komiti i le Fuaiupu 2. Ou te tapa lau Afioga i le Taitaifono o le Komiti.

Afioga FALEOMAVAEGA TITIMAEA TAFUA: Lau Afioga i le Fofoga Fetalai, ou te faatu le Teuteuga i le Fuaiupu 2 mo na o Lomiga faa-Samoa e faapea:

“TEUTEUGA:

Mo le ulutala o le vaega 12A o le Tulafono Tau Faaofi, ia suaia “FAAPUTUGATUPE O FAAMANUIAGA MO I LATOU E LE ATOATOA LE MALOSI O LE TINO MA LE MAFAUFAU” i le “FAAPUTUGATUPE O FAAMANUIAGA MO I LATOU E I AI AAIFIAGA TUMAU O LE SOIFUA.”

(a) Mo le fuaiupu 84A o lo o fuafuaina:

- (i) Mo le upu “**tagata e faamanuia ai**” ia suaia i upu, “**tagata e faamanuiaina ai**.”
- (ii). Mo le fuaitau “**latou e le atoatoa le malosi o le tino ma le mafaufau**” ia sui ai le “**latou e i ai aafiaga tumau o le soifua.**”
- (iii). Mo mataupu uma o lo o faasinomia i totonu o le Fuaiupu 84A o lo o fuafuaina i le “**latou e le atoatoa le malosi o le tino ma le mafaufau**” ia suaia i le “**latou e i ai aafiaga tumau o le soifua.**”

(b) Mo le fuaiupu 84B i le 84Q o lo o fuafuaina, mo mataupu uma o lo o faasinomia i le “**latou e le atoatoa le malosi o le tino ma le mafaufau**” ia sui ai le “**latou e i ai aafiaga tumau o le soifua.**”

FOFOGA FETALAI: Malie lau Afioga i le Taitaifono, o lena ua maea lau vaega.

Faamaonia le Teuteuga.

Faamaonia le Fuaiupu 2 e pei ona Teuteuina.

FUAIUPU 3: Teuteuga faatupulaia.

FOFOGA FETALAI: O lo o i ai le Teuteuga a le Komiti i le Fuaiupu 3. Ou te tapa lau Afioga i le Taitaifono o le Komiti.

Afioga FALEOMAVAEGA TITIMAEA TAFUA: Lau Afioga i le Fofoga Fetralai, ou te faatu le Teuteuga i le Fuaiupu 3 ua na o Lomiga Samoa e faapea:

“TEUTEUGA:

Mo mataupu e faasino ia i “**latou e le atoatoa le malosi o le tino ma le mafaufau**” ia suia i le “**latou e i ai aafiaga tumau o le soifua.**”

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o le Faaputugatupe mo le Lumanai Manuia i Tagata 2023.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa.

Tulai mai lau Afioga i le Taitaifono.

Afioga FALEOMAVAEGA TITIMAEA TAFUA: Lau Afioga i le Fofoga Fetralai ou te faatu le Faasaoga i le Igoa o le Tulafono:

“TEUTEUGA:

Ia aveesea le fuainumera “**2023**” ma suia i le fuainumera “**2024**” ina ia faitauina ai le Igoa o le Tulafono e faapea:

“Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2024.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2024 faatasi ma Teuteuga ma le Faasaoga.

**TULAFONO TAU FAAOFI O LE PEPA FAAMAONIA
FAATEKONOLOSI E ILOAGOFIE AI TAGATA SAMOA 2023
- iloiloga auiliili**

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga faalua i le aso 12 Iuni 2023 ma faamaonia e le Fono Aoao Faitulafono lafo mo taimi faaopoopo o iloiloga a le Komiti i le aso 24 o Oketopa 2023 ma le aso 19 o Tesema 2023.

E tusa ai ma Tulafono Tumau 107(1), e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ou te tapa lau Afioga i le Taitaifono o le Komiti o le Vaega tau le Tamaoaiga.

Afioga NIUAVA ETI L. MALOLO (Taitaifono o le Komiti o le Vaega tau le Tamaoaiga): Lau Afioga i le Fofoga Fetalai ou te faatu le lafo, ina ia faamaonia e le Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023 faatasi ma Teuteuga ma le Faasaoga.

Faaluaina e le sui usufono mo Falealili 2 ma le sui usufono mo Faasaleleaga 2.

Na faamaonia le lafo.

FOFOGA FETALAI: E faasilasila atu ua faamaonia nei le Lipoti a le Komiti i le Tulafono Tau Faaofi, ma o le a sagai atu loa le Fono Aoao mo le iloiloga auiliili.

E tusa ai ma Tulafono Tumau 104, e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Sini Autu.

Faamaonia.

FUAIUPU 4: Polokalame mo Pepa Faamaonia Faatekonolosi e Iloagofie ai Tagata Samoa.

Faamaonia.

FUAIUPU 5: O le Resitara Aoao o le a faafoeina lenei Tulafono.

Faamaonia.

FUAIUPU 6: Tofaina o Ofisa Lagolago o Pulega ma Ofisa Sinia ma le Tuuina atu o Malosiaga.

Faamaonia.

FUAIUPU 7: Faaaogaina o le Tulafono o Galuega a le Malo 2004.

Faamaonia.

FUAIUPU 8: Komiti Faufautua mo Pepa Faamaonia e Iloagofie ai Tagata Samoa.

FOFOGA FETALAI: O lo o i ai Teuteuga a le Komiti i le Fuaiupu 8. Ou te tapa le Taitaifono o le Komiti.

Afioga NIUAVA ETI L. MALOLO: Lau Afioga i le Fofoga Fatalai ou te faatu le Teuteuga i le Fuaiupu 8 e faapea:

“TEUTEUGA:

Mo le Fuaiupu (8)(b)(c) o le Tulafono Tau Faaofi, ia suia le “(2)(d)” i le (3)(d).”

Faamaonia le Teuteuga.

Faamaonia le Fuaiupu 8 e pei ona Teuteuina.

FUAIUPU 9: Galuega tauave a le Komiti Faufautua mo Pepa Faamaonia e Iloagofie ai Tagata Samoa.

Faamaonia.

FUAIUPU 10: Fonotaga ma Komiti.

Faamaonia.

FUAIUPU 11: Galuega tauave a le Resitara Aoao.

Faamaonia.

FUAIUPU 12: Faatinoga o galuega tauave a le Resitara Aoao.

Faamaonia.

FUAIUPU 13: Nofoaga tutotonu o auauanga.

Faamaonia.

FUAIUPU 14: Fuafuaga a le Malo mo le faatinoga.

Faamaonia.

FUAIUPU 15: Faamaopoopoga o lo o faagasolo pea ma isi lala sooupu.

Faamaonia.

FUAIUPU 16: Lipoti faaletausaga.

Faamaonia.

FUAIUPU 17: Noataga faaletulafono.

Faamaonia.

FUAIUPU 18: Tagata agavaa.

Faamaonia.

FUAIUPU 19: Resitalaina.

Faamaonia.

FUAIUPU 20: Resitala tele.

Faamaonia.

FUAIUPU 21: Resitalaina i le taimi e fanau mai ai.

Faamaonia.

FUAIUPU 22: Resitalaina faaauau.

Faamaonia.

FUAIUPU 23: Resitalaina o tamaiti, tagata e le atoatoa le malosi o le tino
ma le mafaufau, tagatanuu matutua ma isi lava tagata.

Faamaonia.

FUAIUPU 24: Fuafaatatau faapitoa.

Faamaonia.

FUAIUPU 25: Faamatalaga e uiga i le faagaoioiga o faamaumauga e
patino i se tagata.

Faamaonia.

FUAIUPU 26: Tuufaatasiga ma le faagaoioiga faatasi o le auaunaga.

FOFOGA FETALAI: O lo o i ai le Teuteuga a le Komiti i le Fuaiupu 26. Ou te tapa lau Afioga i le Taitaifono o le Komiti.

Afioga NIUAVA ETI L. MALOLO: Lau Afioga i le Fofoga Fetalai ou te faatu le Teuteuga i le Fuaiupu 26(2)(b) e faapea:

“TEUTEUGA:

Mo le Fuaiupu 26(2)(b), ia suia upu “**ma faamaumauga o ata pue o foliga vaaia ma tulagalima o tagata o lo o teuina i totonu o le resitala faaeletoroni o faamaumauga mo le faamaoniga i upu o lo o teuina i totonu o le resitala faaeletoroni o faamaumauga mo le faamaoniga ma faamaumauga o atapue o foliga vaaia ma tulagalima o tagata o lo o teuina i totonu o le resitala faaeletoroni o faamaumauga o foliga vaaia ma tulagalima o tagata.**”

Faamaonia le Teuteuga.

Faamaonia le Fuaiupu 26 e pei ona Teuteuina.

FUAIUPU 27: Resitala faaeletoroni o faamaumauga mo le faamaoniga.

Faamaonia.

FUAIUPU 28: Auala na maua ai faamaumauga ua aofia i totonu o le resitala faaeletoroni o faamaumauga mo le faamaoniga.

Faamaonia.

FUAIUPU 29: Faaaogaina ma le avanoa i faamaumauga i totonu o le resitala faaeletoroni o faamaumauga mo le faamaoniga.

Faamaonia.

FUAIUPU 30: Tuulata mai o faamaumauga e faasino i tagata ma faamaumauga o ata pue o foliga vaaia ma tulagalima o tagata.

Faamaonia.

FUAIUPU 31: Fuainumera tumau ma fuainumera suitulaga.

FOFOGA FETALAI: O lo o i ai le Teuteuga a le Komiti i le Fuaiupu 31. Ou tapa lau Afioga i le Taitaifono o le Komiti.

Afioga NIUAVA ETI L. MALOLO: Lau Afioga i le Fofoga Fetalai ou te faatu le Teuteuga i le Fuaiupu 31(2) e faapea:

“TEUTEUGA:

Ia suia upu “**tuuitiitia ai le lamatia o**” i upu “**faamalosia ai le puipuiga o.**”

Ma lou faaaloalo lava.

Faamaonia le Teuteuga.

Faamaonia le Fuaiupu 31 e pei ona Teuteuina.

FUAIUPU 32: Faaleaogaina o fuainumera tumau ma fuainumera suitulaga.

Faamaonia.

FUAIUPU 33: Tulaga o fuainumera tumau ma fuainumera suitulaga e aofia faatasai ai.

FOFOGA FETALAI: O lo o i ai le Teuteuga a le Komiti i le Fuaiupu 33. Ou te tapa lau Afioga i le Taitaifono o le Komiti.

Afioga NIUAVA ETI L. MALOLO: Lau Afioga i le Fofoga Fetalai ou te faatu le Teuteuga i le Fuaiupu 33(1) e faapea:

“TEUTEUGA:

Ia faaofi upu “se tasi o” i le tuanai ai o upu “**se fuainumera suitulaga e aofia faatasi ai e avea ma.**”

Faamaonia le Teuteuga.

Faamaonia le Fuaiupu 33 e pei ona Teuteuina.

FUAIUPU 34: Agavaa e tatau mo pepa faamaonia.

Faamaonia.

FUAIUPU 35: Matafaioi o le tagata ua resitalaina mo agavaa e tatau mo pepa faamaonia.

Faamaonia.

FUAIUPU 36: Faaleaogaina o agavaa e tatau mo pepa faamaonia.

Faamaonia.

FUAIUPU 37: Matafaioi o le faamaoniga aloaia.

Faamaonia.

FUAIUPU 38: Resitala faaeletoroni ma faamaumauga o foliga vaaia ma tulagalima o tagata.

Faamaonia.

FUAIUPU 39: Faaaogaina o le faamaoniga aloaia.

Faamaonia.

FUAIUPU 40: Paaga e faalagolago i le polokalame mo faamaoniga.

Faamaonia.

FUAIUPU 41: Tausisia e paaga e faalagolago i le polokalame mo faamaoniga o lenei Tulafono.

Faamaonia.

FUAIUPU 42: Faafesuaiga o faamatalaga mo le faamaoniga aloaia.

Faamaonia.

FUAIUPU 43: Faamatalaga e uiga i le faamaoniga aloaia.

Faamaonia.

FUAIUPU 44: Isi taualumaga e ese mai ai ua mafai ona faaaogaina.

Faamaonia.

FUAIUPU 45: Teuina ma le faaaogaina o faamaumauga.

Faamaonia.

FUAIUPU 46: Malupuipuia, faamaoni ma agatapuia.

Faamaonia.

FUAIUPU 47: Faasilasilaga a i latou e faagaoioia faamaumauga i aafiaga ma faamaumauga e patino i le tagata.

Faamaonia.

FUAIUPU 48: **Faasilasilaga a paaga e faalagolago i le polokalame mo le faamaoniga i aafiaga o faamaumauga e patino i le tagata.**

Faamaonia.

FUAIUPU 49: **Faasilasilaga a le Resitara Aoao e uiga i aafiaga, faamaumauga e patino i le tagata.**

FOFOGA FETALAI: O lo o i ai le Teuteuga a le Komiti i le Fuaiupu 49. Ou te tapa le Taitaifono o le Komiti.

Afioga NIUAVA ETI L. MALOLO: Lau Afioga i le Fofoga Fetalai ou te faatu le Teuteuga i le Fuaiupu 49(1)(b) mo na o le Lomiga Faaperetania e faapea:

“TEUTEUGA:

Ia suia upu “**parakarafa o**” i upu “**parakarafa (a)**.”

Faamaonia le Teuteuga.

Faamaonia le Fuaiupu 49 e pei ona Teuteuina.

FUAIUPU 50: **Manaoga e uiga i faasalalauga ma faamaumauga o aafiaga o faamaumauga e patino i le tagata.**

Faamaonia.

FUAIUPU 51: **Aiatatau a tagata ua resitalaina.**

Faamaonia.

FUAIUPU 52: **E leai se aiatatau i tulaga tau tagatanuu.**

Faamaonia.

FUAIUPU 53: Faitioga.

Faamaonia.

FUAIUPU 54: O le le tausisia ai e paaga e faalagolago i le polokalame mo faamaoniga ma i latou e faagaoioia faamaumauga.

Faamaonia.

FUAIUPU 55: Faafoliga i le isi tagata.

Faamaonia.

FUAIUPU 56: Faailoaina atu o faamatalaga e aunoa ma se faatagaga.

Faamaonia.

FUAIUPU 57: O avanoa e le faatagaina, satia ma le faaleagaina.

Faamaonia.

FUAIUPU 58: Faasalaga.

Faamaonia.

FUAIUPU 59: Tulafono Faatonutonu.

Faamaonia.

FUAIUPU 60: Teuteuga Faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Pepa Faamaonia Faatekonolosi e Iloagofie ai Tagata Samoa 2023.

FOFOGA FETALAI: O lo o i ai Teuteuga ma le Faasaoga a le Komiti i le Fuaiupu 1 ma le Igoa. Tulai mai lau Afioga i le Taitaifono.

Afioga NIUAVA ETI L. MALOLO: Lau Afioga i le Fofoga Fetalai ou te faatu le Teuteuga ma le Faasaoga i le Fuaiupu 1 ma le Igoa o le Tulafono e faapea:

“TEUTEUGA:

Igoa o le Tulafono

Mo na o le Lomiga Samoa:

- (i) Mo le Fuaiupu 1(1), ia suia upu “**Tulafono o le Pepa Faamaonia Faatekonolosi e Iloagofie ai Tagata Samoa**” i upu “**Tulafono o le Faamaoniga Aloaia Faatekonolosi o Tagatanuu o Samoa**” ma so o se vaega o lo o aliali mai ai.

Faasaoga

- (ii) Ina ia aveese le fuainumera “**2023**” ma suia i le fuainumera “**2024**” ina ia fai tauina ai le igoa o le Tulafono e faapea:

“Tulafono Tau Faaofi o le Faamaoniga Aloaia Faatekonolosi o Tagatanuu o Samoa 2024.

Faamaonia le Teuteuga ma le Faasaoga.

Faamaonia le Fuaiupu 1 ma le Igoa e pei ona Teuteuina ma Faasaoina.

Na faagasolo le Tulafono Tau Faaofi o le Faamaoniga Aloaia Faatekonolosi o Tagatanuu o Samoa 2024 faatasi ma le Teuteuga ma le Faasaoga.

LAFO MO LE FAATAATIAESE O TULAFONO TUMAU 108(4)

FOFOGA FETALAI: Ou te tapa lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faataatiae le Tulafono Tumau 108(4) ina ia avanoa ai le faitauga faatolu o Tulafono Tau Faaofi sa iloiloina auiliili i le aso Fono lenei.*

Faaluaina e le Minisita mo Faatoaga ma Faiga Faiva ma le Minisita mo Punaoa Faalenatura ma le Siosiomaga.

Na faamaonia le lafo.

TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2024 - faitauga faatolu

FOFOGA FETALAI: Ou te tapa lau Afioga i le Minisita o Tupe.

Afioga Hon LAUTIMUIA UELESE VAAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2024 i lona faitauga faatolu.*

Faaluaina e le Minisita mo Faatoaga ma Faiga Faiva, Minisita mo Punaoa Faalenatura ma le Siosiomaga ma le Minisita mo Taaloga ma Alagaoa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TULAFONO TAU FAAOFI O LE FAAMAONIGA ALOAIA FAATEKONOLOSI O TAGATANUU O SAMOA 2024 - faitauga faatolu

FOFOGA FETALAI: Ou te tapa lau Afioga i le Minisita o le Ofisa o Fuainumera o Samoa.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi*

o le Faamaoniga Aloaia Faatekonolosi o Tagatanuu o Samoa 2024 i lona faitauga faatolu.

Faaluaina e le Minisita mo Faatoaga ma Faiga Faiva, Minisita mo Leoleo, Minisita mo Pisinisi, Alamanuia ma Leipa ma le Minisita mo Taaloga ma Alagaoa.

Na faamaonia le lafo ma faitauina le Tulafono Tau Faaofī i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Lau Afioga i le Palemia pe i ai se mea e te fia saunoa i ai o lea ua maea tatou galuega faatulagaina mo lenei aso.

Afioga Hon FIAME NAOMI MATAAFA: Lau Afioga ou te manatu ua vela foi le fala i le Maota. Ou te momoli atu le faamalo i lau Afioga mo le faafoeina o le galuega o lenei aso, aemaise le mamalu o sui usufono i le faamaeaina o le tatou galuega. Ia, lau Afoga i le Fofoga Fetalai, ua taua foi le avanoa ua mafai ona pasia ai tatou Tulafono ia faatoa faamaonia. Atonu e ui ina fai sina umi o tau faagasolo, a o lea ua maua le paganoa lelei e mafai ona faagasolo ai loa nai a tatou Tulafono ia e taua.

O lo o maitauina lau Afioga i le Fofoga Fetalai e malolo galuega a le Fono mo le masina o Fepuari, e le taumate e tauave pea galuega faa-Komiti i le faagasologa o nisi o Lipoti o lo o i luma pea o Laulau a Fono a tatou Komiti. Ia momoli atu ia le soifua manuia o le Maota mo tatou fonotaga ia Fepuari, ma o lo o i ai foi ni faamoemoega pei ona saunoa nisi o Minisita, o lo o i ai nisi o tatou Tulafono o lo o tapena mai e faaaauai ai le galuega a le tatou Maota. A o lenei itula, e faafetai atu i le auauanga a le Ofisa o le Fono, ae faapea foi le lagolago mai a vaega eseese o le Malo mo le tapenaina o vaega eseese o le Fono, aemaise foi o le aufaigaluega o lo o faapea ona tatou usufono faatasi, aemaise o le faamauina o finagalo o sui usufono o le Maota, ia ma le fautuina foi o le Vasega o le Kapaneta, e tusa ai ma felafolafoaiga sa feagai ma le Maota.

Lau Afioga i le Fofoga Fetalai ua maitau atu tatou te le i aulia le tatou itula na faatulaga, ae ina ua maea le tatou galuega, po o le a sou finagalo ae tatou malolo loa ua faaaaogagase foi le Maota i lenei aso. Malo faafetai.

FOFOGA FETALAI: Faafetai i lau Afioga i le Tamaitai Palemia. Faafetai mo lou finagalo faaalia foi aemaise foi o nisi o tulaga na e saunoa faafetai ai foi i le tatou Fono aemaise foi o auauanga eseese. O le mea lea malo saunoa i lau Afioga i le Taitai o le Malo.

Ia, o lea ua tatou taunu mai i le tatou taimi manava o lenei afiafi e tusa o le lafo ua faamaonia, o lea foi ua saunoa manino le Afioga i le Palemia i le tulaga ua i ai tatou galuega faataatitia mo lenei aso. E i ai le manatu ua faaaaogagase lava le mamalu o usugafono ona o le taumafaiga o le tatou galuega. Ua faamalo le usufono, malo foi le faatoatoa, faamalo le tauatai.

Lau Afioga i le Tamaitai Palemia ma le paia o le Kabeneta, faamalo fai o le faiva. Ua taoto atu faantuaga a le Palemene e lagolago ai la outou pitolaau. Ia alofagia e le Atua la outou faatonufolau o le tatou Malo.

Le paia i usugafono uma a le atunu, faafetai mo le tofa ua sasaa e matimati ai tonufai o le atunu. Faafetai foi mo le amanaia o se taumafai atu o le Fofoga Fatalai ua soloa lelei ai taualumaga o le tatou galuega. O galuega lelei uma ua mafai ona tatou faia i lenei aso, ia fai lea ma viiga o le Atua. O a foi ni faaletonu o le Fofoga Fatalai i le taitaiga o le tatou Fono, ia alolofa mai ma faamagalo. Ua tatau ona fai se tatou malologa.

Faafetai Samoa i lau tapuaiga, ua folau lava i manu le alofaiva o lau Palemene ona o lau tatalo ma lau tapuaiga. Malo faafetai. Tau ina ia maua e le mamalu o le atunu se malologa filemu o lenei po. Faafetai ma faamalo atu i Ofisa Sili o Pulega o Matagaluega ma Faalapotopotoga Tumaoti a le tatou Malo i la outou tapuaiga ma le lagolagosua i le Malo ma le Palemene. Faamalo le onosai.

Ae tatou te le i tolopo ou te talosaga atu i le sui usufono mo le Vaa o Fonoti lau Susuga i le Tiakono Toeaina e te saunia se tatou tatalo e faaiuina ai le tatou Fono.

Na tolopo Taualumaga a le Fono Aoao Faitulafono i le itula e 8:57 i le po seia aulia le Aso Lua, 5 o Mati i le itula e 9:30 i le taeao.